

ရောမ ရောမ သင်းတော်ဟို့ ပေါလုရဲ့ ပေးစာ နိဒါန်း

ရောမ သင်းတော်ဟို့ ပေါလုရဲ့ ပေးစာ ဟာ ခရစ်တော် မွီးဘီးန ၅၄ န ၅၈ ခုနှစ်ကြားမှာ တမန်တော် ပေါလု ဟု ရေးဟွားဟယ်။ ပေါလုဟာ ရောမမြို့ဟို့ သွားရသေး ဘဲဟူကြောန့် ရောမမြို့မာရှိဟူ ယုဒလူမျိုးန လူမျိုးခြား ခရစ်ယာန်လေဟို့ သွန်သန်ဟို့တွပ် အယ်စာဟို့ ရေးလိုက် ဟယ်။ သူဟာ အယ်ခီဒူးဟု ကောရိန်မြို့မာ နေနေဟူကြော န့် အယ်မြို့ဟုနေဘီး အယ်စာဟို့ ရေးလိုက်ဟူဇာဖြစ်ဟု ယ်။ လူမျိုးလေ ဂူလောင်းဟာ ယေရှုခရစ်တော်ဟို့ ယောင် ကြည်ဘီး နားထောန်ပါ ဆိုဘီး ပေါလုဟု ရေးဟွားလေဟု ယ် (၁၆.၂၆)။

ရောမသင်းတော်ဟို့ ပေါလုရဲ့ ပေးစာဟာ နေရာတိုင်း မာရှိဟူ ခရစ်ယာန်လေတွပ် ရေးကီးဟူ စာဖြစ်ဟယ်။ ဖြား ဖြစ်ကြောန့်နူးဆိုဟာ ပေါလုဟာ ယေရှုခရစ်တော် အားဖြ င်ဘဲ ကယ်တန်ရှင်း ရနိုင်ဟယ် ဆိုဘီး ရှင်းရှင်းလန်းလ န်းဟွား ရှင်းပြဟွားဟယ်။ ပေါလုဟာ ယေရှုခရစ်တော် ရဲ့ ဒန်းကောန်းဟို့ ဓမ္မဟောန်ကျမ်းနလည်း ခံဆစ်ပေး ဟွားဟယ်။ ကျမ်းစာပညာရှင်လေ ဘောင်ဂီးဟာ “ငါဟာ ခရစ်တော်ရဲ့ ဒန်းကောန်းတွပ် လောင်းဝ ယှစ်ကြော့-က်

ဇာ မှေ့ဟူ။ ဖြားဖြစ်ကြောင့်နှုံးဆိုဟာ အယ်ဒန်းကောန်းဟာ ရင်ဦးဆောင်း ယုဒလူမျိုး၊ နှော-က်မှ လူမျိုးခြားလေထဲ မာ ယောင်ကြည်လတ်ခံလာဟို့ သူလေဂူလောင်းဟို့ ကယ် တန်ပေးဟူ ဘုရားသခင်ရဲ့ တဂိုးတော်ဖြစ်ပါဟယ်” ဆိုဘီး အယ်ကျမ်းထဲဟု ရရာတိုင်း ရေးကီးဇာဟို့ ၁.၁၆ ထော့-က် ခံဂေ့ဟယ်။ ရောမကျမ်းရဲ့ ပထမပိုင်းဟာ (၁—၁၂) နတ် နဲဟူ သီအိုလော်ဂျီ ဖြစ်ဘီး ဒုတိယပိုင်းဟာ (၁၃—၁၅) ခရစ်ယာန် သတ်ရှင်ရှင်း ပေါင်ဇံတွပ် လတ်တို့ကုလဟူ လမ်းညွှန်ချစ်လေ ဘောင်းဂီးပါဝမ်လေဟယ်။

ကြောန်းရာ ကျဉ်းချောက်

၁။ ပေါလုဟာ ထောင်းဇံတိုင်းဘဲ့ သူ့ကိုယ်သူ မိတ်ဆစ် ရှင်းအားဖြင့် အယ်ကျမ်းဟို့ စပြုဟားဘီး ဖယ်လူ လေနားဟို့ ရေးဟားဟယ် ဆိုဘီး ပြောနေဟူကြောန်း (၁.၁-၁၅)

၂။ သူဟာ လူ့သားမျိုးနွယ်ရဲ့ ခြေနေန ဆိုင်ဟူဇာန ယေရှုခရစ်တော်အားဖြင့်ဘဲ့ ကယ်တန်ခံရမယ် ဆို ဇာဟို့ ရေးဟားဟူကြောန်း (၁.၁၆—၁၁.၃၆)

၃။ ပေါလုဟာ ခရစ်ယာန်သတ်ရှင်ရှင်း ပေါင်ဇံတွပ် လ တ်တို့ကုလဟူ လမ်းညွှန်ချစ်လေ ဘောင်းဂီးဟို့ ရေး ဟားဟူကြောန်း (၁၂.၁—၁၅.၁၃)

၄။ သူဟာ ရောမသင်းတော်ဟု သင်းဝမ်သူလေဟို့ နှောက်ဆစ်စကား ဘောင်းဂီး ပြော ရှင်းအားဖြင့် ရောမကျမ်းဟို့ နီဂေါင်းချောက်ဟားဟူကြောန်း

(၁၆.၁-၂၇)

¹ ဒန်းကောန်းဟို့ ဟောပြောဟို့တွပ် တမန်တော်ဖြစ်န ဘုရားသခင်ဝီးကော့-က်ဘီး ခန့်အပ်ခံရဟူ ခရစ်တော် ယေရှုရဲ့ စေခံ ငါပေါလုဟာ အယ်စာဟို့ ရေးလိုက်ပါဟ ယ်။

² ရှေးခါဒူးဟ ဘုရားသခင်ဟာ သူ့ရဲ့ ပရောဖက်လေ အားဖြင့် အယ်မူဒန်းကောန်းတွပ် ဂဒီထားဟားကြောန်း ဟို့ သန့်ရှင်းဟူ ကျမ်းစာအားဖြင့် ဖော်ပြဟားလေဟ ယ်။

³ အယ်မူဒန်းကောန်းဟာ ဘုရားသခင်ရဲ့ သားတော် ယေရှုခရစ်တော်ရဲ့ ကြောန်းဘဲ ဖြစ်ပါဟယ်။ သားတော် ဟာ လူဇာတိအားဖြင့် ဒါဝိဒ်မျိုးနွယ်ဟုနေ ပေါ်ထွပ်လာ ဘီး။

⁴ သူ့ရဲ့ မြင့်မြတ် သန့်ရှင်းရှင်းအားဖြင့် ဘုရားသခင် ရဲ့ သားတော်ဖြစ်ဟူကြောန်းဟို့ ထန်ရှားစေဟို့တွပ် ဘုရား သခင်ဟာ မဟာတဂိုးတော်အားဖြင့် သခင်ယေရှုခရစ်ဟို့ သေရှင်းဟုနေဘီး ထမြော့-က်စေတော်မူဟယ်။

⁵ အယ်သခင်ရဲ့ နာမတော်တွပ် လူမျိုးလေ ဂူလောင်း ထဲမာ ယောင်ကြည်ရှင်းနဆိုင်ဟူ နာခံမှုရှိ စေဟို့တွပ် ကျေးဇူးတော်န တမန်တော်ဖြစ်ဟူခွံ့ဟို့ ကိုယ်တော် အားဖြင့် နို့လေရရှိဂေဟယ်။

⁶ နန်းနို့လေလည်း အယ်လူမျိုးထဲမာပါဘီး ယေရှု ခရစ်တော်ရဲ့ တမံဖြစ်ဟို့တွပ် ဝီးကော့-က်ခံရဟူ သူလေ

ဖြစ်စေဟယ်။

⁷ အယ်မျိုး ဘုရားသခင်ရဲ့ ရှစ်ရှင်းမြစ်တာတော် အားဖြင့် သူ့ရဲ့ လူမျိုးတော်ထဲဟို့ ရော-က်စေဟို့တွပ် ဝီးကော-က်ခံရဟူ ရောမမြို့ဟု သန်ရှင်းဟူ သင်းဝမ် သူလေနားဟို့ အယ်စာရေးလိုက်ပါဟယ်။

သခင် ယေရှု ခရစ်တော် န နို့ လေ ရဲ့ ဖ ဖြစ် ဟူ ဘုရားသခင်နားဟု ကျေးဇူးတော်န ငြိသတ်ရှင်းဟု နန်းနို့လေ ခံစားရစေပါစေ။

ကျေးဇူးတော် ချီးမွမ်းဟူကြောင်း

⁸ နန်းနို့လေရဲ့ ယောင်ကြည်ဟူ ကြောင်းရာလေဟု တ ကမ္ဘာလောင်းဟို့ ပုလုံနဲ့ဘီး ကျော်ကြားဟူကြောန့် နန်းနို့ လေ ဂူလောင်းဟို့ ယေရှုခရစ်တော်အားဖြင့် ငါကိုးကွယ် ဟူ ဘုရားသခင်ရဲ့ ကျေးဇူးတော်ဟို့ ချီးမွမ်းပါဟယ်။

⁹ သားတော်ရဲ့ကြောင်း ဒန်းကောင်းဟို့ ဟောပြောဟူ ဇာအားဖြင့် ငါဟု ဘုရားသခင်ရဲ့ မှတော်ဟို့ စိဝိညာဉ် နထပ်တူ လောက်ဆောန်နေဘီး၊

¹⁰ ငါဟု ဆုတောင်းဟူ ခီတိုင်းမာ နန်းနို့လေဟို့ မြဲဒမ်း ဒီရနေကြောင်းဟို့ ငါကိုးကွယ်ဟူ ဘုရားသခင်ဟု ငါ့ရဲ့ သတ်သေဖြစ်ပါဟယ်။ ဘုရားသခင်လိုတော်ရှိဟယ် ဆို ဟု ကြာခန်မာ နန်းနို့လေနားဟို့ လာနိုင်ဟို့တွပ် လမ်းဖွေ ပေးမယ့်ကြောင်းဟို့ ဆုတောင်းပါဟယ်။

¹¹ နန်းနို့လေ ဂူလောင်းဟု တည်ကြည်ဘီး ခိုင်ခံ့ဟို့တွပ် ဝိညာဉ်ဆုကျေးဇူးလေဟို့ ဝီမျှပေးရှင်ဟူ ဆန္ဒရှိဟူကြောန့်

ငါဟာ နန်းနို့လေဟို ရရာတိုင်းဘဲ တွဲရှင်ပါဟယ်။

12 တနည်းအားဖြင့် အယ်မျိုးတို့ဆောင်ဟူ ခီမာ နန်းနို့လေ ငါဟာ သီးသီးမာရှိဟူ ယောင်ကြည်ရှင်းလေဟို ပလန်လှန် သတ်သေခံဝီမျှဘီး ခွန်းအားယူနိုင်ဟို့တွပ် ဖြစ်ပါဟယ်။

13 ညီကို မောန်နှမလေ ငါဟာ လူမျိုးခြားလေမာ သီးပွမ့်လေရဟူမျိုး နန်းနို့လေမာလည်း သီးပွမ့်လေရဟို့တွပ် နန်းနို့လေနားဟို့ လာနိုင်အောန် ခါဘီးခါ စီစဉ်ဟူလည်းဘဲ ခုခီထံ တားဆီးမှုဟို့ ခံနေရဟူကြောင်းဟို့ နန်းနို့လေ သိစေရှင်ပါဟယ်။

14 ငါဟာ ဂရိလူမျိုးဘဲဖြစ်ဖြစ်၊ ရိုင်းဟူလူဘဲဖြစ်ဖြစ်၊ ပညာရှိဘဲဖြစ်ဖြစ်၊ ပညာမဲ့ဘဲဖြစ်ဖြစ်၊ လူဘောင်းဇောင်ဟို့ ဟောပြောရမယ့် ဒန်းကောန်းရဲ့ ကြွေးဟာ ငါ့မာတန်နေပါဟယ်။

15 အယ်ကြောန့် ရောမမြို့မာရှိဟူ နန်းနို့လေဟို့လည်း အယ်ဒန်းကောန်းဟို့ ဟောပြောဟို့တွပ် ငါဟာ ရရာတိုင်း စီအားထတ်သန်နေပါဟယ်။

ဒန်းကောန်းရဲ့ တဂိုးကြောန်း

16 ငါဟာ ခရစ်တော်ရဲ့ ဒန်းကောန်းတွပ် လောင်းဝ ယှစ်ကြော-က်မှုမဲ့ဟု ဖြားဖြစ်ကြောန့်နူးဆိုဟာ အယ်မှုဒန်းကောန်းဟာ ရင်ဦးဆောင်း ယုဒလူမျိုး၊ နှော-က်မှုလူမျိုးခြားလေထဲမာ ယောင်ကြည်လတ်ခံလာမယ့် သူ

လေလူလောင်းဟို့ ကယ်တန်ပေးဟူ ဘုရားသခင်ရဲ့ တဂိုး
တော် ဖြစ်ပါဟယ်။

17 ဖြားဖြစ်ကြောန့်နူးဆိုဟာ “ဖြောန့်မတ်ဟူသူဟာ
ယောင်ကြည်ရှင်းအားဖြင့် သတ်ရှင်လေ့မယ်”* ဆိုဘီး
ကျမ်းစာမာရေးဟူးတိုင်း ယောင်ကြည်ရှင်းနှိုက်တည်ဟူ
ဘုရားသခင်ရဲ့ ဖြောန့်မတ်ရှင်းတရားဟာ ယောင်ကြည်
ရှင်းတွပ် အယ်ဒန်းကောန်းအားဖြင့် ထန်ရှားနေပါဟယ်။

လူသားရဲ့ ပြစ်ကြောန်း

18 ဘုရားသခင်ရဲ့ မျစ်တော်ဟာ ကောန်းဂန်ဘောင်ဟု
နေ ထန်ရှားဘီး သမ္မာတရားဟို့ တရားဘဲဟူမှုန လူလေသိ
ဘဲနေအောန် ဆီးတားပိပန်ဟူ သူလေရဲ့ ဘုရားတရားမွေ
ရှင်းန တရားဘဲဟူမှု ဂူလောင်းထတ်ဟို့ သတ်ရောက်ဟု
ယ်။

19 ဖြားဖြစ်ကြောန့်နူးဆိုဟာ ဘုရားသခင်ဟာ သူန ပတ်
သတ်ဘီး သိသင့်သိထိုက်ဟူ ဇာလေဟို့ ရှင်းရှင်းလန်းလ
န်းဟူး ဖော်ပြပေးဟူးကြောန့် ဖြစ်ဟယ်။ အယ်မှုကြော
န်းလေဟာ သူးနှိုလေမှာ ထန်ရှားဘီး ရှိနေပါဟယ်။

20 တနည်းအားဖြင့် အယ်လောကဟို့ ဖန်ဆင်းဟူခီဟု
နေစဘီး ဘုရားသခင်ရဲ့ မြင်ရဘဲဟူ ဂေါင်အင်္ဂါလေဖြစ်
ဟူ ကိုယ်တော်ရဲ့ ထာဝရ တဂိုးတော်န ဘုရားသခင်ရဲ့ ဖြစ်
တော်လေဟာ ဖန်ဆင်းတော်မူဟူ ရာလေအားဖြင့် ရှင်းရှင်း

* 1:17 ၁.၁၇ ဖြောန့်မတ်ဟူသူဟာ ယောင်ကြည်ရှင်းအားဖြင့်
သတ်ရှင်လေ့မယ်၊ အယ်မျိုးမှုဘဲနေဟာ ယောင်ကြည်ရှင်းအားဖြင့်ဘဲ
ဖြောန့်မတ်ဟူသူဟာ သတ်ရှင်လေ့မယ်။

လန်းလန်း သိနိုင်ဟူကြောင့် သူးနှိလေဟာ ကိုယ့်ပြစ်လေ
တွပ် ဆင်ခေပေးဟို ရနိုင်ဂေဟု!

21 ဖြားဖြစ်ကြောင့်နူးဆိုဟာ သူးနှိလေဟာ ဘုရားသခင်
ဟို သိဂေဟူလည်းဘဲ ကိုယ်တော်ရဲ့ ဖောင်းသရေတော်ဟို
ချီးမွမ်းသင့်ဟူတိုင်း ချီးမွမ်းဘဲ၊ ကျေးဇူးတော်ဟိုလည်း
သိမှတ်ဘဲန ကျိုးမွေဘဲဟူ အလေဟိုဘဲ တွေးနေဂေဟူ
ကြောင့် သူးနှိရဲ့ သိတရားမဲ့ဟူ စိန်လောင်းဟို မှောန်မိုက်
ဖောင်းလွှမ်းဟူးလေဟယ်။

22 သူးနှိလေဟာ ကိုယ့်ကိုယ်ကိုယ် ပညာရှိဖြစ်ဟယ် ဆို
ဘီး ပြောဂေဟူလည်းဘဲ မိုက်မဲဟူ သူလေဖြစ်လာဘီး၊

23 ဖော့-က်ပုလန် ပျစ်စီးရှင်းန ကင်းဟူ ဘုရားသခင်ရဲ့
ဖောင်းသရေတော်ဟို ပယ်ဘီး ဖော့-က်ပုလန်တတ်ဟူ လူ
ရောက်ထု၊ ငှတ်ရောက်ထု၊ ခေလေးရှောန်း သတ္တဝါန တွား
ဘီးသွားတတ်ဟူ လိဆန်လေရဲ့ ရောက်ထုဟို ဘုရားသခင်
နေရာမာ ချီးမြှော့-က်ဂေဟယ်။

24 အယ်ကြော နဲ့ ဘုရားသခင်ဟာ သူးနှိရှင်းရှင်း
ကိုယ်ခန္ဓာရဲ့ အသရေဟို ပျစ်စီးစေဟိုတွပ် သူးနှိလေရဲ့
ကံလေသာစိ ညစ်ညူးရှင်းလတ်ဟို အပ်လိုက်လေဟယ်။

25 အယ်သူလေဟာ ဘုရားသခင်ရဲ့ သမ္မာတရားဟို မှား
ဟူနေရာမာ ထားဂေဘီး ဖန်ဆင်းရှင်ဟို ကိုးကွယ်ရဟိုစား
ဖန်ဆင်းဟူးဟူ အလေဟို ဝတ်ပြုကိုးကွယ်ဂေလေဟ
ယ်။ ဖန်ဆင်းရှင်ဟာ ထာဝရမင်္ဂလာ ရှိတော်မူဟယ်။ အာ

မင်။

26 အယ်မျိုးလောက်ဟူကြောင့် ဘုရားသခင်ဟာ သူး
နို့လေဟို ယှစ်ဇကောန်းဟူ ကိလေသာလတ်ထဲဟို အပ်
လိုက်တော်မူလေဟယ်။ ဖြားဖြစ်ကြောင့်နူးဆိုဟာ သူးနို့ထဲ
ဟု မီးမလေဟာ သဘာဝဆစ်ဆံမှုဟို ပယ်ဘီးဟာ သဘာ
ဝန ဆန့်ကျင်ဖတ်ဖြစ်ဟူ ဆစ်ဆံရှင်းနော့-က်ဟို လိုက်ဂေ
လေဟယ်။

27 အယ်တိုင်းဘဲ ယော့-က်ကျားလေလည်း မီးမန
သဘာဝဆစ်ဆံမှုဟို ပယ်ဘီးဟာ ရှင်းရှင်း ရာဂမီး
တော့-က်လောန်ဂေဘီး ယှစ်ဇကောန်းဟူဇဟို ယော့-က်
ကျားရှင်းရှင်း ပြုဂေဟူကြောင့် သူးနို့လေရဲ့ ဆိုးညစ်ဟူ
ကျင့်တွပ် ထိုက်သင့်ဟူ ပြစ်ဒန်လေဟို ခံရဂေဟယ်။

28 အယ်သူလေဟာ ဘုရားသခင်ဟို သိမှတ်ဘဲန
လျစ်လျူရှုဂေဟူကြောင့် ဘုရားသခင်ဟာ သူးနို့လေဟို
ယောက်ညှိဟူစိလတ်ဟို အပ်လိုက်တော်မူဟူကြောင့် သူး
နို့လေဟာ ပြုသင့်ဘဲဟူဇလေဟို ပြုကျင့်ဂေလေဟယ်။

29 အယ်သူလေဟာ မျိုးမျိုးဖြစ်ဟူ ဆိုးယောက်မိုက်မဲ
ရှင်း၊ တရားဘဲဟူ မေထုန်ပြုရှင်း၊ ညစ်ညမ်းရှင်း၊ လောဘ
တတ်မတ်ရှင်း၊ ကျင့်ပျစ်ရှင်း၊ မနာလိုရှင်း၊ လူ့သတ်ဟို
သတ်ရှင်း၊ ရန်ဖြစ်ရှင်း၊ လှည့်ဇားရှင်း၊ ရန်ငြိုးထားရှင်းန
သူများတင်းပြောဆိုရှင်း၊

30 ပေါက်ခတ်ပြောဆိုရှင်း၊ ဘုရားသခင်ဟို မူးရှင်း၊

မိုက်ရိုင်းရှင်း၊[†] မာန်မာနထောန်လွှားရှင်း၊ ဝါကြွားရှင်း၊ ကောင်းဘဲဟူမှုလေဟို့ တီထွင်ရှင်း၊ မိဖစကားဟို့ နားထောန်ဘဲနေရှင်း၊

³¹ သိတရားကင်းမဲ့သူ၊ ဂဒိတည်ဘဲဟူသူ၊ ကြင်နာဟူစိကင်းမဲ့သူ၊ သနားရှင်းစိကင်းမဲ့သူလေ ဖြစ်ဂေဟယ်။

³² အယ်မျိုး ကျင့်ဂေဟူသူလေဟာ သေဒန်ဟို့ ခံထိုက်ဟယ်ဆိုဘီး ဘုရားသခင် စီရင်ဟူးဇာဟို့ သိဂေဟူလည်းဘဲ သူးနှိုကိုယ်တိုင်လည်းကျင့်ဘီး အယ်မျိုး ကျင့်ဂေဟူသူလေဟို့လည်း အားပေးဂေါင်ယူဂေလေဟယ်။

2

ဘုရားသခင်ခွဲလမှတ်ဟူးဟူ တရားစီရင်ဟူကြောင်း

¹ အယ်ကြောန့် သူများဟို့ စစ်ကြောစီရင်တတ်ဟူသူ၊ နန်ဟာ ကိုယ့်ပြစ်ဟို့ မဖောင်းနိုင်ဟူ။ ဖြားဖြစ်ကြောန့်နူးဆိုဟာ နန်ဟာ စစ်ကြောစီရင်ဟူမှုဟို့ ကိုယ်တိုင်ပြုဟူဇာ အားဖြင့်၊ သူများဟို့စစ်ကြောစီရင်ရာမာ ကိုယ့်မာပြစ်ရှိဟူကြောန့်ဟို့ စီရင်ဆောင်းဖြတ်ရာရော-က်ဟယ်။

² အယ်မျိုး ဟူ ကျင့်လေဟို့ ကျင့်ဟူသူလေဟို့ ဘုရားသခင် တရားစီရင်တော်မူဟူဇာဟာ ဖြောန့်မတ်မှန်ကန်ကြောန့်ဟို့ နို့လေသိဂေပါဟယ်။

[†] **1:30 ၁.၃၀** ဘုရားသခင်ဟို့ မူးရှင်း၊ မိုက်ရိုင်းရှင်း၊ အယ်မျိုးမှုဘဲနေဟာ ဘုရားသခင်ဟို့ မူးဟူသူန မိုက်ရိုင်းဟူ သူလေ ဖြစ်ဂေဟယ်။ **2:1 ၂.၁** မ ၇.၁၊ လု ၆.၃၇

3 အယ်ဘေမဲ့ မိဆွေ၊ နန်ဟာ သူတပါးဟို့စီရင်ဘီး ကိုယ်တိုင်လည်း ကျူးလွန်နေမား! နန်ဟာ ဘုရားသခင် ရဲ့ တရားစီရင်ရှင်းဟုနေဘီး လွတ်မယ်ထန်နေလော။

4 အယ်မျိုးမှုဘဲနေဟာ နန်ဟာ ဘုရားသခင်ရဲ့ ကျေးဇူး ပြုဟူဇာဟာ နောက်ဒရဟို့တွပ် လမ်းပြပို့ဆောင်ပေးနေဇာ ဟို့ သိမှတ်ဘဲန ကီးမားဟူ ကရုဏာတော်န စီရယ်ရှင်းလေ၊ သီးခံတော်မှုရှင်းလေဟို့ ထီမဲ့မြင်ပြုနေလော။

5 အယ်ဘေမဲ့ နန်ဟာ စီခိုင်မာဘီး နောက်ဒရဘဲနေဟယ် ဆိုဟာ ဘုရားသခင်ရဲ့ မျစ်တော်ထန်ရှားဟူနေ၊ ဖြောင့်မတ်ဟူ တရားစီရင်မယ့်နေရစ်မာ ပိုဘီး ကီးလေးဟူ ပြစ်ဒန်ဟို့ ခံရလေ့မယ်။

6 ဘုရားသခင်ဟာ လူတိုင်းကျင့်ဟူ ကျင့်နထပ်တူ ကျိုးပြစ်ဟို့ ဆပ်ပေးတော်မူလေ့မယ်။

7 ကောန်းဟူ ကျင့်ဟို့ မြဲဒမ်းကျင့်ဘီး ဖောင်းသရေတော်၊ ဂေါင်သရေတော်န ဖော့-က်ပုလန်ပျစ်စီးရှင်းန ကင်းဟူဇာလေဟို့ ရှာဟူသူလေဟို့ ဘုရားသခင်ဟု ထာဝရသတ်ဟို့ ပေးတော်မူလေ့မယ်။

8 အယ်ဘေမဲ့ တကိုယ်ကောန်းဆန်ဘီး သမ္မာတရားဟို့ ကိုးစားနားထောန်ဘဲန တရားဘဲဟူ မူလေနေ့-က်ဟို့ လိုက်ဂေဟူသူလေဟာ ဘုရားသခင်ရဲ့ မျစ်တော်ဟို့ ခံရဂေလေ့မယ်။

9 ရင်ဦးဆောင်း ယုဒလူ၊ အယ်ဘီးန လူမျိုးခြားလေ ဒုစရိုက်ဟို့ ပြုဂေဟူ လူလေဂူလောင်းဟာ ပြင်းထန်ဟူ ဒေါက်

ခဝေဒနာလေဟ် ခံရဂေလေမယ်။

10 အယ်ဘေမဲ့ ရင်ဦးဆောင်း ယုဒလူ၊ အယ်ဘီးန လူမျိုးခြားလေ ကောန်းဟူ ကျင့်လေဟ် ကျင့်ဂေဟူ သူ လေ ဂူလောင်းဟာ ဖောင်းသရေတော်၊ ဂေါင်တော်န ငြိ သတ်ရှင်းဟ် ခံစားရလေမယ်။

11 ဘုရားသခင်ဟာ မျစ်နာလိုက်ဘဲန တရားစီရင်တော် မူလေဟယ်။

12 ပညတ်တရားဟ် သိဘဲန၊ ပြစ်ကျူးလွန်ဟူ သူရှိဟူ မျှဟာ ပညတ်တရားပါဘဲန ပျစ်စီးရလေမယ်။ ပညတ် တရားရှိရစ်န ပြစ်ကျူးလွန်သူလေဟာ၊ ပညတ်တရား အားဖြင့် စီရင်ရှင်းဟ် ခံရဂေလေမယ်။

13 လူဟာ ပညတ်တရားဟ် ကြားနာဟူမျှန ဘုရားသခင် ရှေ့တော်မာ ဖြောန်မတ် မှန်ကန်ဇာ မူဟာ။ ပညတ်တရား လေဟ် လိုက်ရှော့-က်ကျင့်သောင်းမှ ဘုရားသခင် ရှေ့ တော်မာ ဖြောန်မတ် မှန်ကန်ဟယ် ဆိုဘီး သိမှတ်ပြုဟူ ဇာဟ် ခံရဇာဖြစ်ဟယ်။

14 လူမျိုးခြားလေဟာ ပညတ်တရားဟ် ကျင့်ဘဲန၊ ပညတ်တရားဟ် သိဘဲန၊ ကိုယ့်ဇာသာ တရားဟ်ကျင့် ဂေဟူ ခီမာ အယ်မူတရားလေဟာ သူးနီလေတွပ် ပညတ် တရား ဖြစ်လာလေဟယ်။

15 ပညတ်တရားရဲ့ ပြဋ္ဌဌာန်းဟားဟူ ဇာလေဟာ အယ် သူလေရဲ့ နှလောင်းသားမာ ရေးဟားဟူကြောင်း သူးနီလေ ရဲ့ ပြုမူလေဟာ ထော့-က်ခံလေဟယ်။ သူးနီလေရဲ့ သိစိ

ဟုလည်း ထော့-က်ခံလေဟယ်။ ဖြားဖြစ်ကြောနဲ့နဲ့ဆိုဟာ သူးနို့လေရဲ့ စိန်လောင်းဟာ တခါတလေ သူးနို့ဟို ပြစ်တန် ဘီး တခါတလေလည်း သူးနို့ဟို ထော့-က်ခံဟူကြောနဲ့ ဖြစ်ဟယ်။

16 အယ်မူမူရာလေဟာ ငါဟောပြောဟူ ဒန်းကောန်း တိုင်း လူလေရဲ့ လျှို့ဝှက်ဟူ ကျင့်လေဟို ယေရှုခရစ်တော် အားဖြင့် ဘုရားသခင် စစ်ကြောစီရင်ဟူနေ့မာ ဖြစ်လေ့ မယ်။

ယုဒလူမျိုးလေန ပညတ်တရားကြောန်း

17 နန်ဟာ ကိုယ့်ကိုယ်ကိုယ် ယုဒလူမျိုးဖြစ်ဟယ် ဆိုဘီး ပညတ်တရားဟို ကိုးစားဘီး ဘုရားသခင်နှိုက် ဝါကြွားဟူ သူ၊

18 လိုတော်ဟိုသိဘီး၊ ပညတ်တရားရဲ့ သွန်သန်မှုဟို ခံ ယူပီးဘိဖြစ်ဟူကြောနဲ့ မြင့်မြတ်ဟူ ရာလေဟို ပိုင်းခြားသိ ရဲ့န၊

19 မျစ်စိကန်းဟူသူလေဟို လမ်းပြဟူသူ၊ မှောန်မိုက်ထဲ မာ နေဟူသူလေတွပ် လန်းရောန်ပေးဟူသူ၊

20 မိုက်ဟူသူလေဟို ဆောင်းမဟူသူ၊ သိနားလည်ဘဲဟူ သူလေရဲ့ ဆရာဖြစ်ဟူသူ၊ ပညတ်တရားအားဖြင့် ပညာန သမ္မာတရားဟို သိနားလည်ဟူသူ ဆိုဘီး ကိုယ့်ကိုယ်ကိုယ် ယောင်ကြည်ဟယ် ဆိုဟာ

21 သူများဟို သွန်သန်ဘီး ကိုယ့်ကိုယ်ကိုယ် သွန်သန်ဟု လော။ နန်ဟာ သူများဟို ခိုးဝှပ်န ဆိုဘီး သွန်သန်ဘီးဟာ

ဖြားဖြစ်ကြောန့် နန်ကိုယ်တိုင် ခိုးဝှပ်နေနူး။

22 အီထောန်ရေးဖော့-က်ပုလန်န ဆိုဘီး ဆောင်းမနေရဲ့ န နန်ကိုယ်တိုင် ဖော့-က်ပုလန်နေလော။ ရောက်ထုဟို ရှို့ ရှာရဲ့န ဗိမာန်တော်ဟို လုယူဖျစ်ဆီးရလော။

23 ပညတ်တရားဟို မှီပြုဘီး ဝါကြွားရဲ့န အယ်မူတရား ဟို လွန်ကျူးဘီး ဘုရားသခင်ရဲ့ ဂေါင်တော်ဟို ရှောက်ခ လနေလော။

24 ဖြားဖြစ်ကြောန့်နူးဆိုဟာ “လူမျိုးခြားလေဟာ နန်းနို့ လေရဲ့ ကျင့်ဟို ထော့-က်ဘီး ဘုရားသခင်ရဲ့ နာမတော် ဟို ကဲ့ရဲ့တတ်ဂေဟယ်” ဆိုဘီး ကျမ်းစာမာ ဖော်ပြဟား လေဟယ်။

25 နန်ဟာ ပညတ်တရားဟို လိုက်ရှော့-က်ဟူသူ ဖြစ် ဟယ် ဆိုဟာ နန်ရဲ့ ရေဖျားလှီးရှင်းဟာ ကျိုးရှိလေ့မယ်။ အယ်ဘေမဲ့ ပညတ်တရားဟို ကျူးလွန်ဟူသူ ဖြစ်ဟယ် ဆိုဟာ ရေဖျားလှီးရှင်းဟို ခံဘဲန နေဇာဟု ပိုဘီး ကောန်း လေ့မယ်။

26 အယ်မျိုးမူဘဲနေဟာ ရေဖျားလှီးရှင်းဟို ခံဘဲဟူသူ လူမျိုးခြား တယော့-က်ဟာ ပညတ်တော်မာပါဟူ တရား လေဟို လိုက်ရှော့-က် ကျင့်သောင်းဟယ် ဆိုဟာ အယ်သူ ဟို ရေဖျားလှီးရှင်းဟို ခံယူဟူသူ ဆိုဘီး မှတ်ယူမယ် မူဟု လော။

27 ရေဖျားလှီးရှင်းဟို ခံဘဲဟူသူဟာလည်း ကိုယ်လို တိုင်း ပညတ်တရားဟို ကျင့်မယ် ဆိုဟာ ကျမ်းစာန ရေ ဖျားလှီးရှင်း ရှိရစ်န ပညတ်တရားဟို လွန်ကျူးဟူ နန်ဟို

တရားစီရင်ဘီး ရှောင်းခံစေမယ် မှဟုလော။

28 ဇာတိအားဖြင့် ယုဒလူမျိုးဖြစ်ဟူသူဟာ ယုဒလူမှန် မှဟု၊ အယ်မျိုးဘဲ ဇာတိအားဖြင့် ကိုယ့်သားမာ ရေဖျားလှီး ဇာဟုလည်း ရေဖျားလှီးရှင်းမှန် မှဟု။

29 တွင်းသဘောအားဖြင့် ယုဒလူမျိုးဖြစ်ဟူသူဟာဘဲ ယုဒလူမျိုးမှန်ဖြစ်ဘီး ကျမ်းဟောင်းတရားမှဘဲနဲ့ ဝိညာဉ်တော်အားဖြင့်ဘဲဖြစ်ဟူ စိန်လောင်းရဲ့ ရေဖျားလှီးရှင်းဟာဘဲ ရေဖျားလှီးရှင်းမှန် ဖြစ်ဟယ်။ အယ်မျိုးသူဟို လူလေနားဟူမှဘဲနဲ့ ဘုရားသခင်နားဟုနေဘီး ချီးမွမ်းဟူဇာဟို ခံရလေဟယ်။

3

1 အယ်မျိုးဆိုဟာ ယုဒလူမျိုးဟု ဖယ်မျိုးသာလွန်ဘီး ထူးခြားနူး။ သူးနို့လေ ရေဖျားလှီးဟူဇာအားဖြင့် ဖြားကျိုးရှိကြောနူး။

2 ဖတ်ဖတ်မာ ကျိုးဘောင်ဂီးရှိဟယ်! ပထမနေနဲ့ ယုဒလူမျိုးလေဟာ ဘုရားသခင်ရဲ့ ဗျာဒိတ်တော်ဟို ယောင်ကြည်ခံယူဂေဟယ်။

3 အယ်ဘေမဲ့ သူးနို့လေထဲမာ တချို့လူလေ ယောင်ကြည်ဘဲနေဇာဟို ဖယ်မျိုးပြောရဟိုနူး။ ဘုရားသခင်ရဲ့ သစ်စာတော်ဟာ သူးနို့ ယောင်ကြည်ဘဲဟူကြောနဲ့ ပျစ်ပြယ်ဟူးဟိုလော။

4 ဖယ်မျိုးလည်း ပျစ်ပြယ်နိုင်ဟု! လူလေဟာ ဖြောန့်မတ်ဟန်ဆောန့်ဘီး လီလယ်ဂေဟူ လည်းဘဲ ဘုရားသခင်

ရဲ့ ဖြောင့်မတ်ရှင်းဟာ မြဲဒမ်းဘဲ တည်နေမယ် ဖြစ်ဟယ်။
ကျမ်းစာလာဟူဇာဟု
“ကိုယ်တော် မိန့်တော်မူဟူ စကားတော်ဟာ မှန်ကန်လှပါ
ဟယ်။

တရားစီရင်တော်မူဟူ ခီမာ အောင်မြင်ရမယ်” ဆိုဘီး
ဖော်ပြဟားဟူတိုင်းဘဲ ဖြစ်ပါဟယ်။

⁵ အယ်ဘေမဲ့ နို့လေရဲ့ တရားဘဲဟူမူဟု ဘုရားသခင်
ရဲ့ ဖြောင့်မတ်မှန်ကန်ရှင်းဟို့ ပိုဘီး ထန်ရှားစေဟယ် ဆို
ဟာ ဖယ်မျိုးပြောရမယ်နူး။ ဘုရားသခင် ပြစ်ပေးဇာဟို့
လူသားတယော့-က်နေန တရားဟု ဆိုဘီး ပြောဟို့ရကြော
န့်လော။ (အယ်မျိုး ငါပြောဇာဟု လူလေ ပြောဆိုလေ့ရှိဟူ
တိုင်း ငါပြောဇာဖြစ်ဟယ်။)

⁶ အယ်မျိုးမူဟု။ အယ်မျိုးဆိုဟာ ဘုရားသခင်ဟာ
အယ်လောကဟို့ ဖယ်မျိုး တရားစီရင်နိုင်မယ်နူး။

⁷ အယ် ဘေမဲ့ ငါဟာ သစ်စာ ပျစ်ဟူဇာ အားဖြင့်
ဘုရားသခင် ရဲ့ သမ္မာတရားဟာ ဖောင်းသရေတော်
တိုးပွားထန်ရှားစေဟယ် ဆိုဟာ ဖြားဖြစ်ကြောန့် ငါဟို့ ပြစ်
ကျူးလွန်သူနေန ပြစ်ဒန်စီရင်ရသေးနူး။

⁸ “ကောန်းဟူကျိုးလေ သတ်ရော့-က်လာဟို့တွပ် ကော
န်းဘဲဟူကျင့်လေဟို့ ကျင့်ဂေဇို့” ဆိုဘီး ပြောရဟို့လော။
အယ်မျိုး ငါပြောဟယ်ဆိုဘီး တချို့လူလေဟာ ပြစ်တန်
စွပ်စွဲဘီး ငါဟို့ကဲ့ရဲ့ဂေဟယ်။ အယ်သူလေဟာ ပြစ်ဒန်
စီရင်ဇာဟို့ ခံထိုက်ဟူမျှလော့-က် ခံရဂေလေ့မယ်။

ဖြောင့်မတ်ဟူသူ ယော့-က်လည်းမဲ့ဘဲဟူကြောင်း

⁹ အယ်မျိုးဆိုဟာ နို့ယုဒလူမျိုးလေဟာ လူမျိုးခြားလေထတ် ပိုဘီး ကောင်းမြတ်ကြောင့်လော။ လောင်းဝမှုဟု!* ယုဒလူမျိုးဘဲဖြစ်ဖြစ်၊ လူမျိုးခြားလေဘဲဖြစ်ဖြစ် လူလေ ဂူလောင်းဟာ ပြစ်ရဲ့တဂိုးအော့-က်မာ ရှိဟယ် ဆိုဇာဟို ငါဖော်ပြပီးဘီ။

¹⁰ ကျမ်းစာတော်ဟု၊

“ဖြောင့်မတ်ဟူသူ မဲ့ဟု တယော့-က်လည်းမဲ့ဟု၊

¹¹ သိနားလည်သူ မဲ့ဟု၊

ဘုရားသခင်ဟို ရှာဟူသူ မဲ့ဟု။

¹² လူလေ ဂူလောင်းဟာ လမ်းလွဲဟားဂေ့ဘီ။

တပေါင်ဇံဒဲ သောင်းရဘဲဟူသူလေ ဖြစ်ဂေ့ဘီ။

ကောင်းဟူကျင့်ဟို ကျင့်ဟူသူမဲ့ဟု၊ တယော့-က်လည်း မဲ့ဟု။

¹³ သူးနှိုလေရဲ့ လည်ခေါင်းဟာ ဖွမ်ဟားဟူ သန်းခလိုင်းတွမ်း ဖြစ်ဟယ်။

သူးနှိုလေဟာ လျာန လှည့်ဇားတတ်ဂေ့လေဟယ်။

သူးနှိုဇပ်ပေါ့-က်မာလည်း ဗွီဆိုးဆိလေ ရှိလေဟယ်။

¹⁴ သူးနှိုလေဟာ ကီဆဲဟူစကားလေ၊ ခါးသီးဟူစကားလေန ပုလဲဝဂေ့လေဟယ်။

* **3:9 ၃၉** လူမျိုးခြားလေထတ် ပိုဘီး ကောင်းမြတ်ကြောင့်လော။ လောင်းဝမှုဟု! အယ်မျိုးမှုဘဲနေဟာ လူမျိုးခြားလေထတ် ပိုဘီး ဆိုးကြောင့်လော။ လောင်းဝမှုဟု!

15 သူ့နှိုလေရဲ့ ခေလတ်ဟာ လူ့သတ်ဟို့ သတ်ဟို့ ရရာ
တိုင်း ဖြန်ဆန်ဂေဟယ်။

16 သူ့နှို သွားဟူလမ်းနှိုက် ပျစ်စီးမှုလေန ဒေါက်ခ
ဆင်းရဲလေရှိဟယ်။

17 ငြိသတ်ရှင်းလမ်းဟို့ သူ့နှိုလေ သိဂေဟယ်။

18 သူ့နှိုရဲ့ မျစ်စိမာ ဘုရားသခင်ဟို့ ကြော့-က်ရှုံ့မှု
မွေဟဲ့” ဆိုဘီး ကျမ်းစာလာဟူ တိုင်းဘဲ ဖြစ်လေ
ဟယ်။

19 ပညတ်တရားအားဖြင့် တားမြစ်ဟားဟူ ကြောန်းရာ
လေဟာ ပညတ်တရားအော့-က်မာ ရှိနေဟူ လူလေ အား
လောင်းတွပ် ဖြစ်ဟူဇာဟို့ ခု နှိုလေသိဂေဘီး။ အယ်ကြော
န့် လောကသား ဂူလောင်းဟာ ဇပ်ပေါ့-က်အားလောင်း ပိ
ခံရဘီး ဘုရားသခင် ရှေ့တော်မာ တရားစီရင်ဇာဟို့ ခံရ
ဟို့တွပ် ဖြစ်လေဟယ်။

20 အယ် ကြော န့် ပညတ် တရား ရဲ့ ကျင့် အားဖြင့်
ဘုရားသခင်ရှေ့တော်မာ ဖယ်လူလည်း ဖြောန့်မတ်ရာဟို့
ရော့-က်နိုင်ဟဲ့။ ဖြားဖြစ်ကြောန့်နူးဆိုဟာ ပညတ်တရား
အားဖြင့် နှိုလေမာ ပြစ်ရှိဟူကြောန်းဟို့ သိစေဟို့တွပ်ဘဲ
ဖြစ်လေဟယ်။

ဘုရားသခင်ရှေ့တော်မာ ဖယ်မျိုးအားဖြင့်ဖြောန့်မတ်
ဟူကြောန်း

²¹ ခုမာ မောရှေရဲ့ ပညတ်ကျမ်းနဲ့ ပရောဖက်ကျမ်းလေးဟာ သတ်သေခံယူတိုင်း၊ ပညတ်တရားရဲ့ ကျင့်နဲ့ လောင်းဝစပ်ဆိုင်ဘဲဟာ ဘုရားသခင်ရဲ့ ဖြောင့်မတ်ဟူတရားဟာ ထန်ရှားလေဘိ။

²² ယေရှုခရစ်တော်ဟို့ ယောင်ကြည် ဟူဇာအားဖြင့် ယောင်ကြည် ဟူသူလေထတ်မာ သတ်ရော့-က်စေဟူ ဘုရားသခင်ရဲ့ ဖြောင့်မတ်ရှင်း ဖြစ်ဟယ်။ လူလေဟာ ခြားနားမှု လောင်းဝမှုဟု။

²³ ဖြားဖြစ်ကြောနဲ့ဆိုဟာ လူလေ ဂူလောင်းဟာ ပြစ်ကျူးလွန်ဘီး ဘုရားသခင်ရဲ့ မျစ်မှော့-က်တော်နဲ့ ဝီးကွာဟားဂေ့ဘိ။

²⁴ အယ်ဘေမဲ့ ယေရှုခရစ်တော်ရဲ့ ဝီးကော့-က်ရှင်းအားဖြင့် ဖိုးခပေးဇာလိုဘဲဟူ ဘုရားသခင်ရဲ့ ကျေးဇူးတော်ကြောနဲ့ ဖြောင့်မတ်ရာဟို့ ရော့-က်ရဂေ့ဟယ်။

²⁵ ဘုရားသခင်ဟာ သူ့ရဲ့ ဖြောင့်မတ်ရှင်းဟို့ ထန်ရှားစေဟို့တွပ် ခရစ်တော်ဟို့ ခန့်ဟားဘီး ယောင်ကြည်ရှင်းတွပ် ခရစ်တော်ရဲ့ သွီးတော်ဟို့† သနားခံယူပူဇော်သကာ ဖြစ်စေတော်မူဟယ်။ တနည်းအားဖြင့် စိရယ်သီးခံဘီးဟာ လွန်လာဘီးဟူ ပြစ်လေဟို့ မှုထားဘဲနဲ့ နေတော်မူဟယ်။

²⁶ ခုကာလမာ သူ့ရဲ့ ဖြောင့်မတ်ရှင်းတရားဟို့ ထန်ရှားစေဟို့တွပ်နဲ့ ဘုရားသခင်ကိုယ်တိုင် ဖြောင့်မတ်ရှင်းရဲ့

3:22 ၃.၂၂ ဂလာ ၂.၁၆ † **3:25 ၃.၂၅** ခရစ်တော်ရဲ့ သွီးတော်ဟို့၊ အယ်မျိုးမှုဘဲနဟာ ခရစ်တော်ရဲ့ သေခံရှင်းအားဖြင့်။

သခင် ဖြစ်ဟူကြောင်း ယေရှုတို့ ယောင်ကြည်ဟူသူတို့
 ပြောန့်မတ်ဟူသူ ဖြစ်ဟုယ် ဆိုဘီး သိမှတ်ပြုဟူတွပ် ဖြစ်
 ဟုယ်။

27 အယ်မျိုးဆိုဟာ ဝါကြွားရဟူကြောင်းဟု ဖယ်မာရှိ
 သေးနူး။ နို့လေ ဝါကြွားဟူကြောင်း မေ့ဟု။ ပယ်လိုက်ဘီ။
 ဖယ်တရားန ပယ်နူး။ ပညတ်တရားအားဖြင့် ပယ်ဟူဇာ
 လော။ မှုဟု။ ယောင်ကြည်ရှင်းတရားန ပယ်လိုက်ဟူဇာ
 ဖြစ်ဟုယ်။

28 အယ်ကြောန့် လူဟာ ပညတ်တရားနဆိုင်ဟူ ကျင့်
 အားဖြင့်မှုဘဲ ယောင်ကြည်ရှင်းအားဖြင့် ပြောန့်မတ်ဟုယ်
 ဆိုဘီး သိမှတ်ပြုဟူဇာဟူ နို့လေခံရဂေဟုယ်။

29 ဘုရားသခင်ဟု ယုဒလူမျိုးလေရဲ့ ဘုရားဘွဲ့ဖြစ်ဟူ
 ဇာလော။ လူမျိုးခြားလေရဲ့ ဘုရားလည်းဖြစ်ဟုယ် မှုဟု
 လော။ အယ်ဘဲ လူမျိုးခြားလေရဲ့ ဘုရားလည်းဖြစ်လေ
 ဟုယ်။

30 ယောင်ကြည်ရှင်းအားဖြင့် ရေဖျားလှီးရှင်းခံဟူသူတို့
 ပြောန့်မတ်ဟုယ် ဆိုဘီး သိမှတ်ပြုတော်မူဟူ ဘုရားသခ
 င်ဟု ရေဖျားလှီးရှင်းခံရဘဲသူတို့လည်း ယောင်ကြည်ရှင်း
 အားဖြင့် ပြောန့်မတ်ဟုယ်ဆိုဘီး သိမှတ်ပြုပေးဟူ ဘုရား
 သခင်ဟာ တပါးဒဲဘဲ ရှိတော်မူဟုယ်။

31 အယ် မျိုး ဆိုဟာ နို့လေ ဟာ ယောင် ကြည် ရှင်း
 အားဖြင့် ပညတ်တရားဟူ ပယ်ဂေဟူဇာလော။ လောင်း

၀ ပယ်ဟု၊ ပိုဘီး တည်စေဂေဟယ်။

4

အာဗြဟံရဲ့ ယောင်ကြည်မှုစံနမူနာကြောင်း

¹ အယ်မျိုးဆိုဟာ နို့လေရဲ့ဖ အာဗြဟံဟာ ဇာတိအားဖြင့် ဖယ်မူကျိုးဟိုရနူး။

² အာဗြဟံဟာ ကျင့်အားဖြင့် ဖြောင့်မတ်ရာဟို ရှေး-က်ဟယ် ဆိုဟာ ဝါကြွေးဟို့ကြောင်းရှိဟယ်။ အယ်ဘေမဲ့ဘုရားသခင်ရဲ့ရှေ့တော်မာ အယ်မျိုး မူဟု။

³ ကျမ်းစာမာ လာဟူဇာဟု “အာဗြဟံဟာ ဘုရားသခင်ဟို့ ယောင်ကြည်ဟူကြောန့် အယ်မူယောင်ကြည်ရှင်းဟို့ သူရဲ့ ဖြောင့်မတ်ရှင်းဖြစ် လတ်ခံတော်မူလေဟယ်” ဆိုဘီး ပြောဟူးလေဟယ်။

⁴ လောက်လောက်ဟူကြောန့် ရဟူခဟာ ကျေးဇူးပြုဟူကြောန့် ရဟူခ မှဘဲန ရသင့်ရထိုက်ဟူကြောန့် ရဟူဇာဖြစ်ဟယ်။

⁵ အယ်ဘေမဲ့ ကျင့်မေ့ဘဲသူဟာ တရားဘဲဟူ သူရဲ့ပြစ်ဟို့ ဖြေပေးဟူ ဘုရားသခင်ဟို့ ယောင်ကြည်ဟယ် ဆိုဟာ သူရဲ့ ယောင်ကြည်ရှင်းဟို့ ဖြောင့်မတ်ရှင်း ဆိုဘီး သတ်မှတ်တော်မူဟယ်။

⁶ အယ်မျိုးဘဲ ဒါဝိဒ်ဟုလည်း ဘုရားသခင်ဟာ ကျင့်ဟို့ ထော့-က်ဘဲန ဖြောင့်မတ်ဟူသူဖြစ် သတ်မှတ်ရှင်းဟို့ ခံရဟူသူလေရဲ့ မင်္ဂလာဟို့ ပြောဆိုဟူ ခီမာ

7 “ပြစ်ဟုလွတ်ဟူခွင့်နှင့် ဒုစရိုက်ပြစ်လေဟူ၍
 ဖောင်းအောက်ခံရဟူသူလေဟာ မင်္ဂလာရှိလေဟုယ်!

8 ဘုရားသခင် ပြစ်တန်ဇာဟုနေဘီး လွတ်ဟူသူလေဟာ
 မင်္ဂလာရှိလေဟုယ်!” ဆိုဘီး ပြောဆိုလေဟုယ်။

9 ဒါဝိဒ်ပြောဟူမင်္ဂလာဟူ၍ ရေဖျားလှီးရှင်းဟူ၍ ခံဟူသူ
 လေဘဲ ရဂေဇာလော။ ရေဖျားလှီးရှင်းဟူ၍ ခံရဘဲသူလေ
 လည်း ရဂေဇာလေဟုယ်။ ဖြားဖြစ်ကြောန့်နူးဆိုဟာ “အာ
 မြဟံရဲ့ ယောင်ကြည်ရှင်းဟူ၍ ဖြောန့်မတ်ရှင်းဖြစ် လတ်ခံ
 တော်မူလေဟုယ်။”

10 ဖယ်ခီမာ သတ်မှတ်ခံရနူး။ ရေဖျားလှီးရှင်းဟူ၍ ခံ
 ဘီးမှလော။ အယ်မျိုးမှုဘဲနေဟာ ရေဖျားလှီးရှင်းဟူ၍ ခံ
 ခန်လော။ ခံဘီးမှ သတ်မှတ်ဟူဇာ မူဟု။ ခံယူခန်မာ
 သတ်မှတ်ခံရရှင်း ဖြစ်ဟုယ်။

11 အယ်မျိုး လတ်ခံတော်မူဘီးမှ အာမြဟံဟာ ရေ
 ဖျားလှီးရှင်းဟူ၍ ခံရလေဟုယ်။ အယ်မူ ရေဖျားလှီးရှင်း
 ဟု ဘုရားသခင်ဟာ အာမြဟံရဲ့ ယောင်ကြည်ရှင်းဟူ၍
 ထော့-က်ဘီးဟာ ရေဖျားလှီးရှင်းဟူ၍ ခံယူခန်ဟု ဖြောန့်မ
 တ်ဟူသူဖြစ် လတ်ခံပေးတော်မူဟူ ကြောန့်ဟူ၍ သတ်သေ
 ပြပေးဟူ မှတ်လတ်ခဏာဘဲ ဖြစ်လေဟုယ်။ အယ်ကြောန့်
 အာမြဟံဟာ ရေဖျားလှီးရှင်းဟူ၍ ခံဘဲဟူလည်းဘဲ ယောင်
 ကြည်ရှင်းအားဖြင့် ဖြောန့်မတ်ဟူ သူဖြစ်န ဘုရားသခင်
 လတ်ခံပေးတော်မူဟူ သူလေဂူလောင်းရဲ့ ဖဖြစ်လာလေ
 ဟုယ်။

12 တနည်းအားဖြင့် အာဗြဟံဟာ ရေဖျားလှီးရှင်းဟို့ ခံဟူသူလေရဲ့ ဖ ဖြစ်စေဟို့တွပ်န ရေဖျားလှီးရှင်းဟို့ ခံဟူသူလေနမကဘဲ ရေဖျားလှီးခန်ကဒဲဟု နို့လေရဲ့ ဖ အာဗြဟံ နှိုက်ရို့ဟူ ယောင်ကြည်ရှင်းခေရာဟို့ လိုက်လျော့-က်ဟူသူလေရဲ့ ဖလည်း ဖြစ်စေဟို့တွပ် ဖြစ်ဟယ်။

ယောင်ကြည်ရှင်းအားဖြင့် ကဒိတော်ဟို့ ခံစားရဟူကြောန်း

13 ဘုရားသခင်ဟာ အာဗြဟံန သူရဲ့ သားမှလေးလေဟို့ အယ်လောကဟို့ မွီခံစေမယ် ဆိုဘီး ဂဒိပေးဟူ ခီမာ အာဗြဟံဟု ပညတ်တရားဟို့ နာခံရှင်းကြောန်းမှဘဲန ဘုရားသခင်ဟို့ ယောင်ကြည်ဘီး ရဟူ ဖြောန်းမတ်ရှင်းကြောန်း ဖြစ်ဟယ်။

14 တကယ်ဟူကြောန်း ပညတ်တရားဟို့ ကျင့်ဂေဟူသူလေဘဲ ဂဒိတော်ဟို့ ခံစားရမယ် ဆိုဟာ ဘုရားသခင်ဟို့ ယောင်ကြည်ဟူဇာဟာ ဓိပါယ်မေ့ဘဲန ဂဒိတော်ဟုလည်း ချည်းနှီးသတ်သတ်ဘဲ ဖြစ်ဟူးလေ့မယ်။

15 ပညတ်တရားဟာ မျစ်ဒေါသဟို့ ဖြစ်စေဟယ်။ အယ်ဘေမဲ့ ပညတ်တရားမေ့ဘဲနေဟာ ပြစ်ရဲ့ သဘောသဘာဝဟို့လည်း သိဟို့မဟု လွန်ကျူးဟူလည်းဘဲ ရေးယူဟို့မရဟို့။

16 အယ်မျိုးဖြစ်ကြောန်း ဂဒိတော်ဟာ ယောင်ကြည်ရှင်းနဘဲ ဆိုင်လေဟယ်။ အယ်မူ ဂဒိတော်ဟို့ ကျေးဇူးတော်

အားဖြင့်ဘဲ ဖြစ်စေဘီး ပညတ်တရားဟို နာခံကျင့်သော
င်းဟူ သူလေတွပ်ဘဲကဘဲန အာဗြဟံရဲ့ ယောင်ကြည်ရှင်း
န ဆိုင်ဟူ မျိုးနွယ်လေန သားစဉ်မှလေးဆစ်လေ အား
လောင်းလေတွပ် ဆုလတ်ဆောက်ဖြစ် တည်မြဲစေဘီး အာမ
ခံဟားလေဟယ်။ ဖြားဖြစ်ကြောန်းနဲ့ဆိုဟာ အာဗြဟံဟာ
နို့လေ ဂူလောင်းရဲ့ ယောင်ကြည်ရှင်းဖခင် ဖြစ်ဟူကြောန်
ဖြစ်ဟယ်။

17 “ငါဟာ နန့်ဟို လူမျိုးအားလောင်းလေရဲ့ ဖ ဖြစ်စေ
ဘီ” ဆိုဘီး ကျမ်းစာမာ ဖော်ပြဟားတိုင်း အာဗြဟံဟာ
သူယောင်ကြည်ဟူ ဘုရားဖြစ်ဟူ၊ သေနလူလေဟို သ
တပုလန်ရှင်စေဟူ ဘုရား ဖြစ်လာသေးဘဲဟူ ရာလေဟို
ဖြစ်လာအောက် မိန့်ပေးနိုင်ဟူ ဘုရားသခင် ရှေ့တော်နှိုက်
နို့လေ ဂူလောင်းရဲ့ဖ ဖြစ်တော်မူဟယ်။

18 အာဗြဟံဟာ မျှော်လင့်ဇာ ကြောန်းရာလေ မေ့ဘဲ
ဟူ ခြေနေမာ ဘုရားသခင်ဟို မျှော်လင့် ယောင်ကြည်ဟူ
ကြောန် “နန့်ရဲ့ မျိုးနွယ်ဟာ ကြယ်လေမျိုးဘဲ ရေတွပ်နိုင်
ဘဲနေအောက် များပြားလေမယ်” ဆိုဘီး မိန့်မှာခံရဟူတိုင်း
ရရာတိုင်း များဟူ လူမျိုးလေရဲ့ဖ ဖြစ်လာလေဟယ်။

19 အာဗြဟံဟာ သူ့သတ်ဟာ ၁၀၀ လော့-က်ရှိဟူကြော
န့် သူ့ကိုယ်ခန့်ဓာဟာ သေဖြစ်နေကြောန်းဟို သိဘီး သူ
မယား စာရာဟာလည်း သားရနိုင်ဘဲဟူ ဇာဟို သိဟူလ
ည်းဘဲ ဘုရားသခင်ဟို စီခလယောင်ကြည်လေဟယ်။

20 ဘုရားသခင်ရဲ့ ဂဒိတော်ဟို သံသယမေ့ဘဲန ယောင်

ကြည်မှု အားကီးဘီးဟာ ဘုရားသခင်ရဲ့ ဂေါင်တော်ဟို့ ချီးမွမ်းဘီး

21 ဂဒိပေးဟူ ဘုရားသခင်ဟာ ဂဒိတော်တိုင်း တတ်စွမ်း နိုင်ဟယ် ဆိုဇာဟို့ ကြွင်းမဲ့ သူယောင်ကြည်လေဟယ်။

22 အယ်ကြောန့် အယ်ယောင်ကြည်ရှင်းဟို့ သူရဲ့ ဖြောန့် မတ်ရှင်းဖြစ် လတ်ခံတော်မူဟယ်။

23 အယ်ဘေမဲ့ “သူဟို့ ဖြောန့်မတ်ဟူသူဖြစ် လတ်ခံ တော်မူဟယ်” ဆိုဘီး မိန့်တော်မူဟူ ကျမ်းစကားတော်ဟာ သူတုပ်လော့-က်ဘဲ့ မူဟူ။

24 နို့လေတွပ်လည်း ရေးဟားလေဟယ်။ ဖြားဖြစ်ကြော န်နူးဆိုဟာ သခင်ယေရှုဟို့ ရှင်ပုလန်ထမြော့-က်စေဟူ ဘုရားသခင်ဟို့ နို့လေ ယောင်ကြည်ဟူကြောန့် နို့လေရဲ့ ယောင်ကြည်ရှင်းဟို့ ဖြောန့်မတ်ဟယ် ဆိုဘီး လတ်ခံတော် မူဟူကြောန့် ဖြစ်လေဟယ်။

25 အယ်သခင်ဟာ နို့လေ ကျူးလွန်ဟူ ပြစ်လေကြောန့် အပ်ဇာဟို့ ခံရဘီး နို့လေ ဖြောန့်မတ်ဟို့တွပ် ထမြော့-က် တော်မူလေဟယ်။

5

ယောင်ကြည်ရှင်းအားဖြင့် ဘုရားသခင်နှိုက်ငြီသတ် ရှင်း

1 အယ်ကြောန့် ယောင်ကြည်ရှင်းအားဖြင့် ဖြောန့်မတ် ဟယ် ဆိုဘီး သိမှတ်ပြုခံရဟူ နို့လေဟာ သခင်ယေရှု

ခရစ်တော်အားဖြင့် ဘုရားသခင်ရဲ့ ငြိသတ်ရှင်းဟို့ ရရှိဂေဟယ်။*

² အယ်သခင်ဟို့ နို့လေယောင်ကြည်ဂေကြောန့် အယ်မျိုး ကျေးဇူးတော်ဟို့ ခံစားရဟူဇာ ဖြစ်ဟယ်။ အယ်ကြောန့် ဘုရားသခင်ရဲ့ ဖောင်းသရေတော်ဟို့ မျှော်လင့်ဘီးဟာ နို့လေ ဝါကြွားဘီး ဝမ်းမြော-က်ဂေဟယ်!†

³ အယ်လော့-က်နကဟု ဆင်းရဲဒေါက်ခလေနှိုက်လည်း ဝါကြွားဝန်းသာမှုရှိဂေဟယ်။ ဖြားဖြစ်ကြောန့်နူးဆိုဟာ ဆင်းရဲဒေါက်ခလေဟာ သီးခံရှင်းဟို့ ဖြစ်စေကြောန့် ဖြစ်ဟယ်။

⁴ သီးခံမှုဟာ ခံနိုင်ရည် ခွန်အားဟို့ရဘီး ဘုရားသခင်ရဲ့ မျစ်နာသာဟို့ ပိုဘီး ခံစားရလေဟယ်။ ဘုရားသခင်ရဲ့ မျစ်နာသာဟုလည်းဘွဲ မျှော်လင့်ရှင်းဟို့ တိုးပွားစေဟယ်။

⁵ အယ်မျှော်လင့်ရှင်းဟုလည်း ယှစ်ကြော-က်စိပျစ်မှုလေန လွတ်ကင်းစေဟယ်။ ဖြားဖြစ်ကြောန့်နူးဆိုဟာ နို့လေဟို့ပေးသနားတော်မူဟူ သန်ရှင်းဟူဝိညာဉ်တော်ဟာ ဘုရားသခင်ရဲ့ မြစ်တာတော်ဟို့ နို့လေရဲ့နှလုံးသားထဲဟို့ သွန်းလောင်းပေးတော်မူဟူကြောန့် ဖြစ်လေဟယ်။

⁶ နို့လေဟာ ကျိုးနဲဖြစ်နေခီဗာ ခီတန်မှ ခရစ်တော်ဟာ တရားဘဲဟူ သူလေတွပ်ကြောန့် သေခံတော်မူဟယ်။

⁷ ဖြောန့်မတ်ဟူ သူလေတွပ်ကြောန့် သေခံပေးဟို့သူ ရှိ

* **5:1 ၅.၁** ရရှိဂေဟယ်၊ တချို့ မူရင်းလတ်ရေးမူလေဗာ နို့လေဗာရှိပါစေ၊ ဆိုဘီး ပါရှိဟယ်။ † **5:2 ၅.၂** နို့လေ ဝါကြွားဘီး ဝမ်းမြော-က်ဂေဟယ်၊ အယ်မျိုးမူဘဲနေဟာ နို့လေ ဝါကြွားဂေဇို့။

ဟို့ခဲယဉ်းဟယ်။ သူတော်ကောင်းတွပ်ကြောန့် သေခံရဲဟူ သူလေ ရှိရှင်ဟာရှိလေ့မယ် မှန်စေဝေါ။

8 အယ်ဘေမဲ့ နို့လေပြစ်ရှိနေဟူ ခီမာဘဲ ခရစ်တော်ဟာ နို့လေတွပ် သေခံတော်မူဟူဇာအားဖြင့်၊ ဘုရားသခင်ဟာ နို့လေဟို့ ဖယ်မျှလော့-က် ရှစ်နူးဆိုဇာဟို့ ထန်းထန်ရှား ရှား ဖော်ပြတော်မူလေဟယ်!

9 အယ်ကြောန့် ခုခီမာ ခရစ်တော်ရဲ့ သွီးတော်အားဖြင့်[‡] ဖြောန့်မတ်ဟယ် ဆိုဘီး သိမှတ်ပြုခံရဟူ နို့လေဟာ ကိုယ်တော်အားဖြင့် ဘုရားသခင်ရဲ့ မျစ်တော်ဟုနေ ပိုဘီး ကယ်တန်ခံရလေ့မယ်!

10 ဖြားဖြစ်ကြောန့်နူးဆိုဟာ နို့လေဟာ ဘုရားသခင်ရဲ့ ရန်သူလေ ဖြစ်ဂေဟူလည်းဘဲ ကိုယ်တော်ဟာ သားတော် ဟို့ သေခံစေရှင်းအားဖြင့် နို့လေဟို့ သူရဲ့မိဆွေလေ ဖြစ် စေတော်မူဟယ်။ ခု နို့လေဟာ ဘုရားသခင်ရဲ့ မိဆွေလေ ဖြစ်ဂေဟူကြောန့် ခရစ်တော်ရဲ့ သတ်တော်အားဖြင့် ကယ် တန်ရှင်းကျေးဇူးဟို့ ပိုဘီး ဟာ ခံရဂေလေ့မယ်!

11 အယ်လော့-က် နမကဘဲ မိတ်သဟာယဖွဲ့ရှင်းခွမ် န ကျေးဇူးတော်ဟို့ ခုခံစားစေဟူ၊ နို့လေသခင် ယေရှု ခရစ်တော်အားဖြင့် ဘုရားသခင်နှိုက် ဝါကြွေးဝန်းသာရှင်း ရှိဂေလေဟယ်။

အာဒိန ခရစ်တော်ဟို့ နှိုင်းယှဉ်ဟူကြောန့်

[‡] 5:9 ၅.၉ ခရစ်တော်ရဲ့ သွီးတော်အားဖြင့်၊ အယ်မျိုးမူဘဲနေဟာ ခရစ်တော်ရဲ့ သေခံတော်မူရှင်းအားဖြင့်။

12 အယ်မူကြောင်းရာဟု ပြစ်တရားဟာ လူတယော့-က် အားဖြင့် အယ်လောကထဲဟို့ ဝမ်ရော့-က်လာဘီး၊ အယ် ပြစ်တရားအားဖြင့် သေရှင်းတရား ဝမ်ရော့-က်လာဘီး လူလေ ဂူလောင်းဟာ ပြစ်ရှိဟူကြောန့် သေဂေရလေဟု ယ်။

13 ပညတ်တရားဟို့ ပေးခန်ကဒဲဟု အယ်လောကမာ ပြစ်ရှိဟူဇာ ဖြစ်ဟယ်။ ဖယ်ပညတ်တရားမှ မှော့ဘဲနေဟာ ပြစ်ရှိဟယ် ဆိုဘီး မှတ်ယူဟို့ကြောင်း မှော့ဟု။

14 အယ်ဘေမဲ့ သေရှင်းတရားဟာ အာဒံ လတ်ထတ်ဟု နေစဘီး မောရှေ လတ်ထတ်ထိ လူလေ ဂူလောင်းဟို့ စိုးရ လေဟယ်။ အာဒံ ပြစ်မှားဟူမျိုး ပြစ်မှားဘဲဟူ သူလေဟို့ လည်း စိုးရလေဟယ်။

အယ်မူအာဒံဟာ နှော့-က်ကြွလာမယ့်သူရဲ့ ပေါင်ပမာ ဖြစ်လေဟယ်။

15 အယ်ဘေမဲ့ ပြစ်မှားဟူ သဘောန ကျေးဇူးတော် သဘောတူဟု။ ဖြားဖြစ်ကြောန့်နဲ့ဆိုဟာ တယော့-က် သောသူ အာဒံ ပြစ်ကျူးလွန်ဟူကြောန့် လူလေ ဂူ လောင်း သေရဟယ် ဆိုဟာ တယော့-က်သောသူ ယေရှု ခရစ်တော်အားဖြင့် ဘုရားသခင်ရဲ့ ကျေးဇူးတော်ကြောန့် ကျေးဇူးတော်ရဲ့ ကျိုးဟို့ လူလေ ဂူလောင်းနှိုက် ပိုဘီး ကြွယ်ဝပုလဲဇောင်လေဟယ်။

16 နှော့-က်ဘီး လူတယော့-က် ပြစ်မှားဟူဇာန ကျေးဇူး တော်ဟာ တူဟု။ ဖြားဖြစ်ကြောန့်နဲ့ဆိုဟာ တရားစီရင်

ခီမာ ပြစ်ကြောန့် “ဒန်ခံစေ” ဆိုဘီး စီရင်ဟယ် ဆိုဟာ ကျေးဇူးတော်ဟု ပြစ်ဘောင်ဂီးရှိနေဘေမဲ့ “လွတ်စေ!” ဆိုဘီး စီရင်ခလမှတ်လေဟယ်။

17 နှော-က်ဘီးဟာ လူတယော့-က် ပြစ်မှားကြောန့် သေရှင်းတရားဟာ အယ်သူအားဖြင့် စပြုဘီး ဝမ်ရော့-က် လာဟယ် ဆိုဟာ တယော့-က်သောသူဖြစ်ဟူ ယေရှုခရစ်တော်ရဲ့ လောက်ဆောန်ရှင်းအားဖြင့် ဘုရားသခင်ရဲ့ ကြွယ်ဝဟူ ကျေးဇူးတော်နု ဖြောန့်မတ်ရှင်း ကောင်းဂျီးဟိုခံစားခွမ်ရဟူ သူလေဟာ ယေရှုခရစ်အားဖြင့် သတ်ရှင်ဘီး စိုးစံလေ့မယ်!

18 အယ်ကြောန့် လူတယော့-က်ဟု ပြစ်ကျူးလွန်ဟူ ဇာအားဖြင့် လူလေ ဂူလောင်းဟာ ပြစ်စီရင်ဇာဟို ခံရဂေဟူ မျိုး လူတယော့-က်ရဲ့ ဖြောန့်မတ်ရှင်းအားဖြင့် လူလေ ဂူလောင်းဟာလည်း ပြစ်စီရင်ဟူဇာဟု လွတ်ဘီးဟာ ထာဝရသတ်နု ဆိုင်ဟူ ဖြောန့်မတ်ရှင်းဟို ရလေဟယ်။

19 ဖြားဖြစ်ကြောန့်နူးဆိုဟာ လူတယော့-က် နားထောန်ဘဲကြောန့် လူလေ ဂူလောင်း ပြစ်ထဲဟို ကုလရော့-က်ဟူမျိုး လူတယော့-က် နားထောန်ရှင်းအားဖြင့် လူလေ ဂူလောင်းဟာ ဘုရားသခင်ရဲ့ ရှေ့တော်မာ ဖြောန့်မတ်ရှင်းဟို ရဂေလေဟယ်။

20 နှော-က်ဘီး ပညတ်တရားဟာ ကျူးလွန်ဟူ ပြစ်လေဟို ထန်ရှားစေဟိုတွပ် ဝမ်ရော့-က်လာဟူကြောန့် ဒုစရိုက် ပြစ်လေဟာ ပွားများလာဟယ်။ အယ်ဘေမဲ့ ပြစ်ပွားများ

လေလေ ကျေးဇူးတော်ဟာ ပိုဘီး ကြွယ်ဝလေလေ ဖြစ်ဟုယ်။

²¹ အယ်မျိုးဖြစ်ကြောန့် ပြစ်တရားဟာ သေရှင်းတရားအားဖြင့် စိုးရဟူမျိုး ကျေးဇူးတော်ဟာ ဖြောန့်မတ်ရှင်းအားဖြင့်စိုးရဘီး နို့လေရဲ့သခင် ယေရှု ခရစ်တော်အားဖြင့် ထာဝရသတ်ဟို့ ရရှိစေဟုယ်။

6

ခရစ်တော်န တလောင်းတဝဒဲဖြစ်ဘီး သတ်ရှင်ဟူကြောန်း

¹ အယ်မျိုးဆိုဟာ ဖယ်မျိုးပြောရမယ်နူး။ ကျေးဇူးတော် များပြားလာဟို့တွပ် ပြစ်ထဲမာဘဲ့ ကျင်လည်နေရဟို့လော။

² အယ်မျိုး နေဟို့ ရဟု! ပြစ်တရားထဲမာ သေဘီးဟူ နို့လေဟာ ပြစ်တရားထဲမာ ဖယ်မျိုး သတ်ရှင်ရအူးမယ်နူး။

³ ခရစ်တော်ယေရှုန တလောင်းတဝဒဲ ဖြစ်ဟို့တွပ် ဗတုတိဇံဟူ နို့လေဟာ တခီဒဲမာဘဲ့ ကိုယ်တော်နတူးဒု သေခံဟို့တွပ် ဗတုတိဇံဟို့ ခံဂေဟုယ်။

⁴ အယ်မျိုး နို့လေရဲ့ ဗတုတိဇံခံရှင်းဟာ သေခံဟူဇာ အားဖြင့် ခရစ်တော်နတူးဒု သပြီဟ်ရှင်းဟို့ ခံလေဟုယ်။ ဖြားဖြစ်ကြောန့်နူးဆိုဟာ ခရစ်တော်ဟာ ဖရဲ့ ဖောင်းတဂိုးတော်အားဖြင့် သေရှင်းဟုနေ ရှင်ပုလန်ထမြေ့-က်လာဟူ

တိုင်းဘဲ နို့လေလည်း သတ်တာသစ်န ကျင်လည်ရဂေဟို့
တွပ် ဖြစ်ပါဟယ်။

5 တနည်းအားဖြင့် သေခံတော်မူရှင်းရဲ့ ပေါင်သဏ္ဌာ
န်ဟို့ ဆောန်ဘီးဟာ ကိုယ်တော်နတူးဒု နို့လေစိုက်ပျိုး မ
လောက်န့်ဟယ် ဆိုဟာ ထမြော့-က်ဟူ ပေါင်သဏ္ဌာန်
ဟို့လည်း ဆောန်ဟူဇာအားဖြင့် စိုက်ပျိုးမလောက်န့်ဟူဇာ
ဖြစ်ပါဟယ်။

6 နို့လေရဲ့ လူဟောန်းဟာ ခရစ်တော်နတူးဒု လတ်
ဝါးကပ်တိုင်မာ သေခံရပီးဘီ ဆိုဟူဇာဟို့ နို့လေသိဂေဟ
ယ်။ ဖြားဖြစ်ကြောန့်နူးဆိုဟာ နို့လေဟာ နှော့-က်မ ပြစ်
တရားဟို့ စေခံဘဲနေဟို့တွပ် ပြစ်တရားရဲ့ကိုယ်ဟို့ ဖျစ်
ဆီးပစ်ဟို့တွပ် ဖြစ်ဟယ်။

7 ခရစ်တော်နတူးဒု သေဟူသူဟာ ပြစ်တရားရဲ့ လတ်
ဟုနေဘီး လွတ်မြော့-က်ဟားဘီ ဖြစ်ဟယ်။

8 နို့လေဟာ ခရစ်တော်နတူးဒု သေပီးဘီဖြစ်ဟူကြောန့်
ကိုယ်တော်နတူးဒု သတ်ရှင်ရမယ်ဆိုဘီး ယောင်ကြည်ဂေ
လေဟယ်။

9 သေရှင်းဟုနေ ရှင်ပုလန်ထမြော့-က်ဟူ ခရစ်တော်
ဟာ နှော့-က်ထပ် လောင်းဝမသေဘီ ဆိုဇာဟို့ နို့လေသိ
ဂေလေဟယ်။ သေရှင်းတရားဟု ကိုယ်တော်ဟို့ နှော့-က်
ထပ် အောက်စိုးဟို့ မရဟန်း။

10 ဖြားဖြစ်ကြောန့်နူးဆိုဟာ ခရစ်တော် သေခံဟူဇာဟု
ပြစ်တရားတွပ်ကြောန့် တခါဘဲ သေခံတော်မူဟယ်။ ခု

သတ်ရှင်ရှင်းဟာ ဘုရားသခင်နှိုက် သတ်ရှင်တော်မူဟု
 ယ်။

11 အယ်မျိုးဘဲ နန်းနို့လေဟာ ပြစ်တရားနဆိုင်ဟယ်
 ဆိုဟာ သေဟားဘိ။ ဘုရားသခင်န စပ်ဆိုင်ဟယ် ဆို
 ဟာ ခရစ်တော်ယေရှုအားဖြင့် သတ်ရှင်ဟယ်ဆိုဘီး ကိုယ့်
 ကိုယ်ကိုယ် ထန်မှတ်ဂေပါ။

12 အယ်ကြောန့် နန်းနို့လေဟာ ကိုယ့်ရဲ့ ကိုယ်ခန္ဓာ တပ်
 မတ်မှုနော-က်ဟို့ လိုက်မိဘဲနေအောန် ပြစ်တရားဟာ နန်း
 နို့လေရဲ့ သေတတ်ဟူ ကိုယ်ခန္ဓာဟို့ အောက်စိုးစေန။

13 နန်းနို့လေရဲ့ ကိုယ်အင်္ဂါလေဟို့လည်း ဒုစရိုက် လတ်
 နတ်လေ ဖြစ် ပြစ်တရားဟို့ ဆစ်သဂေန။ အယ်မျိုး
 လောက်မယ့်စား သေနဟူ လူလေထဲဟာ သတ်ရှင်နေသူ
 မျိုး ကိုယ့်ရဲ့ကိုယ်ဟို့ ဘုရားသခင်ဟို့ ဆစ်သဘီး နန်းနို့
 လေရဲ့ ကိုယ်အင်္ဂါလေဟို့ ဖြောန့်မတ်ရှင်းရဲ့ လတ်နတ်ဖြစ်
 န ဘုရားသခင်ဟို့ ဆစ်သဂေပါ။

14 ဖြားဖြစ်ကြောန့်နူးဆိုဟာ နန်းနို့လေဟာ ပညတ်
 တရားရဲ့ လတ်အော့-က်မာ မေ့ဟူ။ ဘုရားသခင်ရဲ့
 ကျေးဇူးတရား လတ်အော့-က်မာ ရှိဟူကြောန့် ပြစ်တရား
 ဟာ နန်းနို့လေဟို့ အောက်စိုးဟို့ ရဟူ။

ဖြောန့်မတ်ဟူ တရားရဲ့ ကျွန်လေကြောန့်

15 အယ်မျိုးဆိုဟာ ဖယ်မျိုးနူး။ နို့လေဟာ ပညတ်
 တရားလတ်မာ မေ့ဘဲန ဘုရားသခင်ရဲ့ ကျေးဇူးတရား

လတ်မာ ရှိဟူကြောင့် ပြစ်ပြုရဟူလော။ လောင်းဝပြုဟူရဟူ!

16 နန်းနို့လေဟာ ယော့-က်ယော့-က်နားမာ ကျွန်ဖြစ်နစေဟူယ် ဆိုဟာ အယ်သူဟာ သေရှင်းန ယှဉ်ဟူ ပြစ်တရားဘဲဖြစ်ဖြစ်၊ ဖြောန်မတ်ရာဟို ရော့-က်ဟူဇာန ယှဉ်ဟူ နားထောန်ရှင်း တရားဘဲဖြစ်ဖြစ် နန်းနို့ရဲ့ သခင်ဖြစ်ဟူယ် ဆိုဇာဟို သိဂေဟလော။

17 နန်းနို့လေဟာ စဟ ပြစ်တရားရဲ့ ကျွန်လေ ဖြစ်ဖူးဟူလည်းဘဲ ခုခံယူဘီးဟူ သြဝါဒ နည်းဥပဒေသ စကားလေဟို စိန့်လောင်းကြွင်းမဲ့န နားထောန်ဂေဟူကြောန် ဘုရားသခင်ရဲ့ ကျေးဇူးတော်ဟို ချီးမွမ်းပါဟူယ်။

18 နန်းနို့လေဟာ ပြစ်တရားလတ်ဟု လွတ်ဘီး ဖြောန်မတ်ဟူ တရားရဲ့ ကျွန်ဖြစ်ဂေဟူယ်။

19 (နန်းနို့လေဟာ ဇာတိတွေးခေါ် အားနဲဟူကြောန် လောကီဝေါဟာရတိုင်း ငါပြောဟူဇာဖြစ်ဟူယ်။) တခါဟု နန်းနို့လေဟာ ကိုယ့်ရဲ့ ဘဝသတ်တာဟို ဒုစရိုက်သားကောန်ရဲ့ ကျွန်ဖြစ်န အပ်ဘီး ညစ်ညူးမှုလေဟို ပြုဂေမျိုး ခုလည်း အယ်မျိုးဘဲ ကိုယ့်ရဲ့ ဘဝသတ်တာဟို စောင်လင်သန်ရှင်းဘီး ကောင်းဟူ ကျင့်လေဟို ကျင့်ဟို့တွပ် ဖြောန်မတ်ဟူ တရားလတ်ထဲဟို ကျွန်ဖြင့်န ကြွင်းမဲ့အပ်ဂေပါ။

20 နန်းနို့လေဟာ ပြစ်တရားရဲ့ လတ်မာ ကျွန်ဖြစ်န ရှိနေဟူ ခီမာ ဖြောန်မတ်ရှင်းတရားရဲ့ လတ်ဟုနေ လွတ်ဂေလေဟူယ်။

21 ခု နန်းနို့ယှစ်ကြော့-က်နေဟူ အယ်မူကျင့်လေဟို ကျင့်နေဟူ ခီဒူးဟ ဖယ်မူကျိုးဟို ရဂေ့ကြောန်နူး။ အယ် မျိုးကျင့်ဟာ သေရှင်းရဲ့ လမ်းဆောင်းဘဲ ဖြစ်ပါဟယ်!

22 ခုဆို နန်းနို့လေဟာ ပြစ်တရားရဲ့ လတ်ဟုနေ လွတ် မြော့-က်ဘီးဟာ ဘုရားသခင်ရဲ့ ကျွန်လေ ဖြစ်ဟယ်။ အယ်မူကျိုးကြောန် သန်ရှင်းရှင်းဟို ရဘီးဟာ ဆောင်း မာ ထာဝရသတ်ဟို ရဂေ့လေ့မယ်။

23 ပြစ်တရားရဲ့ ခဟာ သေရှင်းဘဲဖြစ်ဟယ်။ အယ်ဘေ မဲ့ ဘုရားသခင် အလဂါးပေးတော်မူဟူ ဆုကျေးဇူးတော် ဟာ နို့လေရဲ့ သခင် ယေရှု ခရစ်တော်အားဖြင့် ထာဝရ သတ် ဖြစ်လေဟယ်။

7

မင်္ဂလာဆန်ဟူဇာရဲ့ သာကေကြောန်

1 ပညတ်တရားဟိုသိဟူ ညီကို မောန်နှမလေ နန်းနို့ဟို ငါပြောရှင်ဇာဟု ပညတ်တရားဟာ လူတယော့-က်ဟို သူ သတ်ရှင်နေဟူကာလပတ်လောင်း ချောက်ကိုင်ဟားဇာဟို နန်းနို့သိဂေ့ဟုလော။

2 ဥပမာ လန်ရှိဟူ မီးမတယော့-က်ဟာ ပညတ်တရား တိုင်း သူလန် သတ်ရှင်နေဟူ ကာလပတ်လောင်း လန် ရဲ့ချည်နှောင်မှုဟို ခံရလေဟယ်။ လန်သေမှဘဲ ပညတ် တရားအရ လန်ရဲ့ ချည်နှောင်မှုဟုနေဘီး လွတ်လေဟ ယ်။

3 အယ်ကြောန့် လန်သတ်ရှင်ရစ်န နှော-က်အီထောန် ပြုဟယ် ဆိုဟာ ဖော-က်ပုလန်ဟူမီးမဆိုဘီး ပြောခံရ လေ့မယ်။ တကယ်ဟူကြောန့် လန်သေဟူးကြောန့်ဆို ဟာ အယ်မူပညတ်တရားဟု လွတ်ဟူးဘီဖြစ်ဟူကြော န့်နှော-က်အီထောန်ပြုဟူလည်းဘဲ ဖော-က်ပုလန်ဟူမီးမ ဆိုဘီး ပြောခံရဟူကြောင်း မေ့ဟူ။

4 အယ်မျိုးဘဲ ညီကို မောန်နှမလေ နန်းနို့လေဟာ တခြားသူဖြစ်ဟူ သေရှင်းဟုထမြော-က်ဟူသူရဲ့ မယား ဖြစ်ဟူကြောန့် ဘုရားသခင်ရဲ့ လိုတော်တိုင်း တိုးပွားလာဟို့ တွပ် ခရစ်တော်ရဲ့ ကိုယ်ခန္ဓာအားဖြင့် သေဘီးဟာ ပညတ် တရားန ကွားဟူးဂေဘီ။

5 နို့လေဟာ ဇာတိသွီးသားထဲမှာ ကျင်လည်နေဟူခီ ဟု ပညတ်တရားရဲ့ နှိုးဆော်ပေးမှုကြောန့် ဖြစ်ပေါ်လာ ဟူ ပြစ်လောက်ရှင်ဟူ စိဆန္ဒလေဟာ နို့လေရဲ့ ကိုယ်အင်္ဂါ လေမှာ ထန်ရှားလာဘီး သေရှင်းတရားဟို့ ဖြစ်ပေါ်လာစေ ဟယ်။

6 ခုဆို နို့လေဟာ နို့လေဟို့ချောက်ကိုင်ဟူးဟူ ပညတ် တရားရဲ့ လတ်ထဲမှာ သေပီးဟာ ပညတ်တရားလတ်ဟု နေ လွတ်မြော-က်ဂေဘီဖြစ်ဟူကြောန့် ကျမ်းစာမပါဟူ တရားဟောင်းဟို့ မှီပြုဘဲန ဝိညာဉ်တော်ရဲ့ တရားလမ်းစဉ် သစ်တိုင်း မှုတော်ဟို့ စေခံဂေဟယ်။

ပညတ်တရားန ပြစ်တရားကြောန့်

7 အယ်မျိုးဆိုဟာ ဖယ်မျိုးနူး၊ ပညတ်တရားဟို့ ပြစ်ပြောရဟို့လော။ ပြစ်လုံးဝ ပြောဟို့မရဟု၊ ပညတ်တရားအားဖြင့်ဘဲ ပြစ်ရဲ့သဘောတရားဟို့ နို့လေသိရဂေဟယ်။ ဖြားဖြစ်ကြောန့်နူးဆိုဟာ “တပ်မတ်လိုရှင်စိရှိန” ဆိုဘီး ပညတ်တရားဟု တားမြစ်ဘဲနေဟာ လောဘလွန်ကြူးမှုရဲ့ ဆိုးကျိုးဟို့ ငါသိဟို့ မူဟု။

8 ပြစ်တရားဟာ ပညတ်တရားအားဖြင့် ငါ့ဟို့ချောက်ကိုင်ဘီး လောဘစိ မျိုးမျိုးလေဟို့ ဖြစ်ပေါ်စေဟယ်။ ပညတ်တရားမွေ့ဘဲနေဟာ ပြစ်တရားလည်းသေ ဖြစ်ဟယ်။

9 စဟု ပညတ်တရားမွေ့ဘဲကြောန့် ငါသတ်ရှင်ဟယ်။ ပညတ်တရားပေါ်ပေါက်လာဟူ ခီမာ ပြစ်တရားဟာ ပုလန်ရှင်လာဘီး ငါလည်း သေဟယ်။

10 ငါ့ဟို့ သတ်ရှင်ဟို့ပေးဟူ ပညတ်တရားဟုဘဲ ငါ့ဟို့သေစေဟို့ တွဲရဟယ်။

11 ပြစ်တရားဟာ ပညတ်တရားအားဖြင့် ခွမ်ရဟူကြောန့် ငါ့ဟို့လှည့်ဇားဘီးဟာ အယ်ပညတ်တော်အားဖြင့် ငါ့ဟို့သတ်လေဟယ်။

12 အယ်ကြောန့် ပညတ်တရားဟာ သန်ရှင်းလေဟယ်။ ပညတ်တော်လည်းဘဲ သန်ရှင်းရှင်း ဖြောန့်မတ်ရှင်း ကောန့်မြတ်စောင်လင်ရှင်း ရှိလေဟယ်။

13 အယ်မျိုးဆိုဟာ အယ်မူကောန်းမြတ်ဟူရာဟာ ငါ့တွပ် သေရဟူကြောန့်ရာ ဖြစ်ဟူကြောန့်လော။ ဖြစ်နိုင်

ဟု! ငါ့ဟို့ သေစေဟူဇာဟာ ပြစ်တရားဘဲ ဖြစ်ဟယ်။
 ပြစ်တရားဟာ သူ့ရဲ့ပင်ကိုသဘောဟို့ ထန်ရှားစေဟို့တွပ်
 ကောင်းမြတ်ဟူဇာလေအားဖြင့် ငါ့ဟို့သေစေဟူဇာ ဖြစ်ဟ
 ယ်။ အယ်ကြောန် ပြစ်တရားဟာ တအားဆိုးဝါးဟူ ပြစ်ဖြ
 ဖ်ဟူကြောန်းဟို့ ပညတ်တော်အားဖြင့် သိရလေဟယ်။

လူထဲမာရှိဟူ တရားနေ့မျိုးကြောန်း

¹⁴ ပညတ်တရားဟာ ဝိညာဉ်ရေးရာန ဆိုင်ဟူကြောန်းဟို့
 နို့လေသိဂေဟယ်။ အယ်ဘေမဲ့ ငါဟာ ဇာတိသွီးသားနှိုက်
 ရှိဟူ လူတယော့-က်ဖြစ်ဘီး ပြစ်တရားရဲ့ လတ်အော့-က်
 မာ ရောင်းဇားခံရဟူသူ ဖြစ်ဟယ်။

¹⁵ ငါဟာ ကိုယ်ဖြစ်နေဇာဟို့ ကိုယ်တိုင်နားလည်ဟု။
 ဖြားဖြစ်ကြောန်းနူးဆိုဟာ ကိုယ်ကျင့်ရှင်ဟူတိုင်း ကျင့်ဟို့
 ရဘဲန ရှိရှာဟူ ကျင့်လေဟို့ ကျင့်လေဟယ်။

¹⁶ အယ်မျိုး ငါဟာ ကိုယ်ပြုရှင်ဘဲန ပြုကျင့်နေရဟယ်
 ဆိုဟာ ပညတ်တရားဟာ မှန်ကန်ဟူကြောန်းဟို့ ငါဝန်ခံပါ
 ဟယ်။

¹⁷ အယ်မျိုးဆိုဟာ အယ်မူ ကောင်းဘဲကျင့်ဟို့ ငါ
 ကိုယ်တိုင် ကျင့်နေဟူဇာမူဘဲ ငါ့ထဲမာ ရှိနေဟူ ပြစ်တရား
 ဟု ကျင့်စေဟူဇာဖြစ်ဟယ်။

¹⁸ ငါ့ရဲ့ ဇာတိသွီးသားထဲမာ ကောင်းဟူဇာလေ တခု
 လည်း မှော့ဘဲဟူကြောန်းဟို့ ငါသိလေဟယ်။ ဖြားဖြစ်

ကြောန့်နူးဆိုဟာ ငါဟာ ကောန်းဟူကျင့်ဟို့ ကျင့်ရှင်ဟူ
 စိဆန္ဒရှိဟူလည်းဘဲ ကျင့်နိုင်ဟူခွန်အား ငါ့မာ မှောဟ။

19 ငါဟာ ကောန်းဟူ ကျင့်လေဟို့ ကျင့်ရှင်ဟူလည်းဘဲ
 ကျင့်ရှင်ဘဲဟူ ကျင့်ဆိုးလေဟို့ဘဲ ငါ့ထဲမာနေဟူ ပြစ်တ
 ရားဟု ကျင့်နေဟူဇာ ဖြစ်ဟယ်။

20 အယ်မျိုး ကျင့်ရှင်ဘဲဟူ ကျင့်ဆိုးလေဟို့ ငါကျင့်နေ
 ရဟယ် ဆိုဟာ ငါကိုယ်တိုင် ကျင့်နေဇာမှုဘဲန ငါ့ထဲမာရှိ
 နေဟူ ပြစ်တရားဟု ငါ့အားဖြင့် ကျင့်နေဟူဇာဖြစ်ပါဟ
 ယ်။

21 အယ်မျိုး ကောန်းဟူကျင့်လေဟို့ ကျင့်ရှင်ဟူငါ့မာ
 ကောန်းဘဲဟူ ကျင့်ဆိုးလေဟို့ဘဲ ပြုကျင့်စေဟူ ပညတ်
 တပါးဟို့ ငါတို့ရဟယ်။

22 ငါဟာ တွင်းလူအားဖြင့် ဘုရားသခင်ရဲ့ ပညတ်
 တရားတော်ဟို့ ရရာတိုင်း နှစ်သက်ဟယ်။

23 အယ်ဘေမဲ့ ငါ့ရဲ့ ကိုယ်အင်္ဂါလေထဲမာ လွှမ်းမိုး
 ချောက်ကိုင်နေဟူ ပညတ်တပါးဟာ စိဝိညာဉ်တရားဟို့
 တိုက်ခိုက်တွန်းလှန်ဘီး ငါ့ကိုယ်အင်္ဂါလေမာရှိဟူ ပြစ်
 တရားလတ်ထဲဟို့ ငါ့ဟို့ ဖမ်းဆီးအပ်လိုက်ဟူဇာဟို့ ငါမြင်
 ရဟယ်။

24 ငါဟာ ရရာတိုင်း စိပျစ်ဇာကောန်းဟူ လူတယော့-က်
 ဖြစ်ဟယ်! သေတတ်ဟူ အယ်မူခန္ဓာ ပေါက်ကောန်ဟုနေ
 ဘီး ငါ့ဟို့ ဖယ်သူကယ်တန်ပေးမယ်နူး။

25 နို့လေရဲ့ သခင် ယေရှုခရစ်တော်အားဖြင့် ကယ်လွတ်

ပေးတော်မူဟု ဘုရားသခင်ဟု ရရာတိုင်းဘဲ ကျေးဇူးကီး
မားလှပါဟုယ်!

အယ်မျိုး ငါဟာ ကိုယ့်စိတ်ညဉ်အားဖြင့် ဘုရားသခင်
ရဲ့ ပညတ်တော် အော့-က်မာ စေခံဟူလည်းဘဲ ဇာတိသွီး
သားအားဖြင့် ပြစ်တရားဟို့ စေခံနေရဇာ ဖြစ်ဟုယ်။

8

ဝိညာဉ်တော်အားဖြင့် သတ်ရှင်ဟူကြောန်း

¹ အယ်ကြောန့် ခုခီမာ ခရစ်တော်ယေရှုနှိုက် ရှိဟူသူ
လေဟာ ပြစ်စီရင်ဇာဟို့ ခံရဟန်း။

² ဖြားဖြစ်ကြောန်းနူးဆိုဟာ ခရစ်တော်ယေရှုနှိုက် သတ်
ရှင်ဟို့တွပ် ဝိညာဉ်တော်တရားဟာ ပြစ်တရားနု သေရှင်း
တရားဟုနေဘီး ငါ့ဟို့* လွတ်မြော့-က်စေတော်မူဘီ။

³ ဇာတိပကတိကြောန့် ပညတ်တရားဟာ အားနဲဘီး
တတ်နိုင်ဘဲဟူမှုဟို့ ဘုရားသခင် ပြုတော်မူဟို့တွပ် ပြစ်
နုပုလဲဝဟူ ဇာတိပကတိရဲ့ သဏ္ဌာန်ဟို့ ဆောန်ဟူ သူ
ရဲ့ သားတော်ဟို့ စေလွှတ်ဘီးဟာ ပြစ်ဖြေဟို့တွပ် ဇာတိ
ပကတိနှိုက် ပြစ်ဟို့ ဒန်ပေးတော်မူလေဟုယ်။

⁴ ဖြားဖြစ်ကြောန်းနူးဆိုဟာ နို့လေဟာ ဇာတိသွီးသား
တိုင်း သတ်ရှင်ဘဲ ဝိညာဉ်တော်အားဖြင့် သတ်ရှင်နေထိုင်
ဟို့တွပ် ပညတ်တော်မာပါဟူ တရားတော်ဟို့ လိုက်နာကျင့်
သောင်းဟို့တွပ် ဖြစ်လေဟုယ်။

* 8:2 ဂ.၂ ငါ့ဟို့၊ တချို့ မူရင်းလတ်ရေးမူလေမာ နန်ဟို့၊ ဆိုဘီး ပါရှိဘီး၊
တချို့ မူရင်းလတ်ရေးမူလေမာ နို့လေဟို့၊ ဆိုဘီး ပါရှိဟုယ်။

5 အတိသွီးသားရဲ့ လိုဆန္ဒတိုင်း သတ်ရှင်ဟူသူလေဟာ အတိသွီးသားန သတ်ဆိုင်ဟူအလေဟိုဘဲ စိစွဲလမ်းဂေဟယ်။ ဝိညာဉ်တော်ရဲ့ လိုတော်တိုင်း သတ်ရှင်ဟူ သူလေဟာ ဝိညာဉ်တော်န သတ်ဆိုင်ဟူ အလေဟိုဘဲ စိစွဲလမ်းလေဟယ်။

6 အတိသွီးသားနဆိုင်ဟူ အလေဟို စိစွဲလမ်းဟူ သူလေဟာ သတ်ဆောင်းရှောင်းလေ့မယ်။ ဝိညာဉ်တော်န ဆိုင်ဟူ အဟို စိစွဲလမ်းဟူ သူလေဟာ သတ်ရှင်ရှင်းန ငြိသတ်ရှင်းဟို ရလေ့မယ်။

7 ဖြားဖြစ်ကြောနဲ့ဆိုဟာ အတိသွီးသားန ဆိုင်ဟူအလေဟို စိစွဲလမ်းဟူ သူလေဟာ ဘုရားသခင်န ဆန့်ကျင်ဖတ်ပြုဟူသူ ဖြစ်ဟယ်။ အယ်မျိုး စိစွဲလမ်းဟူ သူလေဟာ ဘုရားသခင်ရဲ့ ပညတ်တော်ဟို လိုက်ရှော့-က်တတ်ဟူ။ လိုက်လည်း လိုက်ရှော့-က်နိုင်ဂေဟယ်။

8 အယ်ကြောနဲ့ အတိသွီးသားတိုင်း သတ်ရှင်သူလေဟာ ဘုရားသခင်ရဲ့ စိတော်န တို့နိုင်ဟူ။

9 အယ်ဘေမဲ့ ဘုရားသခင်ရဲ့ ဝိညာဉ်တော်ဟာ နန်းနို့ထဲမာ ကိန်းဝပ်တော်မူဟာ နန်းနို့လေဟာ အတိပကတိဖတ်မာ မေ့ဟု ဝိညာဉ်ပကတိဖတ်မာ ရှိလေဟယ်။ ခရစ်တော်ရဲ့ ဝိညာဉ်ဟို ရဘဲသူဟာ ခရစ်တော်န လောင်းဝ သတ်ဆိုင်ဟူ။

10 အယ်ဘေမဲ့လည်း ခရစ်တော်ဟာ နန်းနို့ထဲမာ သတ်ရှင်နေဟယ် ဆိုဟာ ကိုယ်ခနုဓာဟာ ပြစ်ကြောနဲ့ သေရဟူ

လည်းဘဲ ဝိညာဉ်ဟု ဖြောင့်မတ်ရှင်းကြောင့် သတ်ရှင်လေဟယ်။†

11 အယ်လော့-ကန်ကဟု သခင်ယေရှုဟို့ သေရှင်းဟု နေဘီး ရှင်ပုလန်ထမြော့-ကံစေဟူ ဘုရားသခင်ရဲ့ ဝိညာဉ်တော်ဟာ နန်းနို့ထဲမှာ ကိန်းဝပ်ဟယ် ဆိုဟာ ခရစ်တော်ဟို့ သေရှင်းဟုနေ ရှင်ပုလန်ထမြော့-ကံစေဟူ သခင်ဟာ နန်းနို့ထဲမှာ ကိန်းဝပ်ဟူ သူရဲ့ ဝိညာဉ်တော်အားဖြင့် သေတတ်ဟူ နန်းနို့ ကိုယ်ခန္ဓာဟို့လည်း ရှင်စေတော်မူလေ့မယ်။

12 အယ်ကြောင့် ညီကို မောန်နှမလေ နို့လေဟာ ဇာတိလိုတိုင်း သတ်ရှင်ရအောက် ဇာတိရဲ့ ကျွန်ဖြစ်ဂေဟူဇာ မူဟူ။

13 ဖြားဖြစ်ကြောင့်နူးဆိုဟာ နန်းနို့လေဟာ လူဇာတိလိုဟို့လိုက်ဘီး သတ်ရှင်မယ် ဆိုဟာ သေဂေရလေ့မယ်။ အယ်ဘေမဲ့ ဝိညာဉ်တော်အားဖြင့် နန်းနို့ရဲ့ ကိုယ်ခန္ဓာကျင့်လေဟို့ သေစေမယ် ဆိုဟာ သတ်ရှင်ရလေ့မယ်။

14 ဘုရားသခင်ရဲ့ ဝိညာဉ်တော် ဆောင်းမပဲ့ပြင်တော်မူရှင်းဟို့ ခံရဟူသူလေဟာ ဘုရားသခင်ရဲ့ သားမီးလေဖြစ်ဟယ်။

15 ဖြားဖြစ်ကြောင့်နူးဆိုဟာ ဘုရားသခင် ပေးတော်မူဟူ ဝိညာဉ်တော်ဟာ နန်းနို့ဟို့ ကြော့-ကံတတ်ဟူ ကျွန်ရဲ့စိသဘောဟို့ ပေးဟူဇာမူဘဲန နို့လေဟို့ ဘုရားသခင်ရဲ့ သား

† 8:10 ဂ.၁၀ ဝိညာဉ်ဟု ဖြောင့်မတ်ရှင်းကြောင့် သတ်ရှင်လေဟယ်၊ အယ်မျိုးမှုဘဲနေဟာ နန်းရဲ့ ဝိညာဉ်ဟာ သတ်ရှင်လေဟယ်။ 8:11 ဂ.၁၁ ခ ကော ၃.၁၆ 8:15 ဂ.၁၅-၁၇ ဂလာ ၄.၅-၇ 8:15 ဂ.၁၅ မာ ၁၄.၃၆၊ ဂလာ ၄.၆

မီးလေဖြစ်စေဘီးဟာ ဝိညာဉ်တော်အားဖြင့် “အဗဗ! ဖ!”
ဆိုဘီး ခေါ်ရဟူခွင့်မဲ့ဟူ ပေးတော်မူဟူ ဖြစ်ဟူယ်။

16 နို့လေဟာ ဘုရားသခင်ရဲ့ သားမီးလေ ဖြစ်ဟူကြော
န်းဟို့ ဝိညာဉ်တော်ကိုယ်တိုင် နို့လေရဲ့ဝိညာဉ်နတူးဒု သတ်
သေခံလေဟူယ်။

17 နို့လေဟာ ဘုရားသခင်ရဲ့ သားမီးလေဖြစ်ဟူကြောန်
မို့စားမို့ခံလေဖြစ်ဟူယ်။ ခရစ်တော်နတူးဒု ချီးမြှောက်ဟူ
ဇာဟို့ ခံရဟို့တွပ် ကိုယ်တော်နတူးဒု ဆင်းရဲဒေါက်ခဟို့ ခံ
ရဟူယ် ဆိုဟာ ကိုယ်တော်နတူးဒု ဆစ်နွယ်ဟူ မို့ခံလည်း
ဖြစ်လေဟူယ်။

နာဂတ်ဖောင်းသရေတော်ကြောန်း

18 ခုမျှစ်မော့-က်ကာလမာ နို့လေခံရဟူ ဆင်းရဲဒေါက်ခ
ဟာ နော့-က်တခီမာ ထန်ရှားလာမယ့် ဖောင်းသရေတော်န
နှိုင်းယှဉ်မယ် ဆိုဟာ ပမာဏထားဇာ ကြောန်းမော့ဟု ဆို
ဘီး ငါမှတ်ယူဟူယ်။

19 ဖန်ဆင်းခံလောက တခုလောင်းဟာ ဘုရားသခင်ရဲ့
သားလေ ထန်ရှားဘီး ပေါ်ထွပ်လာဟို့တွပ် ရရာတိုင်းဘဲ
မျှော်လင့်တောန့်တ နေလေဟူယ်။

20 ဖြားဖြစ်ကြောန်နူးဆိုဟာ ဖန်ဆင်းခံလောကဟာ
အနတ္တဖြစ်ဟို့ ရော့-က်ဟူဇာဟု သူ့ရဲ့ဆန္ဒအားဖြင့်မူဘဲ
ဘုရားသခင်ရဲ့ လိုတော်ကြောန်ဘဲဖြစ်ဟူယ်။

21 အယ်ဘေမဲ့ အယ်မျှော်လင့်ချစ်ဟာ တနေ့တခီမာ
ဖန်ဆင်းခံ လောကကိုယ်တိုင် ပျစ်စီးရှင်းကျွန်ဖြစ်ဟုနေ

လွှတ်မြော့-က်ဘီး ဘုရားသခင် သားမီးလေရဲ့ ဖောင်း
သရေတော်န ပုလဲဝဟူ လွှတ်ရှင်းချမ်းသာထဲဟို့ ခေါ်ဆော
န့်ဟို့တွပ် မျှော်လင့်ရှင်း ရှိဟူကြောန်ဖြစ်ဟယ်။

²² ဖန်ဆင်းခံ ကမ္ဘာလောက တခုလောင်းဟာ ခုခီထိ
တူးဒညည်းတွားဘီး သားမီးဟူ ဝေဒနာဟူမျိုး ဒေါက်ခ
ဝေဒနာလေဟို့ ခံစားရဇာဟို့ နို့လေသိဂေဟယ်။

²³ အယ်လော့-က်နမကဟ ဝိညာဉ်တော်ရဲ့ ကျေးဇူး
တော်ဟို့ ရင်ဦးဆောင်း ခံရဟူ နို့လေလည်း သားမီးရာဟို့
ရဟူဇာဖြစ်ဟူန နို့လေရဲ့ ကိုယ်ခန္ဓာ ဝီးကော့-က်ခံရဟူ ဇာ
ဟို့ စောန်မျှော်ဘီး စိန်လောင်းထဲဟ ညီးတွားနေဂေဟယ်။

²⁴ ပြားဖြစ်ကြောန်နူးဆိုဟာ နို့လေဟာ မျှော်လင့်ရှင်း
အားဖြင့် ကယ်တန်ရှင်းဟို့ ခံရလေဟယ်။ နို့လေဟာ ကိုယ်
မျှော်လင့်ဟူ ဇာလေဟို့ ပြင်ရဟယ် ဆိုဟာ မျှော်လင့်
ဟို့ကြောန်း မေ့ဟူ။ တို့ပြင်နေရဟူ ဇာလေဟို့ ဖယ်သူ
မျှော်လင့်နေမယ်နူး။

²⁵ အယ်ဘေမဲ့ နို့လေပြင်တို့ရဘဲဟူ ဇာလေဟို့ မျှော်လ
င့်ဂေဟယ် ဆိုဟာ အယ်ရာလေဟို့ စိရယ်ရှယ်နသီးခံဘီး
စောန်မျှော်ဂေဟယ်။

²⁶ အယ်ဘေမဲ့ နို့လေတတ်နိုင်ဘဲဟူ ဇာလေဟို့ ဝိညာဉ်
တော်ဟာ မစတော်မူလေဟယ်။ နို့လေဟာ ဆုတောင်း
သင့်ဟူတိုင်း ဖယ်မျိုး ဆုတောင်းရမယ် ဆိုဇာဟို့ သိဂေ

8:23 ၈.၂၃ ၂ ကော ၅.၂-၄ † **8:23 ၈.၂၃** တချို့
မူရင်းလတ်ရေးမူလေမာ နို့လေလည်း သားမီးရာဟို့ ရဟူဇာဖြစ်ဟူ
ဆိုဇာဟူ မေ့ဟူ။

ဟု။ အယ်ဘေမဲ့ နို့လေ စကားအားဖြင့် ဖော်ပြဘီးဟာ ဆုတောင်းတတ်ဘဲန ညည်းတွားနေဟူရာ လေအားဖြင့် ဝိညာဉ်တော်ဟာ နို့လေကိုယ်စား ဘုရားသခင်နားမာ တောင်းလျှော့-က် သနားခံပေးတော်မူဟယ်။

27 လူလေရဲ့ စိသဘောဟို သိတော်မူဟူ ဘုရားသခင် ဟာ ဝိညာဉ်တော်ရဲ့ စိသဘောဟိုလည်း သိတော်မူလေဟယ်။ ဖြားဖြစ်ကြောန်းနဲ့ဆိုဟာ ဝိညာဉ်တော်ဟာ သန့်ရှင်းသူလေရဲ့ ဆုတောင်းဟူမှုရာဟို ဘုရားသခင်ရဲ့ လိုတော်န ညီ သနားခံပေးတော်မူလေဟယ်။

28 ဘုရားသခင်ဟို ရှစ်ဟူသူ၊ ကြံစည်တော်တိုင်း ခေါ်တော်မူရှင်းခံရဟူ သူလေရဲ့ ကောင်းဟူ ကျိုးလေတွပ် ရှိမျှဂူလောင်းဟာ တညီတညွတ်ဒဲ ပြုစုဂေဟယ် ဆိုဇာဟို နို့လေ သိဂေဟယ်။

29 ဘုရားသခင် ဝီးကော့-က်တော်မူဟူ သူလေဟာ သူရဲ့သားတော်ရဲ့ ပေါင်သဏ္ဌာန်တော်န တူဟိုတွပ် ရှေးမဆွဟုနေဘီး ခွဲခန့်မှတ်သားဟူးလေဟယ်။ အယ်မျိုး ဝီးကော့-က်မှတ်သားဟူကြောန်းဟု သားတော်ဟာ ညီလေဘောင်ဂီးထဲမာ နောက်ဂီးဖြစ်ဟိုတွပ် ဖြစ်ဟယ်။

30 အယ်မျိုး ခွဲခန့်မှတ်သားဟူးဟူသူလေဟို ခေါ်တော်

§ 8:28 ၈.၂၈ ဘုရားသခင်ဟို ရှစ်ဟူသူ၊ ကြံစည်တော်တိုင်း ခေါ်တော်မူရှင်းခံရဟူ သူလေရဲ့ ကောင်းဟူ ကျိုးလေတွပ် ရှိမျှဂူလောင်းဟာ တညီတညွတ်ဒဲ ပြုစုဂေဟယ် ဆိုဇာဟို နို့လေ သိဂေဟယ်။ တချို့ မူရင်းလတ်ရေးမူလေမာ ကိုယ်တော်ဟို ရှစ်မြတ်နိုးဟူ သူလေရဲ့ကျိုးတွပ် ဘုရားသခင်ဟု ရှိမျှဂူလောင်းဟို လောက်ဆောန်ပေးနေဟယ်။ ဆိုဘီး ပါရှိဟယ်။

မူဘီးဟာ သန့်ရှင်းဖြောင့်မတ်ဟူရာမှာ တည်စေတော်မူဟု
 ယ်။ အယ်မျိုး တည်စေဟူသူလေဟို့လည်း ချီးမြှောက်
 တော်မူဟုယ်။

ခရစ်တော်ယေရှုထဲမှာ ထန်ရှားဟူ ဘုရားသခင်ရဲ့ မြစ်
 တာတော်ကြောင်း

31 အယ်မျိုးဆိုဟာ အယ်မူကြောင်းရာလေဟို့ ဖယ်မျိုး
 ပြောဇာရှိန်း။ နို့လေဖတ်မှာ ဘုရားသခင်ရှိဟုယ် ဆိုဟာ
 ဖယ်သူဟု နို့လေဟို့ ဆန့်ကျင်နိုင်မယ်န်း။

32 နို့လေအားလောင်းတွပ် သူ့ရဲ့သားတော်ရင်းဟို့မှ
 ပြောဘဲန စွန့်တော်မူဟူရှင်ဟာ သားတော်နတူးဒ ရှိမျှဂူ
 လောင်းဟို့ ပေးဘဲန ဖယ်မျိုးနေမယ်န်း။

33 ဖယ်သူဟု ဘုရားသခင် ဝီးကော့-က်ဟူ သူလေဟို့
 ပြစ်စီရင်မယ်န်း။ နို့လေဟို့ ဖြောင့်မတ်ဟူရာမှာ တည်စေ
 ဟူရှင်ဟာ ဘုရားသခင်ဘဲ ဖြစ်ဟုယ်။

34 ပြစ်စီရင်သူဟာ ဖယ်သူန်း။ နို့လေတွပ် သေခံဟူ
 မျှနမကဘဲ သေရှင်းဟုနေ ရှင်ပုလန်ထမြော့-က်ဘီး
 ဘုရားသခင်ရဲ့ ညာဖတ်ဟုနေ သနားခံ ဆုတောင်းပေးဟူ
 သူဟာ ခရစ်တော်ယေရှုဘဲ ဖြစ်ဟုယ်။

35 အယ်ကြောန် ဖယ်သူဟာ နို့လေဟို့ ခရစ်တော်ရဲ့ မြစ်
 တာတော်န ခွဲခွာစေနိုင်မယ်န်း။ ဆင်းရဲဒေါက်ခ၊ နာကြင်
 ရှင်းဝေဒနာ၊ ညှဉ်းဆဲရှင်း၊ ငတ်မွတ်ခေါင်းပါးရှင်း၊ ခုလေး
 ပုလန်းဗုလန်းနေရရှင်း၊ သတ်ခံရရှင်းန ဘေးအန္တရာယ်န

တို့ရှင်းလေဟာ ခရစ်တော်ရဲ့ မြစ်တာတော်န နို့လေဟို
ကွဲကွာစေနိုင်မယ်လော။

³⁶ ကျမ်းစာဟု

“ကျွန်တော်ဟွားလေဟာ ကိုယ်တော်တွပ် တနေ့လောင်း
သေဘေးန ရင်ဆိုင်ဘီး နေရဂေ့ပါဟယ်။

သတ်ဟို့ ထားဟွားဟူ သိုးလေမျိုး သူးနို့လေ ထန်မှ
တ်ဂေ့ပါဟယ်” ဆိုဘီး ပြောဟွားလေဟယ်။

³⁷ အယ်ဘေမဲ့ နို့လေဟို ရှစ်တော်မူဟူ သခင်ရဲ့ ကျေးဇူး
တော်အားဖြင့် အယ်မူရှိမျှဂလောင်းဟို့ ခံနေရဟူ ခီမာ ထူး
သဖြင့် အောက်မြင်ဂေ့လေဟယ်!

³⁸ ပြားဖြစ်ကြောန့်နူးဆိုဟာ နို့လေယောင်ကြည်ရှင်းဟာ
သေရှင်းတရားဘဲဖြစ်ဖြစ်၊ သတ်ရှင်ရှင်းဘဲဖြစ်ဖြစ်၊ ကော
န်းဂန်တမန်ဘဲဖြစ်ဖြစ်၊ ထွဋ်မြတ်ဘဲဖြစ်ဖြစ်၊ အာဏာတ
ဂိုးဘဲဖြစ်ဖြစ်၊ ပစုစုပုပန်ဘဲဖြစ်ဖြစ်၊ နာဂတ်ဘဲဖြစ်ဖြစ်၊

³⁹ ကောန်းဂန်ထတ်ရာဘဲဖြစ်ဖြစ်၊ မှလေဂီးအော့-က်ရာ
ဘဲဖြစ်နေပါစေ၊ ဖန်ဆင်းခံဟွားဇာ ဖယ်ဇာမဆို သခင်
ယေရှုခရစ်တော်အားဖြင့် ခံစားရဟူ ဘုရားသခင်ရဲ့ မြစ်
တာတော်န နို့လေဟို ကွာစေနိုင်ဟူဇာ ခုလည်း မေ့ဟု ဆို
ဘီး ငါ ယောင်ကြည်စိခုလဟယ်။

9

ဘုရားသခင်န လူစုတော်ကြောန်း

1 ငါဟာ ခရစ်တော်အားဖြင့် မုသားပါဘဲန မှန်တိုင်းပြောဟယ်။ ငါ့ရဲ့သိစိတ်ထဲမှာ သန့်ရှင်းဟူ ဝိညာဉ်တော်ဟာ ငါနတူးဒု သတ်သေခံဟူဇာဟု။

2 ငါဟာ စိန်လုံးထဲမှာ ပူပန်ရှင်းဝေဒနာဟို့ ခီတိုင်းခံစားရဘီး ရရာတိုင်း ဝန်းနဲ့ပူဆွေးနေရပါဟယ်။

3 ဖြားဖြစ်ကြောနဲ့နူး ဆိုဟာ သွီးသားဇာတိအားဖြင့် ကိုယ့်လူမျိုးလေဖြစ်ဟူ ငါ့ရဲ့ ညီကို မောန်နှမလေတွပ် ငါကိုယ်တိုင် ခရစ်တော်နကွာဘီးဟာ ကီရှင်းအမင်္ဂလာဟို့ဘဲ ခံလိုဟူ ဆန္ဒရှိဟယ်။

4 သူးနို့လေဟာ ကုသရေလလူမျိုးလေ ဖြစ်ဟူကြောနဲ့ သားမီးရာနဖြစ်ဖြစ် ဖောင်းအာနဘော်တော်နဖြစ်ဖြစ်၊ ပဋိညာဉ်တရားလေ*နဘဲဖြစ်ဖြစ်၊ ပညတ်တော်လေပေးရှင်းဘဲဖြစ်ဖြစ်၊ ဝတ်ပြုကိုးကွယ်ရှင်းနဘဲဖြစ်ဖြစ်၊ ဂဒိတော်လေနဘဲဖြစ်ဖြစ် စပ်ဆိုင်သူလေဖြစ်ဂေဟယ်။

5 သူးနို့လေဟာ ရှေးဘိုးဘေးလေဟု ဆင်းသတ်လာဟူ သူလေဖြစ်ဂေဟယ်။ ခရစ်တော်ဟုလည်းဘဲ လူဇာတိအားဖြင့် သူးနို့လေရဲ့ မျိုးနွယ်ဖြစ်လေဟယ်။ ကိုယ်တော်ဟာ ရှိမျှဂူလောင်းဟို့ စိုးရဘီး ထာဝရမင်္ဂလာရှိဟူ ဘုရားသခင် ဖြစ်တော်မူဟယ်!† အာမင်။

6 အယ်မျိုးပြောဇာဟု ဘုရားသခင်ရဲ့ ဂဒိတော် တည်

* 9:4 ဇ.၄ ပဋိညာဉ်တရားလေ၊ တချို့ မူရင်းလတ်ရေးမူလေမှာ ပဋိညာဉ်၊ ဆိုဘီး ပါရှိဟယ်။ † 9:5 ဇ.၅ ကိုယ်တော်ဟာ ရှိမျှဂူလောင်းဟို့ စိုးရဘီး ထာဝရမင်္ဂလာရှိဟူ ဘုရားသခင် ဖြစ်တော်မူဟယ်၊ အယ်မျိုးမှုဘဲနေဟာ ရှိမျှဂူလောင်းဟို့ စိုးရဟူ ဘုရားသခင်ဟာ ထာဝရမင်္ဂလာရှိပါစေ!

ဟု ဆိုဘီး ငါဆိုလိုဇာ မူဟု။ ဖြားဖြစ်ကြောန့်နူးဆိုဟာ ကူ
သရေလနွယ်ဟုနောဘီး ဆင်းသတ်လာဟူ လူလေဂူလော
င်းဟာ ကူသရေလလူမျိုးမှန် မူဟု။

7 အယ်မျိုးဘဲ အာဗြဟံဟုနော ဆင်းသတ်လာဟူ လူလေ
လည်း အာဗြဟံရဲ့သားမှန် မူဟု။ “ကူဇာက်အားဖြင့်ဘဲ နန့်
မျိုးနွယ် တည်ရမယ်” ဆိုဘီး ဂတိတော်ရှိလေဟယ်။

8 အယ်ကြောန့် ဇာတိအားဖြင့် မွီးဖွားလာဟူ သားလေ
ဟာ‡ ဘုရားသခင်ရဲ့ သားမီးမှန် မူဟု။ ဘုရားသခင်ရဲ့ ဂ
ဒိတော်အားဖြင့် မွီးဖွားလာဟူ သားမီးလေဟိုဘဲ စစ်မှန်ဟူ
မျိုးနွယ်ဖြစ် သတ်မှတ်တော်မူလေဟယ်။

9 ဖြားဖြစ်ကြောန့်နူး၊ ဆိုဟာ ဂဒိတော်ဟု “ခီတန်ဟာဒ်
ငါပုလန်လာမယ်။ စာရာဟု သားဟို ရလေ့မယ်” ဆိုဘီး ဖြ
စ်ဟယ်။

10 အယ်လော့-က်ဘဲ မူဟု နို့လေရဲ့ ဘိုးဘေး ကူဇာက်
ဟာ ရေဗကုကာ န အီထောန်ပြုဘီး ဗိုက်ရလာဟူ ခီမာ

11 သားလေမွီးဖွားခန်မာ အယ်သားလေဟာ ကောန်း
ဇာရော၊ ဆိုးဇာရော လောက်ခန်ဂဒဲဟု ဘုရားသခင်ရဲ့ ဝီး
ကော့-က်တော်မူရှင်းန စပ်ဆိုင်ဟူ ကြံစည်တော်ဟာ ကျင့်
အားဖြင့်မူဘဲန ခေါ်တော်မူဟူသူအားဖြင့်ဘဲ တည်စေဘီး၊

12 “သားဂီးဟာ သားငယ်မာ ကျွန်ခံရလေ့မယ်” ဆိုဘီး

‡ 9:8 ၉.၈ ဇာတိအားဖြင့် မွီးဖွားလာဟူ သားလေဟာ၊ အာဗြဟံဟုနောဘီး
ဆင်းသတ်လာဟူ ကူရှေမေလဟာ ဟာဂရရဲ့ သားဖြစ်ဟယ် ဆိုဇာဟို
ရည်ညွှန်းဟယ် (ရှု ဂလာ ၄:၂၂-၂၃)။ § 9:9 ၉.၉ ခီတန်ဟာ၊
အယ်မျိုးမူဘဲနောဟာ နော့-က်နှစ် အယ်ခီမာ။

ရေဗက္ကဟို မိန့်တော်မူလေဟယ်။

13 ကျမ်းစာလာဇာဟု “ယာကုပ်ဟို ငါရှစ်ဟယ်။ ဧသော
ဟို မူးဟယ်” ဆိုဘီး လာလေဟယ်။

14 အယ်မျိုးဆိုဟာ ဖယ်မျိုးပြောရမယ်နူး။ ဘုရားသခင်ဟု
တရားဘဲဟူမှုဟို လောက်နေဇာလော။ လောင်းဝမှုဟု။

15 ဖြားဖြစ်ကြောနန်းဆိုဟာ ဘုရားသခင်ဟု မောရှေဟို
“ငါ ကျေးဇူးပြုရှင်သူဟို ကျေးဇူးပြုမယ်။ သနားရှင်သူဟို
သနားမယ်” ဆိုဘီး မိန့်တော်မူလေဟယ်။

16 အယ်ကြောန့် ရှိမျှဂူလောင်းဟာ လူလေရဲ့ လိုအင်
ဆန္ဒန ကြိုးစားလောက်ဆော်ရှင်းထတ်မာ မူတည်ဘဲန
ကျေးဇူးပြုတော်မူဟူ ဘုရားသခင်ရဲ့ ကရုဏာထတ်မာဘဲ
မူတည်ဇာ ဖြစ်လေဟယ်။

17 ကျမ်းစာမာ ဖာရောမန်းဂီးဟို မိန့်တော်မူဇာဟု “နန့်
ဟို မန်းဂီးရာမာ ငါချီးမြှောက်ဟူ ဇာဟာ နန့်အားဖြင့် ငါ
တဂိုးဟို ထန်ရှားပြဘီး ငါနာမဟို တလောကလောင်းမာ
ကျော်ဇောသွားစေဟိုတွပ် ဖြစ်ဟယ်” ဆိုဘီး မိန့်တော်မူ
လေဟယ်။

18 အယ်ကြောန့် ဘုရားသခင်ဟာ သနားရှင်သူဟို သနား
တော်မူဘီးဟာ မော့-က်မာစေရှင်သူဟို မော့-က်မာစေ
တော်မူလေဟယ်။

ဘုရားသခင်ရဲ့ မျစ်တော်န ကရုဏာတော်ကြောန့်

19 “အယ်မျိုးဆိုဟာ ဘုရားသခင်ဟု လူလေဟို ဖယ်မျိုး ဖြစ်ကြောနဲ့ ပြစ်တန်သေးနူး။ ဖယ်သူဟု ကိုယ်တော်ရဲ့ လို တော်ဟို ဆန်ကျင်နိုင်မယ်နူး” ဆိုဘီး ငါ့ဟို မေးလေ့မယ်။

20 မိဆွေ နန်ဟာ ဖယ်မျိုးသူဖြစ်ဟူကြောနဲ့ ဘုရားသ ခင်ဟို ပုလန်ခံပြောဆိုနူး။ ဖန်းဆင်းခံဟု ဖန်ဆင်းရှင်ဟို “ဖြားဖြစ်ကြောနဲ့ ကိုယ်တော်ဟာ ကျွန်တော်ဟို အယ်မျိုး လောက်ရနူး” ဆိုဘီး ပြောခွမ်ရှိဟူကြောနဲ့လော။

21 အိုးလောက်မားဟု အိုးမှလေဟို သူကြိုက်ဟူ ပေါင်စံ ဟို လောက်ပိုင်ခွမ် ရှိဟယ် မူဟုလော။ အိုးမှလေတခုဒေန အသရေရှိဟူအိုးန အသရေမေ့ဘဲဟူအိုးဟို လောက်ပိုင်ဟု ယ် မူဟုလော။

22 အယ်ဘေမဲ့ ဘုရားသခင်ဟာ မျစ်တော်ဟို ပြဟို့တွပ် န သူရဲ့တဂိုးတော်ဟို သိစေဟို့တွပ် လိုတော်ရှိရစ်န ဖျစ် ဆီးဟို့ပြင်ဟားဟူ မျစ်တော်နဆိုင်ဟူ အိုးခွပ်လေဟို ရရာ တိုင်း စိရယ်ဘီး သီးခံတော်မူဟယ် ဆိုဟာ ဖယ်မျိုး ပြော ဇာရှိအူးမယ်နူး။

23 နော့-က်ဘီး ဖောင်းသရေတော်တွပ် ကြိုတန်ပြင်ဆ င်ဟားဟူ ကရုဏာတော်နဆိုင်ဟူ အိုးခွပ်လေမာ သူရဲ့ ဖောင်းသရေတော်ရဲ့ ကြွယ်ဝမှုဟို သိဟို့တွပ် ပြုတော်မူ ဟယ် ဆိုဟာ ဖယ်မျိုးနူး။

24 ဘုရားသခင်ဟာ နို့လေဟို အယ်ကရုဏာတော်န ဆို င်ဟူ အိုးလေဖြစ် ယုဒလူမျိုးလေ သတ်သတ်ဘဲမှုဘဲန လူမျိုးခြားလေထဲမာလည်း ခေါ်တော်မူလေဟယ်။

- 25 ဟောရှေရဲ့ ကျမ်းစာနှိုက်
 “ငါ့ရဲ့လူမှုဘဲဟူ သူလေဟို
 ‘ငါ့ရဲ့လူလေ’ ဆိုဘီး ငါခေါ်မယ်။
 ငါရှစ်ဘဲဟူ လူမျိုးလေဟို
 ‘ငါရှစ်ဟူ လူမျိုး’ ဆိုဘီး ငါခေါ်မယ်။
- 26 ‘နန်းနို့ဟာ ငါ့ရဲ့လူ မူဟု’ ဆိုဘီး ပြောဟူအရပ်မာ
 သူးနို့လေဟာ ‘သတ်ရှင်တော်မူဟူ ဘုရားသခင်ရဲ့
 သားလေ’ ဆိုဘီး ခေါ်ခံရလေ့မယ်” ဆိုဘီး မိန့်
 တော်မူလေဟယ်။
- 27 ပရောဖက် ဟောရှာယဟုလည်း က္လသရေလ လူမျိုး
 လေဟို ရည်ရွယ်ဘီး ပြောဟူဇာဟု “က္လသရေလ လူမျိုး
 လေဟာ ပန်လယ်သဲလောင်းနမျှ များဟူလည်းဘဲ နဲစု
 လော့-က်ဘဲ ကယ်တန်ခံရလေ့မယ်။
- 28 ဖြားဖြစ်ကြောနဲ့ဆိုဟာ ဘုရားသခင်ဟာ မိန့်တော်ရှိ
 ဟူတိုင်း မုလေဂီးထတ်မာ ပုလဲဇောင်စေဘီး ဒီဆွဲဘဲန ပြု
 လောက်တော်မူလေ့မယ်” ဆိုဘီး ကြွေးကြော်လေဟယ်။
- 29 နော့-က်ဘီး ဟောရှာယဟု “ကောန်းဂန်ဗိုလ်ခေရှင်
 ဘုရားသခင်ဟာ နို့လေတွပ် မျိုးနွယ်ဟို ချန်ဟားဘဲနနေ
 ဟာ နို့လေလည်း သောဒုံမြို့နုတူဘီး ဂေါမောရမြို့မျိုး
 ဖြစ်ရလေ့မယ်” ဆိုဘီး ကြိုတန်ပြောဟူတိုင်းဘဲ ဖြစ်လေ
 ဟယ်။

က္လသရေလလူမျိုးနု ဒန်းကောန်းကြောန်း

30 အယ်မျိုးဆိုဟာ နို့လေ ဖယ်မျိုးပြောရဟ့်နဲ့။ ပြောန့် မတ်ရှင်းဟို့ ရဟ့်တွပ် ကြိုးစားဘဲဟူ လူမျိုးခြားလေဟာ ပြောန့်မတ်ရှင်းဟို့ ခံရဂေလေဟယ်။ အယ်မျိုးခံရဇာဟု ယောင်ကြည်ရှင်းအားဖြင့် ခံရဟူ ပြောန့်မတ်ရှင်းဟို့ ဆိုလို ဇာဖြစ်ဟယ်။

31 အယ်ဘေမဲ့ ပညတ်တရားဟို့ မှီအောက်လိုက်ဟူ ကု သရေလ လူမျိုးလေဟာ ပြောန့်မတ်ရှင်း တရားဟို့ မှီဂေ ဟူ။

32 ဖြားဖြစ်ကြောန့် မှီဟုနဲ့။ ယောင်ကြည်ရှင်းအားဖြင့် လိုက်ဘဲန၊ ပညတ်တရားရဲ့ ကျင့်အားဖြင့် လိုက်ဘီး ကျမ်းစာမာ ဖော်ပြဟားဟူ “ထိမိဘီးလဲတတ်ဟူကု လော့-က်” ဟို့ တိုက်မိဘီးလဲဟူကြောန့် ဖြစ်လေဟယ်။

33 ကျမ်းစာဟု၊

“ကေ့ရှဂေ၊

လူလေ ထိမိလဲတတ်ဟူ ကုလော့-က်ဟို့ ဇိအုန်တော န်ထတ်မာ ငါခလဟားမယ်။

အယ်ကုလော့-က်ဟို့ လူလေ ထိမိလဲဂေလေမယ်။

အယ်ဘေမဲ့ အယ်ကုလော့-က်ဟို့ မှီပြုဟူ သူလေဟာ ယှစ်ကြော့-က်စိပျစ်မှု မေ့ဟု” ဆိုဘီး ဖော်ပြဟား လေဟယ်။

10

¹ ညီကို မောန်နှမလေ ငါဟာ ကုသရေလူမျိုးလေ ကယ် တန်ရှင်းရဟ့်တွပ် စေတနာစိပုလဲဝန် ဘုရားသခင်ဆီမာ

ဆုတောင်းလေ့ရှိပါဟုယ်။

² အယ်သူလေဟာ မှန်ဟူပညာ မွေ့ဘဲဟူလည်းဘဲ ဘုရားသခင်ဖတ်မာ ရရာတိုင်း စိအားကီးကြောင်းဟို့ သူး နို့လေတွပ် ငါသတ်သေခံပါဟုယ်။

³ သူးနို့လေဟာ ဘုရားသခင်ပြင်ဆင်ပေးဟူ ဖြောန်မတ် ရှင်းတရားဟို့ သိဘဲန ကိုယ့်ဖြောန်မတ်ရှင်းဟို့ တည်စေဟို့ တွပ် ရှာကြံဟူကြောန် ဘုရားသခင်ပြင်ဆင်ပေးဟူ ဖြောန် မတ်ရှင်းတရားဟို့ ဝန်ခံဂေဟု။

⁴ ယောင်ကြည်ဟူ လူလေ ဂူလောင်းဟာ ဖြောန်မတ်ရာ ဟို့ ရှေ့-က်ဟို့တွပ်ကြောန် ပညတ်တရားဟာ ခရစ်တော် အားဖြင့် ပုလဲဇောင်စေဟုယ်။

လူလေ ဂူလောင်းတွပ် ကယ်တန်ရှင်းကြောင်း

⁵ မောရှေဟူလည်း “အယ်ကျင့်ဟို့ ကျင့်ဟူသူဟာ အယ် ကျင့်အားဖြင့်ဘဲ သတ်ရှင်လေ့မယ်” ဆိုဘီး ပညတ်တရား နဆိုင်ဟူ ဖြောန်မတ်ရှင်းဟို့ ရည်ရွယ်ဘီးဟာ ရေးဟား လေဟုယ်။

⁶ ယောင်ကြည်ရှင်းအားဖြင့်ရဟူ ဖြောန်မတ်ရှင်းနပတ် သတ်ဘီး ကျမ်းစာတော်ဟု “ဖယ်သူဟု ကောင်းဂန်ဟို့ တတ်မယ်နူး၊ ဆိုဘီး စိနှလောင်းထဲဟုမေးန။ (ဆိုလိုဇာ ဟု ခရစ်တော်ဟို့ အေ့-က်ဟို့ခေါ်ပန်ဟို့တွပ်)

⁷ ဖယ်သူဟု အေ့-က်အရပ် နတ်နဲရာထဲဟို့ ဆင်းမယ် နူး၊ ဆိုဘီး မေးဂေန်” (ဆိုလိုဇာဟု ခရစ်တော်ဟို့ သေဟူ သူလေထဲဟု ခေါ်ပန်ဟို့တွပ်ဖြစ်ဟုယ်)။

8 နှော့-က်ဘီး ကျမ်းစာတော်ဟု “တရားတော်ဟု နန်ရဲ့ နီးနားမရှိဟယ်။ နန်ရဲ့ နှောက်မာဖြစ်ဖြစ် နန်ရဲ့ နှလောင်း မာဖြစ်ဖြစ် ရှိဟယ်” ဆိုဘီး ပြောဟူးဟယ်။ အယ်မျိုး ပြောဟူဇာဟု နို့လေ ဟောပြောကြေညာဟူ ယောင်ကြည် ရှင်းတရားဘဲ ဖြစ်လေဟယ်။

9 ဖယ်မျိုးနူးဆိုဟာ နန်ဟာ သခင်ယေရှုဟို နှောက် နဝန်ခံဘီး ဘုရားသခင်ဟု သူ့ဟို သေရှင်းဟုနေ ထ မြော့-က်စေဘီ ဆိုဘီး စိန်လောင်းထဲဟုနေ ယောင်ကြည် ဟယ် ဆိုဟာ ကယ်တန်ရှင်းဟို ရော့-က်လေ့မယ်။

10 ဖြားဖြစ်ကြောနူးဆိုဟာ ဖြောန့်မတ်ရာဟို ရော့-က် ဟို့တွပ် စိန်လောင်းန ယောင်ကြည်ဘီးဟာ ကယ်တန်ရှင်း ဟို ရော့-က်ဟို့တွပ် နှောက်နဝန်ခံရဟယ်။

11 ကျမ်းစာလာဟူဇာဟု “အယ်ကုလော့-က်ဟို မှီပြုဟူ သူလေဟာ ယှစ်ကြော့-က်ရှင်းမွေဟု” ဆိုဘီး လာလေဟု ယ်။

12 ယုဒလူမျိုး လူမျိုးခြားဆိုဘီး ခွဲခြားဟု လူမျိုးဂူ လောင်းရဲ့ သခင်တပါးဒဲဖြစ်ဟယ်။ ကိုယ်တော့်ဟို ဆု တောင်းဟူသူလေဟို ကြွယ်ဝအောန် ကောင်းဂျီးပေးတော် မူဟယ်။

13 ကျမ်းစာတော်ဟု “ဘုရားသခင်ရဲ့ နာမတော်ဟို အော် ခေါ်ဂေဟူ လူလေ ဂူလောင်းဟာ ကယ်တန်ရှင်း ခံရဂေလေ့ မယ်” ဆိုဘီး လာလေဟယ်။

14 အယ်ဘေမဲ့ ယောင်ဘဲနနေဟာ ဖယ်မျိုး ဆုတောင်း

နိုင်မယ်နဲ့။ ဒန်းကောင်းဟို ကြားဘဲနေဟာလည်း ဖယ်မျိုး ယောင်ကြည်နိုင်မယ်နဲ့။ ဟောပြောဟူသူလေ မေ့ဘဲနေဟာ ဖယ်မျိုး ကြားနိုင်ဂေမယ်နဲ့။

15 လူလေဟို စေလွှတ်ဘဲနေဟာ ဖယ်မျိုး ဟောပြောနိုင်မယ်နဲ့။ ကျမ်းစာတော်ဟု “ဒန်းကောင်းဟို သယ်ဆောင်လာဟူသူလေရဲ့ခေဟာ ရရာတိုင်းဘဲ အသရေရှိဘီး တင့်တယ်လေဟယ်။” ဆိုဘီး လာလေဟယ်။

16 အယ်ဘေမဲ့လည်း ဝန်းမြေ့-က်ဇာကောင်းဟူ အယ်ဒန်းကောင်းဟို လူတိုင်းနားထောင်ဂေဇာ မူဟု ပရောဖက်ဟေရှာယဟု “အို၊ ဘုရားသခင် ကျွန်တော့်ဟူးလေဟောပြောဟူ အယ်ဒန်းကောင်းဟို ဖယ်သူလေ ယောင်ကြည်ကြောနဲ့နဲ့” ဆိုဘီး ပြောလေဟယ်။

17 အယ်မျိုးဖြစ်ကြောနဲ့ ယောင်ကြည်ရှင်းဟာ ဒန်းကောင်းဟို ကြားနာရှင်းအားဖြင့်ဖြစ်ဘီး ကြားနာရှင်းဟာလည်း ခရစ်တော်ရဲ့ စကားတော် ဟောပြောရှင်းအားဖြင့် ဖြစ်လေဟယ်။

18 အယ်ဘေမဲ့ အယ်ဒန်းကောင်းဟို လူလေ ကြားရဂေဟုလော။ တကယ်ဘဲ ကြားရဂေဘီ။ ကျမ်းစာတော်ဟု၊

“သူနဲ့ရဲ့ သံဟာ လောကလောင်းဟို ပုလုံနဲ့ဟူးလေဟယ်။

သူနဲ့လေ ဟောပြောဟူ စကားဟာလည်း မုလေဂီး စွန်းထိအောက် ရှေ့-က်လေဘီ” ဆိုဘီး လာလေဟယ်။

19 နှော့-က်ဘီး ငါမေးအူးမယ်။ က္လသရေလ လူမျိုးလေ
ဟာ အယ်မူဇာလေဟို သိဂေဟလော။ မောရှေဟု၊

“ငါဟာ ရေရာဘဲဟူ လူမျိုးလေဟို သောင်း ပြုရှင်း
အားဖြင့်

နန်းနို့လေဟို နာလိုဘဲစိဟို ဖြစ်စေမယ်

မိုက်မဲဟူ လူမျိုးလေအားဖြင့်

စိဆိုးအောန် ငါပြုမယ်” ဆိုဘီး ရှေ့ဦးဆောင်း ပြော
လေဟယ်။

20 ပရောဖက် ဟေရှာယဟု၊

“ငါ့ဟို ရှာဂုဘဲဟူ သူလေဟာ ငါ့ဟို တွံရလေ့မယ်။

ငါ့ရဲ့ ကြောန်းဟို စောင်ဇမ်း မေးမြန်းဘဲဟူ သူလေ
နားမာ ငါထန်ရှားမယ်” ဆိုဘီး ရဲရဲရင့်ရင့် ပြော
လေဟယ်။

21 က္လသရေလ လူမျိုးလေန ပတ်သတ်ဘီး နှော့-က်ထပ်
ပြောဟူဇာဟု “ငါ့ဟို ဆန့်ကျင်ပေါင်ကန်ဘီး ငါ့စကားဟို
နားထောန်ဘဲဟူ အယ်လူမျိုးလေနားဟို တနေ့လောင်း ငါ့
လတ်ဟို ကမ်းဟားရဟယ်” ဆိုဘီး ပြောလေဟယ်။

11

ဘုရားသခင်ရဲ့ ကရုဏာတော်ကြောန်း

¹ အယ်မျိုးဆိုဟာ ဘုရားသခင်ဟု သူ့ရဲ့လူမျိုးနွယ်ဟို
ပယ်လိုက်ဘိလော၊ ဆိုဘီး မေးမယ် ဆိုဟာ လောင်းဝပယ်

ဟု! ငါကိုယ်တိုင်ဘဲ က္လသရေလလူမျိုးဖြစ်ဘီး အာဗြဟံ
ဟုနေ ဆင်းသတ်လာဟူ ဗ်ာမိန်နွယ်ဖြစ်ဟယ်။

² ဘုရားသခင်ဟာ စစဒူးဟု သူဝီးကော့-က်ဟူ သူ
လူမျိုးလေဟို စွန်ပယ်တော်မူဟူ။ ပရောဖက်ဇေယဟု က္လ
သရေလ လူမျိုးလေရဲ့ မိုက်မဲမှုဟို ဘုရားသခင်နား ကြား
လျှော့-က်ဟူ ကြောန်းရာဟို ကျမ်းစာမာ ဖယ်မျိုးဖော်ပြ
ဟားနူးဆိုဇာ နန်းနို့သိဂေလေဟယ်။

³ သူဟု “အိုး၊ ဘုရားသခင်၊ သူးနို့လေဟာ ကိုယ်တော်
ရဲ့ ပရောဖက်လေဟို သတ်ဘီးဟာ ယဇ်ပလ္လင်လေဟို ဖြို
ဖျစ်ဂေပါဘီ။ ကျွန်တော်တယော့-က်ဒဲဘဲ ကျန်ရစ်ဘီး
ကျွန်တော်ဟိုလည်း သတ်ဟိုရှာနေဂေပါဟယ်” ဆိုဘီး
လျှော့-က်လေဟယ်။

⁴ အယ်မျိုးလျှော့-က်ဟူ ခီမာ ဘုရားသခင်ဟု ဇေယ
ဟို ဖယ်မျိုး ဗျာဒိတ်ပေးဟယ်နူး။ ဘုရားသခင်ဟု “ဗာလ
ရှေ့မာ ဒူးထော့-က်ဝတ်ပြုဘဲသူ ၇,၀၀၀ ဟို ငါ့တွပ် ချန်
ဟားဟယ်” ဆိုဘီး မိန်တော်မူလေဟယ်။

⁵ အယ်မျိုးဘဲ ခုကာလမာလည်း ကျေးဇူးတော်အားဖြင့်
ဝီးကော့-က်ခံရဟူသူ ကြွင်းကျန်ရှိသေးဟယ်။

⁶ ကျေးဇူးတော်အားဖြင့် ဝီးကော့-က်ရှင်းခံရဟယ် ဆို
ဟာ ကိုယ့်ရဲ့ကျင့်အားဖြင့် မူဟူ။ ကိုယ့်ရဲ့ကျင့်ကြောန် ဆို
ဟာလည်း ကျေးဇူးတော်စစ်မှန် မူဟူ။

⁷ အယ်ဆိုဟာ ဖယ်မျိုးပြောရမယ်နူး။ က္လသရေလ
လူမျိုးလေဟာ သူးနို့ကြိုးစားဘီး ရှာဖွေဇာဟို တွံဂေဟူ။

အယ်ရာဟို ဝီးကော့-က်ရှင်းခံရသူလေဘဲ တိုရဘီး ကျန်
ဟူသူလေဟာ မှောန်မိုက်ဖောင်းလွှမ်းကြောန်နေဂေဟယ်။

⁸ ကျမ်းစာဟု “ဘုရားသခင်ဟာ သူးနှိုလေရဲ့ စိန်လော
င်းဟို မိုက်စေတော်မူဘီး မြင်ဘဲဟူမျှစ်စိန်၊ ကြားဘဲနားဟို
ပေးတော်မူဘီ” ဆိုဘီး လာလေဟယ်။ အယ်ကြောန် အယ်
နေထိ သူးနှိုလေဟာ မမြင်နိုင် မကြားနိုင်ဂေဟု။

⁹ နော့-က်ဘီး ဒါဝိဒ်ဟုလည်း၊

“သူးနှိုရဲ့ စားဗွဲဟာ သူးနှိုတွပ် ကျော့ကွမ်းဟူမျိုး၊
ထောန်ချော့-က်ဟူမျိုး၊ မှားယွင်းစေတတ်ဟူရာဟူ
မျိုး၊ လတ်တုံပုလန်ဇာမျိုး ဖြစ်ပါစေ။

¹⁰ သူးနှိုရဲ့ မျှစ်စိ ကေ့ဟို မြင်ဘဲနေအောင် ကွယ်ပါစေ။
သူးနှိုရဲ့ ခါးလည်းဘဲ မြဲဒမ်း ကူးပါစေ” ဆိုဘီး ဆို
ဟားလေဟယ်။

¹¹ အယ်မျိုးဆိုဟာ ဣသရေလလူမျိုးလေ ထိမ်ဘီး လဲ
ဂေဘီလော။ လဲဂေဟု! သူးနှိုလေ ပြစ်မှားဟူဇာအားဖြင့်
လူမျိုးခြားလေဆီဟို ကယ်တန်ရှင်း သတ်ရော့-က်စေဘီး
အယ်မူရာအားဖြင့် ယုဒလူမျိုးလေရဲ့ နာလိုဘဲဟူ စိဟို ဖြစ်
ပေါ်လာစေဟယ်။

¹² သူးနှိုလေရဲ့ ပြစ်ကျူးလွန်မှုဟာ လောကီသားလေ
ရဲ့ ကြွယ်ဝမှုဟို ဖြစ်စေဘီး သူးနှိုလေရဲ့ ဆောင်းရှောင်းမှု
ဟာ လူမျိုးခြားလေဟို ကောင်းဂျီးဖြစ် စေဟယ် ဆိုဟာ
သူးနှိုရဲ့ ပုလဲဇောင်မှုဟာ ဖယ်မျှလော့-က်များဟူ ကျိုးဟို

ဖြစ်စေလေ့မယ်နူး။ လူမျိုးခြားလေ ကယ်တန်ရှင်း ခံရဟူ
ကြောန်း

13 အယ်ကြောန့် လူမျိုးခြားဖြစ်ဟူ နန်းနို့ဟို့ ငါပြောရှင်
ဇာဟု၊ ငါဟာ လူမျိုးခြားလေနဆိုင်ဟူ တမန်တော်ဖြစ်ဘီး
ငါ့ရဲ့ မှုဆောန်လောက်ငန်းဟို့ ဂေါင်ယူဝါကြားဘီး

14 တနည်းအားဖြင့် ငါ့လူမျိုးလေရဲ့ မနာလိုစိဟို့ ဖြစ်
ပေါ်စေရှင်းအားဖြင့် သူးနို့လေထဲဟု လူတချို့ဟို့ ကယ်
တန်နိုင်ဟို့တွပ် မျှော်လင့်နေပါဟယ်။

15 ပြားဖြစ်ကြောန်းနူးဆိုဟာ သူးနို့လေပစ်ပယ်ခံရဟူဇာ
ဟု လောကသားလေတွပ် မိတ်သဟာယဖွဲ့ရှင်းခွမ့် ဖြစ်ဟု
ယ် ဆိုဟာ၊ သူးနို့ဟို့ ပုလန်ဘီးလတ်ခံဟူဇာဟာ သေဟား
ဘီးသူလေ သတ်ပုလန်ရှင်လာဟူဇာမျိုး ဖြစ်လေ့မယ် မှု
ဟုလော။

16 ရင်ဦးဆောင်းနယ်ဟူ မုညစ်ဟာ သန်ရှင်းဟယ်ဆို တ
အိုးလောင်း သန်ရှင်းလေ့မယ်။ သစ်ပြစ် သန်ရှင်းဟယ် ဆို
ဟာ ကိုင်းခတ်လေ ဂူလောင်း သန်ရှင်းလေ့မယ်။

17 အယ်ဘေမဲ့ တချို့ သံလွင်ခတ်ဟို့ ခွတ်ဖြတ်ဘီး၊ ရို
င်းဟူ သံလွင်ဗန်ဖြစ်ဟူ နန်းနို့လေဟို့ အယ်မှုသံလွင်ဗန်ငှ
ထတ်မာ ကိုင်းဆစ်စိုက်ပျိုးဟူကြောန့် သံလွင်ဗန်ရဲ့ သစ်
ပြစ်ဟုနေဘီး ဆီနှစ်န ဩဇာဟို့ မျှဝီခံစားဟူ သူဖြစ်လာ
ဟယ် ဆိုဟာ

18 အယ်မှုကိုင်းခတ်လေထတ်မာ ဝါကြွားဟူစိ ရှိဂေန။
ဝါကြွားဟယ် ဆိုဟာလည်း နန်ဟာ သစ်ပြစ်ဟို့ ထော့-က်

မဟူ ဇာမဟူ။ သစ်ပြစ်ဟု နန်းဟို့ထော့-က်မဟူ ဇာဖြစ်ဟု
ယ်။

19 အယ်ဘေမဲ့ နန်ဟု “ကျွန်တော့်ဟို့ ကိုင်းဆစ်ကူးဟို့
တွပ် အယ်မူကိုင်းခတ်လေဟို့ ခွတ်ပစ်ခံရဟယ်” ဆိုဘီး
ပြောလေမယ်။

20 နန်းနို့ပြောဟူတိုင်း မှန်ဟယ်။ သူးနို့လေဟာ ယောင်
ကြည်ဘဲကြောနို့ ခွတ်ပစ်ခံရဘီး နန်းနို့လေဟာ ယောင်ကြ
ည်ဂေဟူကြောနို့ တည်နေလေဟယ်။ အယ်ဘေမဲ့ မော့-က်
မာထောန်လွားဟူစိ မော့ဘဲန ကြော့-က်ရှုံဟူ စိရှိဂေပါ။

21 ဖြားဖြစ်ကြောနို့နူးဆိုဟာ ဘုရားသခင်ဟု နဂိုသံလွင်
ဗန်ရဲ့ ကိုင်းခတ်ဟို့ ပြောဘဲန ခွတ်ပစ်ဟယ် ဆိုဟာ နန်းနို့
လေဟို့လည်း ပြောဟို့ မဟု။

22 အယ်ကြောနို့ ဘုရားသခင်ရဲ့ ပြင်းထန်ဟူစီရင်
ရှင်းန ကျေးဇူးပြုရှင်းလေဟို့ ကေ့ဂေပါ။ ပြင်းထန်ဟူ
စီရင်ရှင်းဟာ လဲဟူသူလေထတ်မာရှိဘီး ဘုရားသခင်
ရဲ့ ကျေးဇူးပြုတော်မူရှင်းကြောန်းရာဟု၊ နန်ဟာ အယ်
မူကျေးဇူးတော်န တည်နေမယ် ဆိုဟာ ဘုရားသခင်ရဲ့
ကရုဏာတော်ဟာ နန့်ထတ်မာရှိဟယ်။ တည်ဘဲနေဟာ
နန်လည်း ခွတ်ပစ်ရှင်းခံရလေမယ်။

23 ယုဒလူမျိုးလေဟာ ယောင်ကြည်ဘဲဟူစိဟို့ စွန့်ပစ်
ဘီး ယောင်ကြည်မယ် ဆိုဟာ ပန်ငုထတ်မာ နော့-က်ထပ်
စိုက်ပျိုးဟို့တွပ် ဘုရားသခင်တတ်နိုင်တော်မူဟယ်။

24 ဖြားဖြစ်ကြောနို့နူးဆိုဟာ လူမျိုးခြားလေဖြစ်ဟူ နန်း

နို့လေဟို နဂိုရိုင်းဟူသံလွင်ဗန်ဟုနေ ခွတ်ယူဘီးဟာ ယ
ဥဟူသံလွင်ဗန်မာ ကိုင်းဆစ်ဘီး စိုက်ပျိုးရဟယ် ဆိုဟာ၊
ယဥဟူသံလွင်ဗန်ရဲ့ နဂိုကိုင်းလေဖြစ်ဟူ ယုဒလူမျိုးလေ
ဟို ပုလန်ဘီးလာစိုက်ပျိုးမယ် ဆိုဟာ ပိုဘီး ဟာ လွယ်ကူ
လေ့မယ် မှဟုလော။

လူလေဂူလောင်းဟို ဘုရားသခင်ထားဟူ ကရုဏာ
တော်ကြောန်း

25 ညီကို မောန်နှမလေ၊ နန်းနို့လေဟာ ကိုယ့်ကိုယ်ကိုယ်
ပညာသတိရှိဟူသူ ဆိုဘီး ထန်မှတ်ဘဲနေဟို့တွပ် အယ်မူ
လျှို့ဝှပ်နတ်နဲဟူရာဟို သိဘဲနဲ နေစေရှင်ဟူ။ အယ်မူလျှို့
ဝှပ်နတ်နဲဟူရာဟု ကုသရေလ လူမျိုးလေမာ မာကျော
ခတ်ထန်ဟူ သူတချို့ ရှိဟူဇာကြောန်းဟု လူမျိုးခြားလေ
စောင်းစောင်လင်းလင် ဝမ်ရော့-က်လာဟူ ခံထိဖြစ်ဘီး၊

26 အယ်ဘီးမှ ကုသရေလ လူမျိုးလေဟာ ကယ်တန်
ရှင်းခံရလေ့မယ် ဖြစ်ဟယ်။ ကျမ်းစာဟု၊

“ကယ်တန်ဟူ သခင်ဟာ ဇိအုန်တောန်ဟုနေ ကြွလာဘီး၊
ယာကုပ်မျိုးနွယ်ထဲဟုနေ တရားဘဲဟူမှုလေ ဂူလော
င်းဟို ဖယ်ရှားတော်မူလေ့မယ်။

27 သူးနို့လေရဲ့ ပြစ်လေဟို ငါဖယ်ရှားပေးဟူ ခီမာ
သူးနို့လေဟို ငါပေးဟူ ပဋိညာဉ်တရားဟု အယ်မျိုး
တရားဘဲ ဖြစ်ဟယ်” ဆိုဘီး လာလေဟယ်။

28 ကောင်းမြတ်ဟူ ဒန်းကောင်းအားဖြင့် သူးနို့လေဟာ
နန်းနို့တွပ်ကြောန့် ရန်သူလေ ဖြစ်လာဂေ့ဘီး ဝီးကော့-က်

တော်မူဟူ ဇာအားဖြင့် ရှေးဘိုးဘေးလေကြောင်းကြောင့် ရှစ်ရဟူသူ ဖြစ်လာဂေဟယ်။

29 ဖြားဖြစ်ကြောင့်နူးဆိုဟာ ဘုရားသခင်ပေးတော်မူဟူ ဝီး ကော့-က်ရှင်း ကောန်းဂျီးမင်္ဂလာဟာ ပုလောန်းလဲမှုမေ့ တတ်ဟူ။

30 နန်းနို့လေဟာ စဒူးဟု ဘုရားသခင်ရဲ့ စကားတော်ဟို့ နားထောန်ဘဲနေဟူလည်းဘဲ ခု သူးနို့လေ နားထောန်ဘဲနေ ကြောင့် နန်းနို့လေဟာ ကရုဏာတော်ဟို့ ခံစားရဂေဟယ်။

31 အယ်မျိုးဘဲ ဘုရားသခင်ရဲ့ ကရုဏာတော်ဟို့ နန်းနို့ ခံစားရဟူမျိုး ယုဒလူမျိုးလေလည်း ကရုဏာဟို့ ခံစား ရဟို့တွပ် ဘုရားသခင်ရဲ့ စကားတော်ဟို့ ခု * နားထောန် ဘဲ နေရဂေဟယ်။

32 ဘုရားသခင်ဟာ သူ့ရဲ့ ကရုဏာတော်ဟို့ လူလေ ဂူ လောင်း ခံစားရရှိဟို့တွပ် လူလေဟို့ နားမထောန်ရှင်း အားဖြင့် ချောက်ဟားလေဟယ်။

ဘုရားသခင်ရဲ့ ဂေါင်တော်ဟို့ ချီးမွမ်းဟူကြောင်း

33 ဘုရားသခင်ရဲ့ ပညာနု ဉာဏ်တော်ဟာ ရရာတိုင်းဘဲ နတ်နဲလွန်းပါဟယ်။ စီရင်တော်မူချစ်လေဟို့ ဖယ်သူလည်း လေ့လာဟို့ကူနိုင်ဟူ။ ဖယ်သူရှင်းပြနိုင်ဟူကြောင့်နူး။ ကြံ တော်မူဟူလမ်းလေဟို့ လိုက်ရှာဟူလည်းဘဲ တို့လည်းမတို့ မှီလည်းမမှီနိုင်ဟူ။

34 ကျမ်းစာဟု

* 11:31 ၁၁.၃၁ တချို့ မူရင်းလတ်ရေးမူလေမာ ခု၊ ဆိုဇာဟာ မေ့ဟူ။

- “ဖယ်သူဟု ဘုရားသခင်ရဲ့ စိတ်တော်ကို သိနဲ့။
ဖယ်သူဟု ကိုယ်တော်ရဲ့ တိုင်ပင်ခံဖြစ်ဖူးနဲ့။
- 35 ကိုယ့်ကို ကျေးဇူးဆပ်ရအောင်၊
ဖယ်သူဟု ကိုယ်တော်ကို ကျေးဇူးပြုဖူးနဲ့” ဆိုဘီး
ဖော်ပြဟားဟယ်။
- 36 ရှိမျှလောင်းဟာ ကိုယ်တော်ရဲ့ ထဲဟု ကိုယ်တော်
အားဖြင့် ကိုယ်တော်ရဲ့ တွပ်ဘဲ ဖြစ်လေဟယ်။ ကိုယ်တော်
ဟာ ကမ္ဘာဆစ်ဆစ် ဖောင်းကီးတော်မူပါစေ! အာမင်။

12

ဘုရားသခင်ရဲ့ မှုတော်ကို ဆောက်တည်တွင် ဖယ်မျိုး
သတ်ရှင်ရဟန်းကြီး

1 အယ် မျိုး ဖြစ် ကြော နဲ့ ညီ ကို မော န် နှမ လေ၊
ဘုရားသခင်ရဲ့ ကရုဏာတော်အားဖြင့် နန်းနီလေဟို ငါ
တိုက်တွန်းနှိုးဆော်ရှင်ဇာဟု နန်းနီလေရဲ့ ကိုယ်ခန့်ဇာဟို
ဘုရားသခင် နှစ်သက်ဟူ သန်ရှင်းရှင်း လတ်ခဏာဘော
န်းဇောင်န ပုလဲဇောင်ဟူ သတ်ရှင်ရှင်း ယဇ်ဖြစ် ဆစ်ကပ်
ပူဇော်ဂေပါ။ အယ်မျိုးပြုဟူဇာဟု နန်းနီလေဟာ မှန်ကန်
ဟူ ဝတ်ပြုကိုးကွယ်ရှင်း ဖြစ်လေဟယ်။

2 နန်းနီလေဟာ လောကီ ပေါင်သဏ္ဌာန်ဟို ဆော
န်ဂေန။ ကောင်းမြတ်ဟူဇာ၊ စောင်လင်ဟူဇာဖြစ်ဟူ
ဘုရားသခင် လိုတော်ရှိဟူဇာဟာ ဖယ်မျိုးဇာဖြစ်ဟယ် ဆို

ဇာတိ ပိုင်းခြားနိုင်ဟူ၍တွင် စိန္တလောင်းဟူ၍ သစ်ပြုပြင်ရှင်း
အားဖြင့် ပေါင်သဏ္ဌာန် ပုလောန်းလဲရှင်း ရှိပေပါ။

³ နန်းနို့လေဟာ ကိုယ့်ကိုယ်ကိုယ် တိုင်းထက်လွန် ထန်
ဘဲနေဟူ၍တွင် ငါခံရဟူ ဘုရားသခင်ရဲ့ ကျေးဇူးတော်
ဟူ၍ အားကိုးဘီးဟာ မှာကြားရှင်ပါဟုယ်။ နန်းနို့လေ
ဟူ၍ ဘုရားသခင်ခွဲဝီပေးဟူ ယောင်ကြည်ရှင်း တိုင်းတာန
ကိုယ့်ကိုယ်ကိုယ် ထန်သင့်ဟူတိုင်း ထန်မှတ်ပေပါ။

⁴ ဥပမာ ကိုယ်ခန္ဓာ တခုမရှိဟူ အင်္ဂါစိပိုင်းလေဟာ
တူညီဘဲဟူလောက်ဆောန်မှု ကိုယ်စီရှိဟူမျိုး၊

⁵ ဘောင်ဂီးဖြစ်ဟူ နို့လေဟာလည်း ခရစ်တော်န တ
လောင်းတဝဒ်ဖြစ်ဘီး ဂူလောင်းဟာ ကိုယ်ခန္ဓာရဲ့ ကွဲပြား
ခြားနားဟူ အင်္ဂါစိပိုင်းလေဖြစ်န ရှင်းရှင်း ပေါန်းစည်းဟား
ဇာဖြစ်ဘီး၊

⁶ နို့လေမာ ပေးအပ်တော်မူဟူ ကျေးဇူးတော်တိုင်း
ထူးထူးပြားပြားရှိဟူ ဆုကျေးဇူးတော်လေဟူ ရရှိပေဟု
ယ်။ အယ်ကြောန့် အယ်ဆုကျေးဇူးဟာ ပရောဖက်ပြု
ဟောပြောရှင်းဖြစ်ဟယ် ဆိုဟာ ယောင်ကြည်မှု ပမာဏ
ဟူ ရဟူတိုင်း ပရောဖက်ပြု ဟောပြောစေ။

⁷ ဓမ္မမှုဆောန် ရာဟူ ရဟယ် ဆိုဟာ ဓမ္မမှုဟူ ဆောန်ရှုပ်
စေ။ ဆောင်းမဩဝါဒ ပေးဟူသူ ဖြစ်ဟယ် ဆိုဟာ အယ်
မှုဟူ လောက်ဆောန်စေ။

⁸ တိုက်တွန်းအားပေးဟူသူ ဖြစ်ဟယ် ဆိုဟာ တိုက်တွန်း

အားပေးရှင်းမှုဟို့ ပြုစေ။ ဝီမျှပေးကမ်းသူဟာ ရစ်ရစ်ရော
ရော ပေးကမ်းစေ။ စီမံအောက်ချောက်ဟူ သူဟာ လောင်း
လဝီရိယန စီမံအောက်ချောက်စေ။ သူတပါးဟို့ မစသနား
ရှင်းမှုဟို့ ပြုသူဟာ စေတနာစိန် ကူညီမစေ။

⁹ မြစ်တာဟာ ဟန်ဆောန်မှုကင်းစေပါ။ ကောင်းဘဲဇာ
လေဟို့ ရှုံ့မူးဂေပါ။ ကောင်းမြတ်ဟူဇာလေဟို့ ဆည်းပူး
ဂေပါ။

¹⁰ ညီကို မောန်နှမရှင်းရှင်း၊ ရှစ်ဟူမြစ်တာအားဖြင့်၊
ရှင်းရှင်းရှစ်ခင်ကြင်နာဘီး ချီးမွမ်းဟူနေရာမာ သူများဟို့
ကိုယ့်ထတ် ချီးမြှော့-က်ဂေပါ။

¹¹ အားထုရဟို့နေရာမာ ပျင်းကိုးဘဲန၊ စီအားထတ်သန်
ဘီး ဘုရားသခင်ရဲ့ မှုတော်ဟို့ ဆောန်ရုပ်ဂေပါ။

¹² မျှော်လင့်ရှင်းနှိုက် ဝန်းသာဘီး၊ ဆင်းရဲဒေါက်ခခံရ
ဟူ ခီမာ သီးခံဂေပါ။ ဆုတောင်းရှင်းမှုဟို့ မြဲဒမ်းပြုဂေပါ။

¹³ ဆင်းရဲဟူ သန်ရှင်းသူလေဟို့ ဝီမျှပေးကမ်းဂေပါ။
ညွှတ်သည့်လေဟို့ ကြိုးစားဘီး ညွှတ်ဝတ်ပြုဂေပါ။

¹⁴ နန်းနီလေဟို့ ညှဉ်းဆဲဟူသူလေတွပ် ကောင်းဂျီးပေး
ဘီး၊ ကီဆဲဘဲန မြစ်တာပို့ဂေပါ။

¹⁵ ဝန်းသာသူလေနတူးဒူ ဝန်းသာဘီး၊ ငိုဟူသူလေနတူး
ဒူ ငိုဂေပါ။

¹⁶ ရှင်းရှင်း စီဝန်းမကွဲဘဲ ညီးညီညွတ်ညွတ် ရှိဂေပါ။
ထောန်လွှားဟူစီမော့ဘဲန နှိခလဟူ သူလေဟို့ လတ်ခံဂေ

ပါ။* ကိုယ့်ကိုယ်ကိုယ် ပညာရှိဆိုဘီး ထန်မှတ်ဂေ့န။

17 ဖယ်သူ့ဟိုမှလည်း ပုလန်ဘီးရန်တုံ့ပုလန်န။ လူလေ
ရှေ့မာ အသရေရှိတင့်တယ်အောင် ပြုကျင့်ဂေ့ပါ။

18 လူတိုင်းန တတ်နိုင်ဟူမျှ သင့်မြတ်အောင်နေဂေ့ပါ။

19 ရှစ်ရဟူသူလေ၊ သူများလေ နန်းနို့ဟို ပြစ်မှားဟာ
ကိုယ်တိုင် ပုလန်ဘီးရန်တုံ့ပုလန်ဂေ့န၊ ဘုရားသခင်ဟဘဲ
စီရင်တော်မူပါစေ။ ဘုရားသခင် မိန့်တော်မူဇာဟု “ငါဟာ
ပြစ်တရားဟို စီရင်ပိုင်ဟယ်။ ပြစ်ရှိဟူတိုင်း ငါဆပ်ပေး
မယ်” ဆိုဘီး ကျမ်းစာလာလေဟယ်။

20 အယ်ကြောန့် ကျမ်းစာဇာဟု “နန်ရန်သူဟာ စား
ရမဲ့သော-က်ရမဲ့ ဖြစ်ဟူ ခီမာ စားဇာကျွေးပါ။ ရေငတ်
နေဟယ် ဆိုဟာ သော့-က်ဟိုရေပေးပါ။ အယ်မျိုးပြုရှင်း
အားဖြင့် နန်ဟာ သူ့ရဲ့ ခေါင်းထတ်မာ မီးခဲဟို ပေါင်ဟား
လေ့မယ်” ဆိုဘီး ဖော်ပြဟားဟယ်။

21 ဆိုးအားဖြင့် ရှောင်းခံန၊ ကောင်းအားဖြင့်ဘဲ ဆိုးဟို
နိုင်ယူပါ။

13

စိုးရမန်းဟို ပြုအပ်ဟူဝတ်ကြောင်း

1 လူတိုင်း စိုးရမန်းရဲ့ မိန့်အာဏာဟို လိုက်နာဂေ့ရမယ်။
ဖြားဖြစ်ကြောန့်နူးဆိုဟာ၊ ဘုရားသခင်ရဲ့ ခွင့်မဲ့ဘဲနေ

* 12:16 ချ.၁၆ နို့ညှို့ သူလေဟို လတ်ခံဂေ့ပါ။ အယ်မျိုးမူဘဲနေဟာ
နို့ညှို့ သူလေဟို မိဆွေဖွဲ့ပါ။

ဟာ၊ မန်းအာဏာဆိုလည်း မှော့ဟာ။ အာဏာပိုင်လေ ဂူလောင်းဟို့ ဘုရားသခင် ခန့်အပ်ဟားကြောန့် ဖြစ်ဟယ်။

² အယ်ကြောန့်၊ မန်းရဲ့ ခွမ်အာဏာဟို့ လွန်ဆန်သူဟာ ဘုရားသခင်ဟို့ လွန်ဆန်သူ ဖြစ်ဟယ်။ အယ်မျိုးပြုဟူ သူလေဟာ ပြစ်စီရင်ရှင်းဟို့ ခံရမယ်။

³ မန်းဆိုဇာဟု ကောန်းဟူ ကျင့်ဟို့ ကျင့်ဟူသူလေ ကြော့-က်ရဟို့ မှဘဲန ကောန်းဘဲကျင့်လေဟို့ ပြုကျင့်သူလေ ကြော့-က်ရဟို့ ဖြစ်ဟယ်။ မန်းရဲ့ ခွမ်အာဏာဟို့ ကြော့-က်ဘဲန နေရှင်လော။ အယ်ဆိုဟာ ကောန်းဟူ ကျင့်ဟို့ ကျင့်ပါ။ အယ်မျိုးကျင့်ဟယ် ဆိုဟာ သူရဲ့ ချီးမွမ်းရှင်းဟို့ ခံရလေ့မယ်။

⁴ ဖြားဖြစ်ကြောန့်နူးဆိုဟာ မန်းဟာ နန်းနို့လေရဲ့ ကျိုးတွပ် ဘုရားသခင်ရဲ့ စေခံကျွန်လေဖြစ်ဟယ်။ ကောန်းဘဲကျင့်ဟို့ ကျင့်ဟယ် ဆိုဟာ ကြော့-က်ဂေပါ။ သူဟာ ထားဟို့ သတ်သတ်မဲ့ ကိုင်ဟားဇာ မှဟု။ သူးနို့လေဟာ ဘုရားသခင်ရဲ့ စေခံကျွန်လေဖြစ်ကြောန့် ကောန်းဘဲဟူ ကျင့်လေဟို့ ကျင့်ဟူသူလေဟို့ ဘုရားသခင်ကိုယ်စား ပြစ်ဒန်စီရင်သူလေဖြစ်ဟယ်။

⁵ အယ်ကြောန့် ပြစ်ဒန်ဟို့ ကြော့-က်ဟို့ကြောန့် မန်းအာဏာရဲ့ အောက်စိုးမှုဟို့ ဝန်ခံဇာ မှဘဲန၊ ဘုရားသခင်ရဲ့ စီရင်ရှင်းဟို့ ကြော့-က်ဟို့ကြောန့်လည်း မှဘဲန ကိုယ့်ကိုယ်ကိုယ် သိဟူစိဟို့ ထော့-က်ဘီးဟာ ဝန်ခံရမယ်။

6 အယ်ကြောန့် နန်းနို့လေ အခွန်ဟို့ ပေးဆောန်ဂေပါ။
စိုးရအာဏာပိုင်လေဟာ သူးနို့တာဝန်ဟို့ ကျေပွန်အောန်
ထမ်းဆောန်နေဟူ ဘုရားသခင်ရဲ့ မှဆောန်လေဖြစ်ဟယ်။

7 အယ်ကြောန့် နန်းနို့လေ ပေးဆောန်ဇာရှိဟူတိုင်း
ပေးဆောန်ဂေပါ။ ခွန်ခံထိုက်ဟူသူဟို့ ခွန်ပေးဂေပါ။
ကြော့-က်ထိုက်ဟူသူဟို့ ကြော့-က်ဂေပါ။ ရိုသေထိုက်ဟူ
သူဟို့ ရိုသေဂေပါ။

ရှင်းရှင်းပြုအပ်ဟူဝတ်ကြောန်း

8 ရှင်းရှင်း ရှစ်ရှင်းမြစ်တာကြွေးဟုနေဘီး ဖယ်ကြွေးဟို့
မှလည်း တန်စေန။ သူများဟို့ ရှစ်ဟူသူဟာ ပညတ်တရား
ဟို့ စောန့်ထီးဟူသူဖြစ်ဟယ်။

9 ဖြားဖြစ်ကြောန့်နူးဆိုဟာ “အီထောန်ရေးဖော့-က်ပ
လန်န၊ လူလေရဲ့သတ်ဟို့ သတ်န၊ သူများအောက်စာဟို့
ခိုးန၊ သူများအောက်စာဟို့ တပ်မတ်လိုရှင်စိရှိန” ဆိုဟူ ပ
ညတ်ဟုစဘီး တခြားပညတ်လေ ဂူလောင်းဟာ “ကိုယ်န
စပ်ဆိုင်သူဟို့ ကိုယ်နထပ်တူရှစ်ပါ” ဆိုဟူ ပညတ်တခုဒဲ
မာ ပါဝမ်နေဇာဖြစ်ဟယ်။

10 ရှစ်ရှင်းမြစ်တာရှိဟူသူဟာ ကိုယ်နစပ်ဆိုင်သူရဲ့ကျိုး
ဟို့ ဖျစ်ဆီးတတ်ဟု။ အယ်ကြောန့် ရှစ်ရှင်းမြစ်တာဟာ
ပညတ်တရားလေ ဂူလောင်းရဲ့ ပုလဲဇောင်ရာ ဖြစ်လေဟ
ယ်။

11 နန်းနို့လေဟာ အိမ်ရာဟုနေဘီး နိုးထရဟ့်ခီ ရော-က်
လာဘီ ဖြစ်ဟူကြောင်းဟို့ သိဂေဟယ်။ ဖြားဖြစ်ကြောန့်
နှူးဆိုဟာ နို့လေ ကယ်တန်ရှင်းခံရဟ့် နေရစ်ကာလဟာ
ယောင်ကြည်ခါစဒူးဟုထတ် ပိုဘီး နီးကပ်လာကြောန့် ဖြစ်
ဟယ်။

12 ညဉ့်ခီကူဘီး နေခီဟို့ ရောက်ဟုမယ် ဖြစ်ဟူကြောန့်
မှော်မိုက်ရဲ့ ကျင့်လေဟို့ ဖယ်ရှားဘီးဟာ လန်းရောန်ရဲ့
လတ်နတ်စောင်ဟို့ ဝတ်ဆင်ဂေဇို့။

13 ပွဲလောက်ဟူဇာလေ၊ မောယစ် သော့-က်စားဇာလေ၊
တရားဘဲဟူ မေထုန်ဟို့ မှီဝဲဇာလေ၊ ကိလေသာညစ်ညူး
ဇာလေ၊ ရန်ဖြစ်ဇာလေန ဂေါင်ပြိုင်ဝါကြားဇာလေဟို့ ရှော
န်ဘီးဟာ လန်းရောန်မာ ကျင်လည်ဟူသူမျိုး အသရေရှိ
အောန် ကျင့်သောင်းဂေဇို့။

14 သခင်ယေရှုခရစ်တော်ဟို့ ဝတ်ဆင်ဂေပါ။ ဇာတိသွီး
သား တတ်မတ်ရှင်းနော့-က်ဟို့ လိုက်ဂေန။

14

ညီကို မောန်နှမလေဟို့ ပြစ်တန်ဝေဖန်မှု မလောက်ဟို့
ကြောန်း

1 ယောင်ကြည်ရှင်းအားနဲသူလေဟို့ လတ်ခံဂေပါ။
အယ်ဘေမဲ့ သူခံယူဇာန ပတ်သတ်ဘီး ငြင်းခူလောက်ဂေ
န။

² တချို့သူလေဟာ စားဇာဘောန်းဇောင်ဟို့ စားအပ်ဟယ် ဆိုဘီး ယောင်ကြည်ဂေဟယ်။ အားနဲဟူသူဟာ ဟန်းသီးဟန်းဝပ်လေဟို့ဘဲ စားတတ်ဟယ်။

³ စားဇာဘောန်းဇောင်ဟို့ စားဟူသူဟာ စားဘဲနေသူဟို့ ထီမဲ့မြင်လောက်န။ စားဘဲနေဟူသူဟလည်း စားဟူသူဟို့ စစ်ကြောစီရင်န။ ဖြားဖြစ်ကြောနန်းဆိုဟာ ဘုရားသခင်ဟာ သူဟို့ လတ်ခံတော်မူဘိ။

⁴ နန်ဟာ ဖယ်မျိုးဟူသူဖြင့်ကြောန့် သူများပိုင်ဟူ စေခံဟို့ စစ်ကြောစီရင်ဟယ်နူး။ သူဟာ သူ့သခင် စီရင်ဇာအားဖြင့် ပြစ်လွတ်ရှင်းန ပြစ်စီရင်ရှင်းဟို့ ရှေး-က်လေ့မယ်။ သူဟာ ပြစ်လွတ်လေ့မယ်။ ဖြားဖြစ်ကြောနန်းဆိုဟာ ဘုရားသခင်ဟာ သူ့ရဲ့ပြစ်ဟို့ လွတ်ပေးဟို့တွပ် တတ်နိုင်တော်မူဟယ်။

⁵ တချို့လူလေဟာ နေ့ရစ်တရစ်ထတ် တရစ်ဟာ ပိုဘီး ရေးကီးဟယ် ဆိုဘီး စီရင်ဂေဟယ်။ တချို့လူလေဟလည်း နေ့ရစ်တိုင်းဟာ တူးဒဘဲဖြစ်ဟယ် ဆိုဘီး ယူဆဂေဟယ်။ လူတိုင်း ကိုယ့်ရဲ့ယောင်ကြည်ချစ်တိုင်း ခိုင်မြဲပါစေ။

⁶ နေ့ရစ်ဟို့ စောန့်ထီးဟူသူဟာ ဘုရားသခင်တွပ် စောန့်ဟယ်။ စားဟူသူဟလည်း ဘုရားသခင်ဟို့ ထွေး-က်ဘီး စားဟယ်။ စားဘဲနေဟူ သူဟလည်း ဘုရားသခင်ဟို့ထွေး-က်ဟူကြောန့် စားဘဲနေဘီး ကျေးဇူးတော်ဟို့ချီးမွမ်းဝန်ခံလေဟယ်။

7 နို့လေထဲမှာ ဖယ်သူဟုလည်းဘဲ ကိုယ့်တွပ် သတ်ရှင်ဟု။ ဖယ်သူဟုလည်း ကိုယ့်တွပ် သေဟု။

8 နို့လေ သတ်ရှင်ဟု သခင်ဘုရားတွပ်ဖြစ်ဘီး သေဟုလည်း သခင်ဘုရားတွပ် ဖြစ်ဟုယ်။ အယ်ကြောန့် နို့လေ သတ်ရှင်နေဟူဘဲဖြစ်ဖြစ်၊ သေဟူဘဲဖြစ်ဖြစ် သခင်ဘုရားပိုင်ဆိုင်လေဟုယ်။

9 ဖြားဖြစ်ကြောန့်နူးဆိုဟု ခရစ်တော်ဟု သေဟူသူလေ သတ်ရှင်ဟူသူလေရဲ့ စိုးရဟူ သခင်ဖြစ်ဟို့တွပ် သေခံဘီး ရှင်ပုလန်ထမြော-က်တော်မူလေဟုယ်။

10 အယ်ကြောန့် နန်းနို့လေဟု ဖြားဖြစ်ဟို့ ကိုယ့်ညီကို မောန်နှမလေဟို့ လိုက်စစ်ကြောစီရင်နေနူး။ ဖြားဖြစ်ကြောန့် ထီမဲ့မြင်ပြုရနူး။ နို့လေဂူလောင်းဟု ဘုရားသခင်ရဲ့ တရားပလ္လင်ရှေ့ဟို့ ရှော-က်ရဂေမယ်။

11 ကျမ်းစာလာဟူဇာဟု၊
“ငါသတ်ရှင်ဟူတိုင်း၊

ငါ့ရှေ့မှာ လူတိုင်း ဒူးထော့-က်ရမယ်၊
ငါဟု ဘုရားသခင်ဖြစ်ကြောန့်ဟို့ လူတိုင်း နှောက်နဝန်ခံရမယ်” ဆိုဘီး ဘုရားသခင် မိန့်တော်မူလေဟုယ်။

12 အယ်ကြောန့် နို့လေဂူလောင်းဟု ဘုရားသခင်ရဲ့ စစ်ကြောတော်မူရှင်းဟို့ ခံရဂေမယ်။

သူတပါးဟို့ မှားယွင်းအောင်လောက်န

13 အယ်ကြောန့် နို့လေဟာ နှော့-က်ထပ် ရှင်းရှင်းဟို့ စစ်ကြောစီရင်ဘဲန နေဂေဇို။ ညီကို မောန်နှမဟို့ ထိမိလဲ တတ်ဟူ မှုရာလေဟို့ ကြံစည်ဂေန်။

14 ဖယ်စားဇာလည်း နဂိုတိုင်း ညစ်ညူးဟု ဆိုဇာဟို့ သခင်ယေရှုအားဖြင့် ငါမှန်းမှန်သိဟယ်။ အယ်ဘေမဲ့ လည်း ညစ်ညူးဟယ် ဆိုဘီး နန်းနို့ယောင်ကြည်ဟု ယောင်ကြည်ဟူသူတွပ် အယ်စားဇာဟု ညစ်ညူးဟယ်။

15 တကယ်ဟို့ နန်ဟု ကိုယ်စားဟူစားဇာအားဖြင့် ညီ ကို မောန်နှမဟို့ ထိမိဘီး လဲစေဟယ် ဆိုဟု နန်ဟု မြစ် တာတရားဟို့ ကျင့်ဘဲနေဇာ ဖြစ်ဟယ်။ ခရစ်တော်ရဲ့ သေ ခံတော်မူဟူ ကျေးဇူးတော်ဟို့ ခံရဟူသူဟို့ နန်ရဲ့စားဇာ အားဖြင့် ကျိုးနဲစေန!

16 နန်းနို့ ကောန်းဟယ် ဆိုဘီး ယောင်ကြည်ခံယူဇာဟို့ သူများကဲ့ရဲ့စေန။

17 ဘုရားသခင်ရဲ့ နိုင်ငံတော်ဟု စားသော့-က်န တည် ဟူဇာ မှုဟု သန်ရှင်းဟူဝိညာဉ်တော်အားဖြင့် ခံရဟူ ဖြောန် မတ်ရှင်း၊ ငြိသတ်ရှင်း၊ ဝန်းသာရှင်းလေနဘဲ တည်ဟယ်။

18 အယ်မျိုးကျင့်ဘီး ခရစ်တော်ရဲ့မှတော်ဟို့ ဆောန်ရွပ် ဟူသူလေဟု ဘုရားသခင်ရှေ့တော်မာ နှစ်သက်ဖွယ်ဖြစ် ဘီး လူလေလည်း ချီးမွမ်းဂေဟယ်။

19 အယ်ကြောန့် ငြီးငြီးချမ်းချမ်းနေထိုင်ဇာန ပတ်သ တ်ဟူကြောန်းရာလေဟို့ ပြုစုပေးဘီးဟု ရှင်းရှင်း တ ယော့-က်ဟို့တယော့-က် နို့လေ မြဲဒမ်း တည်ဆော့-က်

ပေးဟို့ ပေးရမယ်။*

20 ဘုရားသခင်ရဲ့ မှုတော်ဟို့ နန့်ရဲ့ စားဇာအားဖြင့် ဖျစ်ဆီးန။ စားဇာဘောန်းဇောင်ဟာ စင်ကြယ်ဟယ်။ အယ်ဘေမဲ့ သူများထိမိဘီး လဲတတ်ဟူစားဇာဟို့ စားဟူသူဟာ ပြစ်ဖြစ်ဟယ်။

21 မဲသားဟို့ စားဟူဇာန စဖျစ်ဝိုင်ဟို့ သော့-က်ဟူဇာအားဖြင့် ညီကို မောန်နမဟို့ ထိမိဘီးလဲဇာ ဖြစ်ဘဲနေအောန် ရှောန်သင့်ဟယ်။

22 နန့်ယောင်ကြည်ရှင်းရှိမယ် ဆိုဟာ ကိုယ့်ဖာသာ ဘုရားသခင်ရှေ့မာ ရှိပါစေ။ ကိုယ်လတ်ခံဟူဇာအားဖြင့် ကိုယ့်ကိုယ်ကိုယ် စစ်ကြောစီရင်ဘဲသူဟာ မင်္ဂလာရှိဟယ်!

23 အယ်ဘေမဲ့ သံသယစိန် တခုခုဟို့ စားဟူသူဟာ ဘုရားသခင်ရဲ့ စီရင်ရှင်းဟို့ ခံရလေ့မယ်။ ဖြားဖြစ်ကြောန့်နူးဆိုဟာ ယောင်ကြည်ရှင်းမွှော့ဘဲကြောန့် ဖြစ်ဟယ်။ ယောင်ကြည်ရှင်းမွှော့ဘဲန ကျင့်ဟူဇာမှန်ဟူမျှလည်း ပြစ်ဖြစ်ဟယ်။

15

ကိုယ့်လိုဟို့ လိုက်ဘဲန သူတပါးရဲ့ လိုဟို့ လိုက်ရှင်းကြောန့်

* 14:19 ၁၄.၁၉ နို့လေ မြဲဒမ်း တည်ဆော့-က်ပေးဟို့ ပေးရမယ်၊ တချို့ မူရင်းလတ်ရေးမူလေမာ နို့လေ မြဲဒမ်း တည်ဆော့-က်ပေးဟယ်၊ ဆိုဘီး ပါရှိဟယ်။

1 အယ်ကြောန့် ယောင်ကြည်ရှင်းခိုင်ခံ့ဟူ နို့လေဟာ အားနဲ့ဟူသူလေရဲ့ အားနဲ့ရှင်းလေဟို့ ထော့-က်ရှပေးရမယ်။ ကိုယ့်လိုဟို့လိုက်ဘီး လောက်ဆောန်သင့်ဟူ။

2 နို့လေဂူလောင်းဟာ ယောင်ကြည်မှုအားနဲ့ဟူ ညီကို မောန်နှမလေဟို့ ယောင်ကြည်ရှင်း ခိုင်မာလာစေဟို့တွပ် သူးနို့လေရဲ့ ကောင်းကျိုးဟို့ ထော့-က်ဘီးဟာ သူးနို့လိုဟို့ လိုက်ဘီး တည်ဆော့-က်ပေးသင့်ဟယ်။

3 ဖြားဖြစ်ကြောန့်နူးဆိုဟာ ခရစ်တော်ဟာ ကိုယ့်လိုဟို့ လိုက်ဟူ။ ကျမ်းစာလာဟူဇာဟု “ကိုယ်တော့်ဟို့ ကဲ့ရဲ့ဟူ သူလေရဲ့ စကားဟာ ကျွန်တော့်ထတ်ဟို့ ရော့-က်ပါဟယ်” ဆိုဘီး လာလေဟယ်။

4 ကျမ်းစာမာ ဖော်ပြဘီး ရေးဟားဟူ ရှိမျှဂူလောင်းဟာ နို့လေဟို့ သွန်သန်ဆောင်းမဟို့တွပ် ရေးဟားဇာ ဖြစ်ဟယ်။ အယ်မျိုး ဖော်ပြရဇာဟု နို့လေဟာ ကျမ်းစာတော်မာ ရရှိဟူ သီးခံရှင်းန နှစ်သိမ့်မှုလေအားဖြင့် မျှော်လင့်ရှင်းရှိ ဟို့တွပ် ဖြစ်ဟယ်။

5 နန်းနို့လေ ဂူလောင်းဟာ ခရစ်တော်ယေရှုရဲ့ ပေါင်သတ်သေဟို့ လိုက်ရော့-က်ဘီး တစ်တဝန်းဒဲရှိဟို့တွပ် သီးခံရှင်းန နှစ်သိမ့်မှုရဲ့ သခင် ဘုရားသခင်ဟာ နန်းနို့လေဟို့ ကူမတော်မူပါစေ။

6 အယ်မျိုးမှ နန်းနို့လေ ဂူလောင်းဟာ တလောင်းတဝဒဲန နို့လေရဲ့သခင် ယေရှုခရစ်တော်ရဲ့ ၈ ဘုရားသခင်ရဲ့ ဂေါင်တော်ဟို့ ချီးမွမ်းနိုင်ဂေ့လေ့မယ်။

လူမျိုးခြားလေတွပ် ဒန်းကောန်း

7 အယ်ကြောန့် ခရစ်တော်ဟာ နန်းနို့ဟို့ လတ်ခံဟူ မျိုး ဘုရားသခင်ရဲ့ ဖောင်းသရေတော် ထန်ရှားစေဟို့တွပ် ရှင်းရှင်း တယော့-က်ဟို့တယော့-က် လတ်ခံဂေပါ။

8 နော့-က် ထပ် ငါ ပြော ရှင် ဇာ ဟု ခရစ် တော် ဟာ ဘုရားသခင်ရဲ့ သမ္မာတရားဟို့ ထန်ရှားစေဟို့တွပ် ရေဖျား လှီးဟားဟူ သူလေရဲ့ စေခံဖြစ်တော်မူဟယ်။ အယ်မျိုး ဖြစ်ဟူဇာဟု ရှေးဘိုးဘေးလေဟို့ ပေးဟားဟူ ဂဒိတော်လေ ဟို့ တည်မြဲစေဟို့တွပ်န၊

9 လူမျိုးခြား လေ လည်း ကရုဏာ တော် ကြော န့် ဘုရားသခင် ရဲ့ ကျေးဇူး တော် ဟို့ ချီးမွမ်း ဂေ ဟို့တွပ် ဖြစ်ဟယ်။ ကျမ်းစာတော်ဟု၊

“အယ်ကြောန့် ကျွန်တော်ဟာ လူမျိုးခြားလေထဲဟုနေ ကို ယ်တော့်ဟို့ ချီးမွမ်းပါမယ်။

ကိုယ်တော့်ဟို့ ထောမနာသီချင်း ဆိုပါမယ်” ဆိုဘီး ဖော်ပြဟူတိုင်းဘဲ ဖြစ်လေဟယ်။

10 နော့က်ဘီး ကျမ်းစာဟု၊

“လူမျိုးခြားလေ ဘုရားသခင်ရဲ့ လူမျိုးတော်လေနတူးဒူ ဝန်းသာဂေပါ!” ဆိုဘီး လာလေဟယ်။

11 နော့-က်ဘီး လာဇာဟု၊

“လူမျိုးခြားပေါန်းလေ ဘုရားသခင်ဟို့ ချီးမွမ်းဂေပါ! လူနွယ်ပေါန်းလေ ကိုယ်တော့်ဟို့ ချီးမွမ်းဂေပါ” ဆို ဘီး လာလေဟယ်။

12 နှော-က်ဘီး ဟေရှာယပြောဇာဟု၊

“ယေရှုရဲ့သစ်ပြစ် ပေါ့-က်လေ့မယ်။

အယ်သူဟာ လူမျိုးခြားလေဟို့ အောက်စိုးဟို့သူ ဖြစ်
ဟူကြောန့်

အယ်သူဟို့ လူမျိုးခြားလေ မျှော်လင့်ကိုးစားလေ
မယ်” ဆိုဘီး ပြောဟူးလေဟယ်။

13 နန်းနို့လေဟာ သန်ရှင်းဟူဝိညာဉ်တော်ရဲ့ တဂိုးတော်
အားဖြင့် မျှော်လင့်ရှင်းန ကြွယ်ဝဟို့တွပ် မျှော်လင့်ရှင်းရဲ့
ရှင် ဘုရားသခင်ဟာ ယောင်ကြည်ရှင်းဟုလာဟူ ဝန်းသာ
ဇာဘောန်းဇောင်န ငြိသတ်ရှင်းဟို့ ပေးသနားတော်မူပါ
စေ။

ပေါလုရဲ့ ရဲရဲရင့်ရင့် ရေးသားရဟူကြောန်း

14 ညီကို မောန်နှမလေ နန်းနို့လေဟာ ကောန်းမြတ်ဟူ
ပါရမီ သိပညာဘောန်းဇောင်န ပုလဲဝဘီး ရှင်းရှင်း သွန်
သန်နိုင်ဂေမယ် ဆိုဇာဟို့ ငါစိခလ ယောင်ကြည်ပါဟယ်။

15 အယ်ဘေမဲ့ အယ်စမာ တချို့ကြောန်းရာလေန ပတ်
သတ်ဘီး နန်းနို့လေဟို့ ဒိပေးရာမာ ငါဟို့ ဘုရားသခင် ပေး
သနားဟူ ကျေးဇူးတော်ဟို့ မှီပြုဘီး ရဲရဲရင့်ရင့် ရေးဟူး
ဇာဖြစ်ဟယ်။

16 အယ်မူခွမ့်ရေးဟာ လူမျိုးခြားလေတွပ် မူတော်
ဆောန်ဟို့ ခရစ်တော်ယေရှုရဲ့ စေခံဖြစ်ရဟူ ခွမ့်ထူးဘဲ
ဖြစ်ဟယ်။ လူမျိုးခြားလေဟာ ဘုရားသခင် နှစ်သက်
ဖွယ်ရာ ပူဇော်သကာဖြစ်န ဘုရားသခင်ဟို့ သန်ရှင်းဟူ

ဝိညာဉ်တော်ဟု ဆစ်ကပ်ဟူသူလေ ဖြစ်လာဟို့တွပ် ငါဟာ ယဇ်ပုရောဟိတ် တာဝန်ဟို့ ထမ်းဆောင်ဘီး ဘုရားသခင် ရဲ့ ဒန်းကောင်းဟို့ ဟောပြောကြေညာပါဟယ်။

17 အယ်ကြောန့် ငါဟာ ဘုရားသခင်န စပ်ဆိုင်ဟူ ရာ လေနိုက် ခရစ်တော် ယေရှုအားဖြင့် ဝါကြွားဇာကြောင်းရှိ ဟယ်။

18 ဖြားဖြစ်ကြောန့်နဲ့ဆိုဟာ လူမျိုးခြားလေဟာ နာခံမှု ရှိစေဟို့တွပ် ခရစ်တော်ဟာ ငါ့ဟို့ သုံးပြုဘီး တရားစကား န လောက်ဆောန့်ရှင်းအားဖြင့်ရော၊

19 နိမိတ်လတ်ခဏာလေန အံ့ဩဘွယ်ရာလေရဲ့ တဂိုး အားဖြင့်ရော ဘုရားသခင်ရဲ့ ဝိညာဉ်တော် တဂိုးအားဖြင့် ရော၊ ပြုတော်မူဟူ ဇာလေဟုနေတခြား ငါဟာ ဖယ်ဇာ ဟို့မှ ရဲရဲဝံ့ဝံ့ ပြောရှင်ဟု။ အယ်မျိုးဖြစ်ကြောန့် ငါဟာ ယေရှုရှလင်မြို့ဟုနေ ကူလုရိတ်ပြည်ထံ ရှေး-က်ဟူနေရာ တိုင်းမာ ခရစ်တော်ရဲ့ ဒန်းကောင်းဟို့ ကူစင်အောန် ဟော ပြောဟယ်။

20 အယ်မျိုး တခြားလူလေ ဒုလဟားဟူ အုပ်စုထတ်မာ ငါဆစ်ဘီး တည်ဆော့-က်ဟု။ ခရစ်တော်ရဲ့ နာမဟို့ ကြား ဖူးသေးဘဲဟူ နေရာလေမာ ဒန်းကောင်းဟို့ ဟောပြောဟို့ တွပ် စေတနာစိန် ငါကြိုးစားအားထုလေ့ရှိဟယ်။

21 အယ်မျိုးဘဲ ကျမ်းစာလာဇာဟု၊

“အယ်သူရဲ့ ကြောန့်ဟို့ ဖယ်သူလည်း ပြုဖူးဘဲနေဟူလ ည်းဘဲ မြင်ဂေလေ့မယ်။

ကြားဖူးဘဲဟူသူလေဟာ နားလည်ဂေ့လေ့မယ်” ဆို
ဘီး လာလေဟယ်။

ရောမမြို့ဟို့သွားဟို့တွပ် ပေါလုကြံစည်ဟူကြောန်း

²² အယ်မူကြောန်းကြောန်း၊ ငါဟာ နန်းနို့လေနားဟို့ လာ
ဟို့တွပ် ခါဘီးခါ ကြိုးစားဟူလည်းဘဲ တားဆီးခံရဟယ်။

²³ အယ်ဘေမဲ့လည်း ခုခီမာ ငါဟာ အယ်ဒေသလေမာ
လောက်ဆောန်သင့်ဟူ မူကိစလေဟို့ လောက်ဆောန်ဘီး
ဟာ နန်းနို့လေနားဟို့ လာဟို့တွပ် နှစ်ပေါင်း ဘောင်ဂီးဟု
နေဘီး ဆန္ဒရှိဟူတိုင်း၊

²⁴ စပါနိပြည်ဟို့ ငါသွားဟူ ခီမာ နန်းနို့လေဟို့ မြင်တွံ
ရှင်ကြောန် လည်လာရင်းန ဝမ်လာဟို့ စိကူးဟားဘီး၊ နန်း
နို့လေနားမာ ရှစ်ဟား တဲခိုဘီးဟာ စပါနိပြည်ဟို့ ခရီးသွား
ဟို့တွပ် ငါ့ဟို့ ကူညီပေးလေ့မယ် ဆိုဘီး မျှော်လင့်ဟားပါ
ဟယ်။

²⁵ ခု ငါဟာ သန်ရှင်းသူလေရဲ့ မူဟို့ လောက်ကျွေးပြု
ဟို့တွပ် ယေရုရှလင်မြို့ဟို့ သွားရမယ်။

²⁶ ဖြားဖြစ်ကြောန်နူးဆိုဟာ မာကေဒေါနိ ပြည်သား
လေန အခါယ ပြည်သားလေဟာ၊ ယေရုရှလင်မြို့မာရှိ
ဟူ ဆင်းရဲဟူ သန်ရှင်းသူလေဟို့ ကူညီ ထော့-က်ပံပေးဟို့
တွပ် စေတနာစိ ရှိဂေ့ကြောန်ဖြစ်ဟယ်။

27 သူးနို့လေ စေတနာစိရှိဟူဇာ မှန်ဟူလည်းဘဲ ယုဒလူမျိုးလေဟံ ကူညီ ထော့-က်ပံပေးဟို့တွပ် တာဝန်ရှိပါဟယ်။ ဖြားဖြစ်ကြောန်းနူးဆိုဟာ ယုဒလူမျိုးလေဟာ သူးနို့ခံစားရဟူ ဝိညာဉ်ဆုကျေးဇူးလေဟံ လူမျိုးခြားလေဟံ ဝီမျှခံစားစေဟူကြောန်း၊ လူမျိုးခြားလေဟူလည်း ယုဒလူမျိုးလေရဲ့ ရောက်ပိုင်းဆိုင်ရာ အောက်စာလေဟံ ဝိဌပေးကမ်းသင့်ပါဟယ်။

28 အယ်ကြောန်း အယ်မူဟံ လောက်ဆောန်ဘီး လူငွေလတ်ဆောန်ဟံ သူးနို့လတ်ထဲဟံ အပ်ပေးဘီးဟာ နန်းနို့ဟံ ဝမ်တိုဘီးဟာ စပါနိပြည်ဟံ သွားမယ်။

29 နန်းနို့နားဟံ ငါလာဟူ ခီမာ ခရစ်တော်ရဲ့ ကောန်းဂျီးန ပုလဲဝဘီး ရော့-က်လာမယ် ဆိုဇာဟံ ငါသိဟယ်။

30 ညီကို မောန်နှမလေ နို့လေရဲ့ သခင် ယေရှုခရစ်တော်န ဝိညာဉ်တော်ဟု ပေးသနားဟူ ရှစ်ရှင်းမြစ်တာဟံ မှီပြုဘီးဟာ ငါ့တွပ် ငါနတူးဒူ ဘုရားသခင်ထံတော်မာ စီအားထတ်သန်ဘီးဟာ ဆုတောင်းပေးဟို့တွပ် နန်းနို့လေဟံ ငါတိုက်တွန်းနှိုးဆော်ရှင်ဟယ်။

31 ယုဒပြည်မာရှိဟူ ယောင်ကြည်ဘဲဟူသူ ယုဒလူမျိုးလေရဲ့ ဘေးရန်ဟုနေ လွတ်ကင်းဟို့တွပ်န ယေရှုရှလင်မြို့မာ ငါကူညီမဇရှင်းမှုရာဟံ သန်ရှင်းသူလေ နှစ်သက်ဘီးဝန်းသာအားရန လတ်ခံနိုင်အောက် ဆုတောင်းဂေ့ပါ။

32 ဘုရားသခင် လိုတော်ရှိဟယ် ဆိုဟာ ငါဟာ ဝန်း

မြေ-က်ရှင်းန နန်းနို့နားဟို့ လာဘီး နန်းနို့လေနတူးဒူ ပျော်
ပျော်ရွှင်ရွှင်န နားရဟူခွမ်ဟို့ ရပါလေ့မယ်။

³³ ငြိသတ်ရှင်းရဲ့ရှင် ဘုရားသခင်ဟာ နန်းနို့လေနတူးဒူ
ရှိတော်မူပါစေ။ အာမင်။

16

ပေါလုရဲ့ နှောက်ဆစ်ဟူစကား

¹ ကင်ခြေမြို့ သင်းတော်ဟု သင်းထော့-က်ဖြစ်ဟူ နို့
လေရဲ့ညီမ ဖိဗေဟို့ နန်းနို့လေဆီဟို့ မိဆစ်ပေးဘီး အပ်
လိုပါဟယ်။

² သန်ရှင်းဟူသူလေ ပြုသင့်ဟူတိုင်း သခင်ဘုရားဟို့
ထော့-က်ဘီးဟာ သူဟို့လတ်ခံဂေပါ။ ကူညီလိုအပ်ဟူရာ
လေဟို့ သူဟို့ကူညီမဇဂေပါ။ သူဟာ ငါ့ဟူစဘီး လူဘော
င်ဂီးဟို့ ကူညီမဇဟူသူဖြစ်ပါဟယ်။

³ ခရစ်တော်ယေရှုနှိုက် ငါ့ရဲ့ လောက်ဖော်ဆောန်ဖတ်ဖြ
စ်ဟူ ပြစ်ကိလန အာကုလဟို့လည်း နှောက်ဆစ်ဂေပါ။

⁴ သူးနို့လေဟာ ငါ့တွပ် သတ်ပေးဟို့ ဝန်လေးဘဲသူလေ
ဖြစ်ဟယ်။ သူးနို့ရဲ့ကျေးဇူးဟို့ ငါတယော့-က်ထဲ ဝန်ခံရှင်း
မှုဘဲန လူမျိုးခြားလေရဲ့ သင်းတော်လေဟုလည်း ဝန်ခံဂေ
ဟယ်။

⁵ သူးနို့အီမာ စုဘီးဝတ်ပြုဟူ သင်းတော်ဟို့လည်း
နှောက်ဆစ်ဂေပါ။

အာရှပြည်မာ ရင်ဦးဆောင်း ခရစ်တော်ဟို့ ယောင်ကြည်ဟူ ငါရှစ်ရဟူ ငါမိတ်ဆွေ ပဲနက်ဟို့ နှောက်ဆစ်ဂေ့ပါ။

⁶ နန်းနို့လေတွပ် ရရာတိုင်း ကြိုးစားဘီး လောက်ကျွေးပြီဟူ မာရီဟို့လည်း နှောက်ဆစ်ဂေ့ပါ။

⁷ ငါ့ရဲ့လူမျိုးဖြစ်ဟူ ငါနတူးဒူ ကျဉ်းခလခံရဟူ အနုဒြောနိတ်န ယုနိ *ဟို့ နှောက်ဆစ်ဂေ့ပါ။ သူးနို့လေဟာ တမန်တော်လေ ကြားမာ ထန်ပေါ်ဟူ သူလေဖြစ်ဘီး ငါ့ထတ်ရင်ဦးဆောင်း ခရစ်တော်ဟို့ ယောင်ကြည်ဟူ သူလေဖြစ်ဟယ်။

⁸ သခင်ဘုရားအားဖြင့် ငါရှစ်ရဟူမိဆွေ အမှပလိဟို့ နှောက်ဆစ်ဂေ့ပါ။

⁹ ငါနတူးဒူ ခရစ်တော်ရဲ့မှုတော်တွပ် စေခံဟူ လောက်ဖော်ဆောန်ဖတ် ဥရဗန်န ငါရှစ်ရဟူသား သတာခုဟို့ နှောက်ဆစ်ဂေ့ပါ။

¹⁰ အပေလေဟို့ နှောက်ဆစ်ဂေ့ပါ။ သူဟာ ခရစ်တော်ဟို့ သစ်စာရှိဘီး နှစ်သက်ဖွယ်ကောင်းဟူသူ ဖြစ်ဟယ်။ အာရိတုတောဗုလုရဲ့ အီသူအီသားလေဟို့လည်း နှောက်ဆစ်ဂေ့ပါ။

¹¹ ယုဒလူမျိုးရှင်းဖြစ်ဟူ ဟေရောဒျုန်ဟို့ နှောက်ဆစ်ဂေ့ပါ။ သခင်ဘုရားနှိုက် တမဲ့တော်လေဖြစ်ဟူ နာကိသူရဲ့ အီသူအီသားလေဟို့ နှောက်ဆစ်ဂေ့ပါ။

* 16:7 **၁၆.၇** ယုနိ၊ အယ်မျိုးမှုဘဲနေဟာ ယုနိယ၊ တချို့မူရင်းလတ်ရေးမူလေမာ ယုလိ၊ ဆိုဘီး ပါရှိဟယ်။

12 သခင်ဘုရားရဲ့မူတော်ဟို့ ကြိုးစားဘီး လောက်ဆော
န့်ဟူမီးမ တရုဖဲနန တရုဖောသဟို့ နှောက်ဆစ်ဂေ့ပါ။ ငါ
ရရာတိုင်းရှစ်ရဟူမိဆွေ ပေရသိဟို့ နှောက်ဆစ်ဂေ့ပါ။
သူဟာ သခင်ဘုရားရဲ့မူတော်ဟို့ ရရာတိုင်းကြိုးစားဘီး
လောက်ဆောန်သူဖြစ်ဟယ်။

13 သခင်ဘုရားဝီးကော့-က်ခံရဟူသူ ရုဖု န ငါ့ရဲ့မိခင်
မျိုးဖြစ်ဟူ သူမိဟို့လည်း နှောက်ဆစ်ဂေ့ပါ။

14 အသိုကြိတ်၊ ဖလေကုန်၊ ဟေရမ၊ ပတ်ရောဘ၊ ဟေ
ရမေဟုစဘီး သူးနို့နတူးဒုနေဟူ ညီကို မောန်နှမလေဟို့
နှောက်ဆစ်ဂေ့ပါ။

15 ဖိလောလုပ်၊ ယုလိ၊ နေရု၊ နေရုညီမန ဩလုမုပဟု
နေစဘီး သူးနို့နတူးဒုနေဟူ သန်ရှင်းသူလေဟို့ နှောက်ဆ
စ်ဂေ့ပါ။

16 ယော့-က်နယော့-က် သန်ရှင်းဟူနမ်းန နှောက်ဆစ်
ဂေ့ပါ။ ခရစ်တော်ရဲ့ သင်းတော်အားလောင်းဟု နန်းနို့လေ
ဟို့ နှောက်ဆစ်လိုက်ပါဟယ်။

ပေါလုရဲ့ နှော့-က်ဆောင်း ညွှန်ကြားချစ်လေကြောင်း

17 ညီကို မောန်နှမလေ နန်းနို့ခံယူဘီးဟူ ဆောင်းမ
ဩဝါဒန ဆန့်ကျင်ဖတ်ဖြစ်ဟူ သင်းခွဲဘီး ရှင်းရှင်းစိဝန်း
ကွဲအောန် ယောင်ကြည့်မှု မှားယွင်းအောန် လောက်ဟူ သူ
လေဟို့ ဒီန ရှောန်ရှားဟို့တွပ် နန်းနို့ဟို့ ငါတိုက်တွန်းပါဟ
ယ်!

18 ဖြားဖြစ်ကြောနဲ့နဲ့ဆိုဟာ သူးနို့လေဟာ နို့လေရဲ့ သခင် ခရစ်တော်ရဲ့ မူဟို ဆောက်ရွပ်ဘဲန သူးနို့ရဲ့ ဝန်းဇာ တွပ်ဘဲ လောက်ဆောက်သူလေ ဖြစ်ဟယ်။ သူးနို့လေဟာ နူးညံ့ချိုသာဟူ စကားန မလော့-က်ပြောဘီးဟာ စိကော န်းရှိဟူ သူလေန ရိုးသားသူလေဟို လှည့်ဇားတတ်ဂေဟ ယ်။

19 နန်းနို့လေရဲ့ နာခံမှုရှိဟူကြောင်းဟို လူလေ ဘောင်ဂီး ရှေ့မာ ထန်ရှားဟူကြောနဲ့ နန်းနို့လေထတ်မာ ငါဝန်းသာပါ ဟယ်။ အယ်ဘေမဲ့ နန်းနို့လေ ကောင်းဟူ မူမာ ပညာရှိဖြစ် ဘီး ကောင်းဘဲမူလေမာ ပြစ်ကင်းသူလေ ဖြစ်ဟို့တွပ် ငါ လိုရှင်ဟယ်။

20 ငြိသတ်ရှင်းရဲ့ သခင် ဘုရားသခင်ဟာ စာတန်ဟို နန်းနို့ရဲ့ ခေအော့-က်မာ ကြာခန် နှိစစ်တော်မူလေ့မယ်။

နို့လေသခင် ယေရှုခရစ်တော်ရဲ့ ကျေးဇူးတော်ဟာ နန်း နို့တူးဒူ ရှိပါစေ။†

21 ငါ့ရဲ့ လောက်ဖော်ဆောက်ဖတ် တိမောသေန၊ ငါ့လူမျိုး ရှင်းဖြစ်ဟူ လုကိ၊ ယာသုန်၊ သောသိပတရုလေဟ နန်းနို့ ဟို နှောက်ဆစ်ဂေဟယ်။

22 အယ်စာဟို ရေးပေးဟူ ကျွန်တော်တေရတိဟာ ခရစ်တော်အားဖြင့် ညီကို မောန်နှမလေဟို နှောက်ဆစ်ပါ ဟယ်။

† 16:20 ၁၆.၂၀ တချို့ မူရင်းလတ်ရေးမူလေမာ အယ်စာကြောန်းဟို ဖြူဟားဟယ်။ 16:21 ၁၆.၂၁ တ ၁၆.၁

23 ငါ့န သင်းတော်တခုလောင်းဟို့ လတ်ခံဉ်းဝတ်ပြု
ဘီး သူ့အီဟို့ ဘုရားဝတ်ပြုဟို့တွပ် ဆစ်ကပ်ဟို့နေရာပေး
ဟူ ဂါယုဟုလည်း နန်းနို့လေဟို့ နောက်ဆစ်လိုက်ပါဟယ်။
မြို့ဘဏ္ဍာစိုး ရေတုတုန နို့လေရဲ့ညီ ကွာတုလေဟုလည်း
နန်းနို့လေဟို့ နောက်ဆစ်ဂေဟယ်။

24 ‡

ဂေါင်တော် ချီးမွမ်းရှင်းန ဆုတောင်းရှင်းအားဖြင့်
ဆောင်းသတ်ဟူးဟူကြောင်း

25 ဘုရားသခင်ရဲ့ ဖောင်းသရေတော်ဟို့ ထောမနာပြု
ဂေဇို! ယေရှုခရစ်ကြောင်းဟို့ ငါဟောပြောဟူ ဒန်းကော
န်းတိုင်း ရှေးကာလဟုနေဘီး ဖောင်းကွယ်ဘီး ဝပ်ဟူးဟူ
မှန်တရား ပေါ်ထွပ်ထန်ရှားလာန ထပ်တူ ခရစ်တော်ယေရှု
ဟူ နန်းနို့လေရဲ့ ယောင်ကြည်ရှင်းဟို့ ခိုင်ခံစေနိုင်တော် မူ
ဟယ်။

26 အယ်ဘေမဲ့ ခုခီမာ အယ်မူဖောင်းကွယ်ဟူးဟူ သမ္မာ
တရားဟာ ပရောဖက်လေရဲ့ ကျမ်းလေအားဖြင့် ထန်ရှား
လာဘီ။ လူဘောင်းဇောင်ဟာ ဘုရားသခင်ဟို့ ယောင်
ကြည်ဘီး ကိုယ်တော်ရဲ့ မိန့်တော်ဟို့ နာခံလာဂေဟို့တွပ်
နိစ္စထာဝရ သတ်ရှင်တော်မူဟူ ဘုရားသခင်ရဲ့ မိန့်တော်
အားဖြင့် အယ်ဒန်းကောင်းဟို့ ကြေညာတော်မူဘီ။

16:23 ၁၆.၂၃ က တ ၁၉.၂၉: ၁ ကော ၁.၁၄: ၁၂ တိ ၄.၂၀ ‡ 16:24
၁၆.၂၄ တချို့ မူရင်းလတ်ရေးမူလေမာ ခန်းငယ် ၂၄ ဟို့၊ နို့လေရဲ့ သခင်
ယေရှုခရစ်တော်ရဲ့ ကျေးဇူးတော်ဟာ နန်းနို့လေ ဂူလောင်းနတူးဒူ ရှိပါစေ။
အာမင်၊ ဆိုဘီး ဖွဲ့ထဲဟူးဟယ်၊ တခြား ကျမ်းလေမာ အယ်စာကြောင်းဟို့
ခန်းငယ် ၂၇ နေ့-က်မာ ပေါန်းထဲဟူးဟယ်။

²⁷ ဉာဏ်တော်အနန္တနု ပုလဲဇောင်တော်မူဘီး တပါးဒဲရို
ဟူ ဘုရားသခင်ဟာ ယေရှုခရစ်တော်အားဖြင့် ကမ္ဘာဆစ်
ဆစ် ဖောင်းသရေတော် ကီးပါစေ! အာမင်။

§ 16:27 ၁၆.၂၇ တချို့ မူရင်းလတ်ရေးမူလေမာ ခန်းငယ် ၂၅-၂၇
ဟု အယ်နေရာမာ ရှိဘီး ၁၄.၂၃ ဟာ နော-က်မာ ရှိဟယ်။ တချို့
မူရင်းလတ်ရေးမူလေမာ အယ်ခန်းငယ်ဟာ ၁၄.၂၃ ရဲ့ နော-က်မာ ရှိဟယ်။
တခြား မူရင်းလတ်ရေးမူ တခုမာ အယ်ခန်းငယ်ဟာ ၁၅.၃၃ ရဲ့ နော-က်မာ
ရှိဟယ်။

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1